

**SEVENTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

FOR FOURTH SITTING ON FRIDAY, THE 18th MARCH, 2016
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. * **Resolutions**

NGURTHANZUALA
Secretary

* Please see Bulletin Part-II No. 122, dated the 11th March, 2016 for relative precedence of Private Members' Resolutions to be moved.

SPEAKER : LALPA chuan khawngaihna leh ropuina a pe ang a; Dik taka awmte lakah chuan thil tha reng reng a ui lo vang. (Sam 84:11)

Le, tunah zawhna kan la ang a, Starred Question No.21-na, a zawhna neitu Dr.K.Beichhua, MLA zahawm tak i sawm ang.

Dr. K. BEICHHUA : Pu Speaker, ka lawm e. Food, Civil Supplies & Consumer Affairs Department changtu Minister zahawm tak hnena ka zawhna chu –

- (a) Tun dinhmunah Mizoram mipuite hnenah buhfai thla khatah vawi engzatnge sem a nih ?
- (b) Mi pakhat tan thla khatah kg engzatnge quota a nih ?
- (c) Tun dinhmunah hian Mizoram hmun hrang hrangah buhfai godown ruak a awm em ?

SPEAKER : Le, department neitu Minister zahawm tak Pu John Rotluangliana ilo sawm ang.

Pu JOHN ROTLUANGLIANA, MINISTER : Pu Speaker, Starred Question No.21-na member zahawm tak Dr.K.Beichhua zawhna chhanna chu –

- (a) Tun dinhmunah Mizoram mipuite hnenah buhfai thla khatah vawi 2 sem thin a ni a, BPL leh AAY erawh chu TPDS bituk angin thla khatah vawi 1 sem thin a ni.
- (b) Tun dinhmunah Aizawl City-ah chuan kar khatah puitling pakhat tan 1 kg zel sem a ni a, Supply Centre-ah leh Aizawl Suburb-ah puitling pakhat tan kar khatah 2 kgs zel sem a ni.
- (c) Tun dinhmunah hian Mizoram hmun hrang hrangah buhfai godown ruak a awm lo tih a ni. Chumi rual chuan Pu Speaker, tuna rawn tih lai hi hmanni deuh kha a ni tawh a. Tun dinhmunah chuan hemi Food Security tun thlaa kan

sem tak avangin BPL kha a awm tawh lo va Food Security-ah. AAY-ah chuan tunah hian 17 ½ kgs in kg-ah ₹ 3 hisapin AAY hi pek an ni.

Tin, hemi priority household kan tih PHH hi 5 kg in tunah hian sem a ni a, kg-ah ₹ 3/- hisapin. Tin, non NFSA kan ti a, Food Security in a cover loh ho hi 5 kg in kg-ah ₹ 15/- hisapin kan sem mek a ni. Hei hi Food Security danah chuan thla khatah khan an dawn kha hlawm khata pek tur a ni a. Amaherawhchu, bul tan tir kan nih avangin a chanvein kan sem a. Tun March kar tawpah hian 2nd installment hi kan pe leh nghal ang.

SPEAKER : Zawhbelhna a neitu Dr.K.Beichhua.

Dr. K. BEICHHUA : Pu Speaker, ka zawhbelhna chu, kan Minister zahawm tak khan chiang deuhin a rawn sawi a. Tun dinhmun ka tih kha ka zawh hun atanga wawiin thleng hian min ngaihsak ta ula. Vanduaithlak takin Food Security Act hman atangin kan ration card kha a dik lo nual tih kan hria a. Kan Chief Minister zahawm tak ration card ngei pawh kha a dik lo tih kan hria a. Chuti a nih si chuan ration card dik lo chung chung khan Food Security Act hnuaiyah hian kan sem ta em ni tih kha pakhat ni se.

Pahnihna ah chuan Food Security ration card kan siam dik loh tawh zawng zawngte kha a man chhutin cheng engzat man nge ni ang ?

Pathumna ah chuan ration card siamthat hna hi engtika zawh tur nge ni ang tih ni se. Tin, AAY kan tih te, PHH kan tih leh khang tel lo statistic kan lo siam sual tawh te kha rintlak an ni ang em ? Siamthat leh an ngai angem tih kha ka zawhbelhna a ni e.

SPEAKER : Awle, zawhbelhna pali a siam nghal a, rawn chhang sela. Ngawi rawh, pakhat dangin a nei, zawt law law rawh se.

Pu LALRUATKIMA : Pu Speaker, mi pangain in zawt thei ang i ti a. Chu chu nangma sawi ngei a ni a, khawngaih takin a record pawh kan en thei ang a, i dinglam amite pawh khan an hria a ni. Chuvang chuan mi pangain a zawh theih dawn avangin kan lo lawm khawp mai a. Chuvang chuan khalai kha zawhbelhnaah chuan, mi panga, zawhna panga ni lovin mi pangain tiin Chair zahawm tak atang khan i sawi a ni.

(Speaker : Mi panga ka ti em ni?) Aw, mi panga i ti, chuvang chuan mi panga kan leng a ni, a lawmawm khawp mai tih kha ka'n sawi hmasa duh a ni.

Pu Speaker, kan House Leader zahawm tak khan ni 16 tun session-ah khan Ration Card dik lo taka titute hi an chungah dan lekkawh a ni ang a tih kha lekkawh a ni ta em tih ka zawt a. Tin, Ration Card, National Food Security Act-ah khan kan sawi tawh a. Kan thianpa chu a hming ringawt kha 6 a awm a ni, a intlar thla that mai a ni a hming kha. Keini chhungah pawh kan kum an tidik vek a, kan pian ni leh thla kha zero one zero one in a kal a ni. Khata data, kan pian ni leh thla leh kum kha an hmu vek ang tih ka ring. Chuvang chuan a mawhphurtute hi hrem an nih tur kha kan House Leader-in a sawi tawh a, hrem an ngai a ni tih kha chu a lang reng mai a. Ration Card chhutna tur kha NSAF atang khan engzahnge, pakhat engzatin nge an chhut tih kha ka'n zawt tel nghal a ni.

SPEAKER : Awle, mi panga tih kha slip of tongue a ni ang. Keimah pawhin ka sawi lain ka rilruah a awm lo. Tawngsual palh a ni ang. Kha kha kan tih ngai loh thil a ni a. Speaker a lo tawngsual palh a nih chuan slip of tongue-ah min ngaihsak ula.

Pu LALRUATKIMA : Pu Speaker, panga i ti a, ni e, tihsual palh chu a awm thei a ni.

Pu K.SANGTHUAMA : Pu Speaker, zawhbelh nan mi pakhat dang ringawt kha chu a tlem lutuk deuh. Tunhma atang pawhin tih dan ngai a ni tehchiam lo va. Chuvangin

Pu Speaker, a zawttuin a zawh leh midang zawhna pakhat chauh hawn kha chu thil kawng kal chiah chu a ang lo khawp mai a.

SPEAKER : Chuvang chuan a neitu hian tlemin fimkhur deuh se, thiante kian ve ula zawhbelhna kha maw. Mahni chauha zawh fai vek kha a dik bik lo a ni. Tuna an zawhnate kha chhang turin Minister zahawm tak sawm tawh mai ila.

Pu R.LALZIRLIANA, MINISTER : Pu Speaker, thiante zawhbelhna atanga zuk hriat ve chhawng a han zawhbelh leh ringawt kha chu a tha teh vak chuang hlei nem. Hetah ngaihtuahna thui tak, zau tak min pe a, tah chuan an zawt ang a, kha kha club together a nih chuan an rawn zawt ve mai tur zawk a ni a. Mi zawhna atanga zawhbelhna lo siam ve ringawt kha chu a thatchhiat thlak mai mai lawm ni zawk a.

Pu K. SANGTHUAMA : Pu Speaker, mi sawi atangin alawm thil chu min an hriat vek. Tin, chuloah mi eng angin nge a lo inrin kha kan hre dawn em ni? Zawhbelh pawh a duh ve ang a, pakhatin a duh ang a, pakhatin a duh ang a. Pakhat ringawt hawn kha chu a tlem lu deuh a ni. Tun term-ah hian a chang chuan pathum te, pali te i phal a. Chuvang chuan pakhat ringawt kha chu a tlem deuh a ni, a hrim hrimin Pu Speaker.

SPEAKER : Ngawi rawh aw ka'n sawifiah a nge. In zawhna reng reng hi a,b,c,d,e a thleng tawh a thenkhat chu. Khatah pawh khan a neitu khan a zawh leh khan 2,3,4 te an zawhbelh lehnghal a. Khami bak kha kan hawn leh chuan midang tan khan chance a awm tawh lo vang. In thiante ngaihtuah ve rawh u. Chuvang chuan a neitu kha tlawmngai deuh ula zawhna in zawhah hian a,b,c,d, a then pheii chu 'e' thlengin in zawt tawh a, a chiang thawkhat a ni. A then chu in hriat tawh reng pawh in zawt in zawt mai niin a lang a. Hemi chinah hian lungawi i tum hram ang u.

DEPUTY SPEAKER : Pu Speaker, a chhan hmain lawk.

Pu R.ROMAWIA, MINISTER : Pu Speaker, Speaker hmasa khan hemi chungchanga decision a siam dan principle kha, principle ama rilru a awm a tih ve deuh a ni a. Zawhna hi a tam thei ang ber a zawttu hian zawt ta sela. Zawhna pakhat ringawta kan chen rei lutuk hian a fel lo a, tiin zawhbelhna kha tihtlem ni sela. Tichuan, “ka zawhna a lo chhuak ve lo” ti a hetilaia Unstarred a lehsak ringawt mai lo dawn hi member-te tan a nuam love tih avanga khatia zawhna a kal chak a, zawhna tam zawk member-te, uluk taka an siamte chhan a nih theih nan tia Speaker hmasa khan khatianga a han tih deuh kha a ni a. Tuna kan Speaker kha chu i thu thu a ni, “zawhbelhna a awm thei lo” i tih pawhin i thu thua ka ngai.

DEPUTY SPEAKER : Kha kha ka sawi tum a ni a. I thu thu a ni a, i rorelna hnuaiiah House kaihhruai a ni a. Tichuan, hmannah panga i tih chu slip of tongue pawh lo ni se hmannah chuan panga i phal a, vawiinah chuan i phal tawh lo a ni mai, i thu thu a ni. Amaherawhchu, member-te an interest a nih erawh chuan member-te zalenna nek chep lutuk erawh kha chu a tha chuang lova. Tuna an sawi ang khan zawhna tam tak nikhatah a lo chhuak a, pakhatat ringawt zawhbelhna nen kan inbawk chuan a hnung a mite pawh an kian thiam tur a ni i tih kha a dik chiah a ni tih kha han sawi chhuah ka tum mai a ni e.

SPEAKER : Speaker pawhin a thuneihna hi tiang ang lo tak khan a hmang mai mai tur a ni bik lova, a dik thei ang bera hman kan tum ve tho a ni tih kha House-in min hriatpui ula. Ni lo pawh ni se, hei, hun kan la rei dawn a, Minister zahawm tak a chhang turin sawm tawh mai ang.

Pu JOHN ROTLUANGLIANA, MINISTER : Ni e, zawhbelhna tam sela pawh ka ti lo khawp mai a. Ration Card chungchang hi tunlai sawi a hlawh hle a, kan hotuten phal selang chuan press conference te pawh nei ve ila tih ka lo rilruk lai a ni a. Insawifiahna hun ka nei ve dawn a, lawmawm ka ti khawp mai. A hma zawng kha chuan chanchinbuah te leh Fakselnaah te pawh min bei nasa a, midum zinga nei te ber ang mai

in kan ngawi reng a ni. Tunah sawifiahna hun tur ka neih ve dawn avangin ka lawm khawp mai.

Ration Card quota chungchangah khan a zawhna neitu khan tuna Ration Card lo chhuak kha an pian kum leh thla te dik lo mahse mihring pakhtah kg 8 zel, puitling pawh naupang pawh pek an nih tawh avang khan an ration dawn tur kha a danglam chuang lovang. Tin, Ration Card engemaw vanga la chhuak ve lo an awm avang khan chungte pawh chu tunah hian order kan chhuah a, Ration Card lo nei tawh thin tuna nei lo palh, hmaih palh an awm a nih chuan chungte chu an ration chan tur ang kha lo pe vek ula, register-ah chhinchhiah ula, Ration Card siamsak an nih leh hunah kan regularise leh dawn nia tiin order kan chhuah nghe nghe a ni. Tin, tuna Ration Card dik lo awm zawng zawng hi a pawl kan ti a, hrehawm kan ti a, hei hi tidik leh vek turin order kan chhuah tawh a, a tul ang angin hma lo la ula kan ti a. DCSO tinah te leh Local Council hnenah lehkha kan thawn a, tichuan April thla chhung ngei hian Pu Speaker, siam that leh vek kan tum a ni.

Hemi AAY tih leh PHH kan tih te leh hemi a ration dawng pangngai chungchang hi tlema han sawifiah ka duh a. Pu Speaker, an zawhbelhna tel lo pawh khan chhanbelhna tur ka ngah mai. Engpawhnise, Food Security-a kan luh dawn hian a har em em lai chu central sorkarin nuai sarh leh sangruk leh tlem chauh min phalsak a. A household ni lovin a population-in, chu chu Mizoram population-ah sem rual a lo ngai a. Thenkhat chhungkuaah member pathum an awm a, a thenah panga, a thenah pasarih, churang chuan, sem rual ringawt pawh hi sawi aiin a har a. Tichuan, hemi kan han tih hnuah hian hemi nuai sarh leh sangruk hnuai hian AAY family hi singhnih leh tih an awm bawka ni. State dang zawng zawngah chuan Food Security chauh hian ration an lak tak avangin an buai ve lova. Kan ramah chuan mi zawng zawngin ration kan lo lak thin si avangin ngaihtuah tur a tam ta a.

Kan Chief Minister zahawm tak kaihhraina hnuaiah engtingge ration Food Security-in a cover ve loh te hi kan tih ang tih te kha ngaihtuah a ngai a. Tin, Food Security-ah pawh hian Food Security-in a rawn phal chin chu mipakhatin kg 5 chauh a ni. Chuvangin, kan sorkarin pawisa harsa chung chungin mimir pawhin ration kan lak loh chuan a fel love tiin tunah hian Food Security-in a a cover chin hnuaiah khan kg 5 Food Security-a an lak, kg-ah ₹ 3-a an lak bakah khan, kan state sorkarin kg 3, kg-ah ₹ 15 hisapin kan pe leh ta a. Tichuan, Food Security-a cover ho hian rate chi hnih an nei a, kg 5 kg-ah ₹ 3, kg 3 kg-ah ₹ 15 in an nei a ni. Tichuan, Food Security lo ho khan, Non Food Security-in a cover ho khan kg 8 kg-ah ₹ 15 in an la ve thei dawn a. Chutiang chuan kan sorkarin ruahmanna a siam a ni.

Tin, member zahawm tak Pu Ruatkima zawhnaah khan ration card chhut manah hian hemi Food Security hnuaiah hian nuai 75, ka hriatsual loh chuan min pe niin ka hria a. Ration Card hi 24,0000 siam tur a ni a. Ration Card hi kan Department atang chuan ₹ 10 zela khul tir an ni a. Amaherawhchu, Local Council thenkhatte leh VC thenkhatten 'kan insengso ve a, DCSO atang tein keimahniin kan la a, anmahni ration card buaipui nan hian Local Council te leh VC ten senso kan neih ve avangin mipuiaah ₹ 20 in khul ni rawh se' lo ti pawl an awm ve a. Chungte chu keini Food & Civil Supply Department chuan kan hriatpui lo a ni. V/C thenkhatah chuan ₹ 10 a khul tir an awm tho a ni. Keini Department atang chuan ₹ 10 a khul tir a ni.

Tin, ration card dik lo nasa em em hi a awmzia chu ration card data capture form hi kan sem chhuak vek a, chu chu Local Council leh VC ten lo sem lehchhawngin anmahni chhungkaw kalphung/awmdan kha an rawn fill up tur a ni. Mahse, thenkhatah chuan V/C ten sem lovin anmahnin lo fill up sak mai an awm a. Tin ration card chhuak lo kan tih te pawh kan han enquire a, khaw tam takah chuan mi thenkhatte tlang an au an au pawha ngaihsak lem lo, a hnuai ration lak dawn a ration card hluia rawn lak tum ve leh mai te pawh an awm a ni. Khatianga ration card an rawn fill up khan kum zat te kha an rawn fill up lova. A then chuan tunhmaa ration card-a an kum ang pangngai kha kum 20,

kum 30, kum 50, kum 70 an rawn ti ringawt a. Mahse, kha kha kan computer khan a blank-in a dah theih tawh loh avangin a ni leh thla an ziah loh khan automatic-in ni khat thla khatah khan a lo chhuak a. An kum kha an ziah loh pheii chuan YYYY khan a lo chhuak riangawt a ni. Tin, kum 70 te an rawn tih kha chuan computer khan kum 70 ni tur chuan kum 1943 ah khan a rawn pian tir mai a, a thla an ziah loh avang khan ni khat thla khat kha computer-in a rawn dah leh mai a ni.

Tin, chumi rual rual chuan food security ration card-ah hian household head of family hi hmeichhia dah tawh tur a nih avangin a hmasa berah hmeichhia, head of family-ah dah vek tur, hmeichhia upa ber kha an ti a. Tichuan, mi tam takin head of family-ah khan mipa te an la rawn dah a, relationship kha a buai a ni.

Entirnan, Head of Family-ah mipa kan nih chuan kan nupuia nu te kan awmpui khan kan relationship chu ‘mother in law’ a ni. Mahse, kan nu zawk hming a awm kha chuan a ni nena an relationship chu ‘mother’ a ni tawh a ni. Chuvang chuan, relationship pawh kha a lo buai ta a, chuan computer-ah khan kan operator-te khan an han siam fel a ‘others’ tih khan a lo chhuak ta mai a ni. Chutiang chu a dik lohna a ni a, tam takah hi chuan an fill up dik loh vanga dik lo a ni a. Tin, nu leh pa thi tih kha thenkhatah chuan a computer-ah hian ‘late’ kha a dah lo hrim hrim a. Tin, tam takah chuan ration card atang hian a bik takin nu ho khan an pasalte boral tawh kha thaibo phallo tlat te an awm ve a, chungte chu an rawn ziak lang tel baw a.

Tin, kan Chief Minister zahawm tak pawh khan a han sawi kha, hemi form hi tunah khan kan sawi dun a, an lo hmu reng reng lova, an lo fill up sak mai kha a ni. Tin, hemi form fill up chungchangah pawh hian Pu Speaker, ‘eizawna’ tihah pawh hian kan Chief Minister zahawm tak an rawn fill up sakah chuan ‘MLA’ tih a ni a. Mahse, kan computer-ah khan software hi INC hovin an rawn siam a ni a. (Dr. K.BEICHHUA: Pu Speaker, khawngaihni kan zawhna point te kha min chhang fiah phawt mai se). Zawh belhna kha chhan belhnain ka chhang ve a ni Pu Speaker.

Engpawhnisela Pu Speaker, heng ration card kan tih hi a diklo a awm tih kan hria, a pawl kan ti a. Ka sawi tak ang khan tunah hian transitional period ah kan awm a, kan in let chho mek a, ration card te kan siam thar a. End to end computerization kan ti a, chutiang chuan hma kan lak avangin Pu Speaker, a dik thlap lo tih pawh kan hria a ni, a pawl kan ti a. Mahse ka sawi tawh ang khan ti dik leh vek turin hma kan la a. April thla chhunga tidik leh vek turin Pu Speaker, hma kan la a ni. Vawiina hetiang sawifiahna hun tha tak mai chhan belhna ka nei hi ka lawm khawp mai, ka lawm e.

Dr. K. BEICHHUA : Pu Speaker, ka zawhbelhna kha min chhang chiang lo tlat mai a. A statistics kha a rintlak ang em? Siam that a ngai ang em tih kha min chhang lova. Tin, statistics kha lo rintlak lo ta se engtingge 'Food Security-a ration card dik loh avangin lo pe phawt ula, register-ah lo register ula, nakinah a chhuah hunah kan ring mai dawn nia,' kan tih kha statistics nen a inmil si loh chuan khalai kha kan va buai awm ve tih kha ka zawhna a ni.

SPEAKER : Minister-in chhang lawk se.

Pu JOHN ROTLUANGLIANA, MINISTER : Pu Speaker, kan ramah hian kan statistics hi a inang lova, a dik lova. Kan BPL neih dan te pawh hi RD Department BPL neih dan leh Supply Department BPL neih dan te pawh a inang chuang lova. Kan Agriculture lamin an buh thar hi ei vek ni ila chuan Supply Department hi a din pawh a ngai lovang tih tur khawpin an thar tam a. Chutiang chuan kan statistics hi a dik lo ve bawk a ni, zep thu a awm lo. Tul lo te pawh an ti ve bawk ruling lampang chuan. Mahsela a nihna ang kha Pu Speaker, ka sawi ve mai a ni. (Pu LALRUATKIMA : Pu Speaker, kha kha a dik a nih chuan kan Agriculture Minister khan a sawi fiah a ngai lo maw, kha ti zo zai a nih kha chuan) A chan lam a ni a, anin a la rawn sawifiah ve leh mai ang chu. Engpawhnisela, kan statistics hi tam tak a dik lova. Engpawhnise, heta ration card-ah hi chuan a statistics dik leh dik lo kha chuti takin a va awm chuang lo. Heta Food Security-in a cover loh tur zawng zawng pawh kha kan pek vek tho dawn

avangin. Chuvangin a khawi zawkah khan nge an awm dawn tih kha Selection Committee khawtinah an awm a, an rawn enfiah ang a, an lak tur ang chu an la ang a, nakinah an ration card dawn tur ang nen kan regularize mai dawn a ni.

SPEAKER : Awle, kha hun a kal teuh mai dawn a sin. Nangmahni a zawhna neitute in ni a. Nangmahni leh nangmahni in inhrem mai dawn a, in hnial tlat chuan. Tunah chuan zawhna no.22-naah kan kal ang a. A zawhna neitu MLA zahawm tak Pu P.C. Zoram Sangliana lo sawm ila zawt turin.

Pu P.C. ZORAM SANGLIANA : Pu Speaker, Starred Question 22-na, Taxation Minister zahawm takin min chhan tura ka zawhna chu-

- a) Mizoramah District Taxation Officer/Assistant Commissioner-in a awp loh/thuneihna a neih loh Commissioner Officer/Directorate in a awp/thuneih tlat check gate a awm em?
- b) A awm chuan khawi check gate nge?
- c) Engvang nge tih ka zawt e.

SPEAKER : Department neitu Minister zahawm tak Pu Lalsawta sawm ila.

Pu LALSAWTA, MINISTER : Pu Speaker, member zahawm tak Pu P.C.Zoram Sangliana zawhna chhanna-

- a) Commissioner/Directorate-in a awp Check-gate 3 (pathum) a awm.
- b) Hengte hi Commissionerate of Taxes-in a awp check-gate te chu an ni :
 - 1) Vairengte Taxation Check-gate, Vairengte.
 - 2) Zemabawk Taxation Check-gate, Zemabawk.
 - 3) Lengpui Airport Taxation Check-gate, Lengpui.
- c) Check-gate function leh inrelbawl hi a hautakin a sensitive em em a. Chuvangin, Head of Office atanga enkawl hna hi engemaw chen tal a tula hriat a nih

avangin a theih chin chinah a chung a tarlan Check-gate 3 (pathum) te khi Commissionerate of Taxes-in a enkawl a ni tih a ni e.

SPEAKER : Zawhbelhna a awm em? A neitu i sawm ang.

Pu P.C.ZORAM SANGLIANA : Pu Speaker, ka hriatsual loh chuan Zemabawk leh Lengpui Airport-te hi chu Commissioner-in a awp loh District chhung ami a ni a, helai Aizawl atanga enkawl mai. Zemabawk te pheih chu Aizawl khawpui chhung ami a ni a, Lengpui pawh chutiingin Aizawl khawpui veng pakhat ang a ni tawh a. Vairengte vawiin thlenga a la tihna chhan zawk hi a hautak vang te, a sensitive avang te ni lovin, tunhmain Vairengte leh Kolasib-ah hian Inspector ve vein Check-gate hi an enkawl thin a. Vawiinah Kolasib District hmunpui a lo nih tak a Assistant Commissioner-in khulai an thutchilh tak hnuah hian Department lam hian Vairengte kha a hautak leh a sensitive vang ni lovin Assistant Commissioner hnenah khan he thuneihna hi a la pe lo mai a ni lo maw. Tin, a district ang pawhin he thil hi a anglo khawp a.

Officer-te leh a thawktute ai mahin a mipuite hian an ngai thiamlo zawk a. Chuvang chuan, he thil hi kan NGO hrang hrangte leh helai kan district huamchhunga mipuiten an ngaihpawimawh em avangin he thil hi han zawt pawh ka ni a. Chuvangin Zemabawk leh Lengpui Airport check-gate te ang ni lovin District Headquarter Kolasib Assistant Commissioner thuthmunah khuan hemi hi Aizawl atanga enkawl lovin Assistant Commissioner Office atanga enkawl tawh tura order chhuah a tih mai theih a ni tawh lo maw tih hi ka zawhna a ni e.

SPEAKER : Zawhbelhna tehchiam pawh a nilova i hrilhfiyah zawk a, mahse, a chhang thei tho ang a. Midang zawhbelhna siam duh kan awm em? Kan awm loh chuan Minister zahawm tak chhang turin i sawm ang.

Pu LALSAWTA, MINISTER : Pu Speaker, a zawttu member zahawm takin a zawhbelhna kha “ Engatinge Vairengte bik hi hla viau si a Aizawl atanga awp a ngaih” tih angah a ngaih theihin ka hria a. A chhan chu hetiang hian sawi ta ila, kawng kan neihah hian sorkar-in a approve leh a kalpui pangngai kan neih leh kan hman tam ber chu Vairengte khu a ni mai a, kawng dang vak kan nei lova. Thil chi tinreng kan chawk luhna a ni a, lun pawh a lun a. Tin, khulaia awmte khuan Aizawla awp nih hi an duh a, a chhan chu thil tithei tak tak, tute hming hming emaw han lam mai, mahse, Aizawl atanga finfiah a thu dik lo ni lem lo te a awm ve thei a. Chuvangin khulai check gate Aizawl atanga awp tlat hi chu tuna kan kalphungah chuan kan tih reng hi ka ring a, kan tih reng hi a tha bawk a. Thil tha a nih avangin kan tih reng zui ka ring a.

Khu lampang an rintlak loh leh anmahni kan rin zawh loh vang ni lovin anmahni pawh khuan thu lian leh hnawk thei tam tak, a chang chuan, gun running kan tih, silai phura kal lo check ngaih changte a awm a. Chutiangte ngaihtuahin, Taxation, sumdawnna piahlahmah hian ngaihtuah tur tam tak, law & order problem-te leh Mizoram atanga tlanche tur thlengin, khangah khan pawimawhna bik a neih avangin khulai khu chu tun ang hian kan ti a, tihzawm zel pawh kan tum ka ring.

Pu P.C. ZORAM SANGLIANA : Pu Speaker, a zawhbelh leh theih em? (SPEAKER : Zawt thei e) Pu Speaker, chutianga law & order thil hial pawh tula helai check gate hi awm a nih chuan Vairengte khawchhunga check gate hrang hrangte khu hmunkhatah emaw tikhawm tumna a awm em?

SPEAKER : Minister-in chhang se.

Pu LALSAWTA, MINISTER : Pu Speaker, zawhbelhna kha Taxation chauhin kan tih theih mai chi a ni lova. Sorkarin Department hrang hrangte ngaihtuah a, hetiang hi multi-purpose-a kan tih dawn avangin tikhawm teh ang ti ang deuh hleka tihna hi tunhma khan vawi tam tak ngaihtuah a ni tawh thin a. Amaherawhchu, a hmunhmain a

zawh tawk loh vangte pawh a ni ang a, kan tum ang tak hi chuan kan ti hleithei lova. Member zahawm takin a rawn zawhna hi thahnem ngaih vang niin ka hria a churang chuan, tuna mi pawh, hei kan House Leader a awm a, anin tul a tih chuan Department hrang hrangte ko khawmin engnge kan tih theih dan tur kawng tih te pawh ala ngaihtuah duh mai thei a. Engpawhnise, tuna kan awm danah chuan Taxation atang ringawt chuan chutianga han tih theih mai bik kha a ni lo a ni.

SPEAKER : Zawhna dangah kan kal thei e. Zawhna no. 23-na zawhna neitu MLA zahawmtak, Pu Lalruatkima, zawt turin i sawm ang.

Pu LALRUATKIMA : Pu Speaker, Starred Question No. 23-na Environment & Forests Department changtu Minister zahawmtak chhan atan :-

- a) Advanced Research Centre for Bamboo and Rattan(ARCBR)-ah hian Director nghet engtik atang khan nge an awm tawh loh?
- b) Director post ngheta dah tumna a awm em? Ram leilung fa atangin ARCBR Director nghet hi dah ve theih a ni em?

SPEAKER : Department neitu Minister zahawm tak Pu Lalrinmawia Ralte i sawm ang.

Pu LALRINMAWIA RALTE, MINISTER : Aizawl West-II bialtu MLA zahawm tak, Pu Lalruatkima Starred Question No. 23-na chhanna chu hetiang hi a ni :-

- a) Advanced Research Centre for Bamboo and Rattan (ARCBR) hi Central Sorkar a Indian Council of Forestry Research & Education (ICFRE) hnuai unit pakhat Rain Forest Research Institute, Jorhat hnuai a awm a ni a, engtik chiah atang khan nge Director hi a awm tawh loh tih hi keini State Forest Office lam atang hian kan hriatpui Chiang thei chiah lo a ni.

b) ARCBR hi Rain Forest Institute, Jorhat hnuaia ami a nih avangin Director post nghet dah tumna a awm leh awm loh pawh hi kan hriatpui thei chiah lova. Amaherawhchu, ARCBR hnuaia ram leilung fa a remchan dan ang leh a theih ang anga dah nghet turin dilna pawh thuneitute hnenah Environment & Forests Department hian a lo thlen ve fo tawh a ni tih kha chhanna a ni e.

SPEAKER : Zawhbelhna, a neitu, Pu Lalruatkima.

Pu LALRUATKIMA : Pu Speaker, helai ICFRE hnuaia awm a ni a, amaherawhchu, anni khan advertisement ni 5 January, 2013 khan an tichhuak a. Chutah chuan Mizoram Forests Service Association-te pawhin NOC kan sorkarah te pawh an dil a, an service atang khan dil thei an awm avangin an dil a. Kha kha engatinge vawiin thlenga NOC pek ala nih loh? NOC pek ni ta se chuan khulaiah Research Centre a nihna angin, mau kan ngaipawimawh bawh a, kan sorkar ngei pawh hian, hmasawna tamtak ram leilung fate, a thawk mekte pawn an dawng thei a. Chuvang chuan, helaiah diltu an awm a, ICFRE lam pawn NOC an rawn pek theih chuanin, hei hi chu Mizoram Forests Service Association atang khianin kan lo pe thei mai ang tih tawngkam, Association lam atangte pawn kan dawng a. Chuvang chuan, engatinge NOC hi deputation-a kal tura pek kan harsat tlat chhan hi tih ka zawt a ni.

SPEAKER : Minister zahawmtak chhang turin i sawm ang.

Pu LALRINMAWIA RALTE, MINISTER : Pu Speaker, deputation-a kal tur hian kan State Forests Service Officer-te hi tirh theih an ni a. Dehradun-ah, a hmunpui lamah khuan, tunah hian kan State Forests Service Officer pakhat hi kan lo kal tir hlimhlawt a ni a. Kan hre theuh lo mai thei a, State Forests Service Officer-ah hian indaih lohna a nasa em em a. Hetia ICFRE-in advertisement an chhuah khan kan Forests Officer pakhat hian a lo zuk chhang ve tawp mai a, kha kha Service Rules kalmang hre tan chuan thil tih loh tawp tur a ni a, thil pawt tak ni thei a ni nghe nghe a.

Amaherawhchu, tuna zawhbelhna a kan hriat tak ang khan, tunah hian chutiang chu an rawn sawm leh a, proper channel a lo kalin, tunah hian dilpuina pawh Association atangte pawhin kan hmu a ni. Service chungchang a ni a, amaherawhchu, he House zahawm takah hian member zahawm tak ten an zawh chuan kan chhang lo thei lova. He file hi thil rei tak a la ni lem lova. Dik tak chuan ka hnena lo lut hi kei pawn nikhat pumhlum pawh ka la kawl chiah lovin ka hria a. Tunah ka hnenah a awm mek a, kan hotute nen kan thlir lai mek a ni a. Kan indaih lo hle mai a, harsa chu kan ti, kan Department lam atang hi chuan. Amaherawhchu, anmahni service lam atangte pawn induhsakna te, thiante han inngen puina te pawh a awm ve a, kan hrethiam em em a, kan hotute pawn an hrethiam em em a. Kha kha Government a lo thlen hian pending han tih hman pawh hi a ni chiah lova, tun Session lai hian a ni nghe nghe a, ni khat pawh kan la en hman chiah lo a ni, Pu Speaker. Kha kha a dinhmun a ni a. Kan hotute nen kan han sawi ang a, he deputation hi remtih hlauh pawh thil awm thei dinhmunah tunah hian a ding mek a ni tih hi ka chhanna a ni e.

SPEAKER : Zawhna dangah kan kal thei. Zawhna No. 24-na, a neitu, MLA zahawm tak, Pu Chalrosanga Ralte zawt turin i sawm ang.

Pu CHALROSANGA RALTE : Pu Speaker, ka lawm e. Starred Question No. 24-na, Public Health Engineering Department-a kan Minister zahawm tak ka zawhna chu :-

- a) Buarpui leh a chhehvel kuate chawm turin Lungphun lui tui lak tumna a awm em?
- b) Awm ta se, eng chen nge kan thlen tawh?

Pu Speaker, helai hi “a thlen tawh” tih zawk tur ni awm tak a ni. Pu Speaker, ka lawm e.

SPEAKER : A tum chu a inang reng e. Minister, Department neitu Pu Zodintluanga i sawm ang.

Pu ZODINTLUANGA, MINISTER : Pu Speaker, i phalnain zawhna ka chhan hmawin tawh te han sawi duh ka nei a. Kan sorkar hmasa Pu Lal Thanhawla kaihhruai, kan Chief Minister zahawm tak leh kan P.H.E. Minister zahawm tak Pu S. Hiato te thahnemngaihna leh hmalaknain nizan khan Saitual Greater Water Supply Scheme hi diesel engine chuan tui pump chhuah tawh a ni a. P&E Department te nen theihtawp chhuahin nizan atang khan electric pawhin tui an pump chhuak tawh a ni tih ka rawn sawi duh a.

Tin, a pahnhna ah chuan Saiha Water Supply Scheme hi harsatna tam tak kan nei a, a kalna tur pipe line chhungkaw thenkhat ten an phal leh loh avangin pipe line hran te laih a ngai a. Chutianga harsatna kan tawh hnuah nizan dar 8:20 khan Saiha khawpuiah pawh tui an pump lut ta a ni tih kha ka rawn sawi duh nghal bawh a ni.

Pu Speaker, Starred Question No. 24-na member zahawm tak Pu Chalrosanga Ralte zawhna chhanna chu –

- a) Buarpu khua chawm turin Lungphun lui tui hi pumping scheme-a lak tum a ni tih a ni a.
- b) Buarpu Water Supply Scheme (Pumping) hi Project Report siam tawh a ni a. North Eastern Council (NEC) ah submit tawh a ni tih a ni e.

SPEAKER : Zawhbelhna a awm em ? Aw, Pu Lalruatkima.

Pu LALRUATKIMA : Pu Speaker, kan Minister zahawm tak khan a chhang thei tho vang a. Hei P.H.E. dang a awm rualin a in relevant thovin ka ring a. Tunah hian Engineer-in-Chief hi temporary-in charge lak tir a ni a. Hei hi kawp tir reng tur nge ni a, eng chen nge kawp tir tur a nih chuan a kawp dawn

tih hi kan Minister zahawm tak khan min chhang thei turah ka ngai a ka'n zawt tel a ni.

SPEAKER : Buarpui nen a inhlat viau nain a chhan theih chuan chhang tho se.

Pu ZODINTLUANGA, MINISTER : Pu Speaker, kan Engineer-in-Chief kal ta kha Secretary-in a promotion a. Tuna kan Engineer-in-Chief hi temporary ni lovin a post pangngai Engineer-in-Chief post-a lut a ni e.

SPEAKER : Zawhna 25-naah kan kal thei ta a, a zawhna neitu Er Lalrinawma, MLA zahawm takin zawt se.

Er. LALRINAWMA : Pu Speaker ka lawm e. PHE changtu Minister zahawm tak hnena ka Starred Question No. 25-na :-

- a) Tun dinhmunah SIPMIU hnuaiah bawlhhlawh bawm engzat nge sem a nih tawh ? Bawlhhlawh bawm pakhat hi cheng engzat man nge a nih?
- b) A pumpui thu ah cheng engzat man nge sem a nih? Ka lawm e.

Pu ZODINTLUANGA, MINISTER : Pu Speaker, member zahawm tak Er. Lalrinawma zawhna Starred Question No. 25-na, SIPMIU chungchang hi Urban Development subject a ni a, PHE hnuai a ni lova. Amaherawhchu, Urban Development changtu ka nihna angin chhang turin ka rawn inbuatsaih a. Starred Question No. 25-na chhanna chu :-

- a) 25th February, 2016 thlenga bawlhhlawh bawm sem tawh zat chu 1,23,950 niin chhungkaw 61975 hnenah pahnih zela sem a ni. Bawlhhlawh bawm pakhat man hi ₹ 186.86 a ni.
- b) ₹ 2,31,61,279 man sem tawh a ni.

Pu Speaker, nichina ka sawi tawh ang khan Urban Development subject a nih avangin thui deuhin ka'n sawifiah nghal ang e, kha kha zawhna a ni mai a. Aizawl Solid Water Resource Management hi 11th November, 2014 khan Ministry of Urban Development, Govt. of India, CPHE aiawhin approval kan hmu a. DPR proposal hi Ministry of Urban Development hnena thehluhah chuan dustbin hi Aizawl khawpui chung Ward 19, veng 82 (DPR kan siam lai khan Local Council 82 a awm a, tunah chuan Local Council 83 a awm tawh a) chhungkaw 66094 hnenah bawm pahnih theuh litre 20 dawng turin proposal kan siam a ni. Aizawl khawpui chhunga mihring cheng zat hi kum 2011 census khan 293416 a ni a. Aizawl Solid Water Management Project hi kum 2015 Tuikum atanga tan tura ruahman a nih avangin population projection hi mihring 319837 awm anga chhut chhuakin chhungkaw awm zat tur pawh hi 66094 in projection nen kan chhut lawk a ni.

Chutichuan, Govt. of India khan kan DPR a approve-naah khan dustbin litre 20 kan tih hi litre 10 pahniha sem turin min rawn cut down sak ta tlat mai a. Bawlhhlawh bawm te hi bawm hnih theuha sem tur, kan DPR ah chuan litre 10 ve vea litre 20 kha a ni a. Govt. of India khan litre 10 hi a tawk an ti a. Chutiang chuan litre 10 hi min rawn bituk sak ta a ni, tuna kan sem te hi. Kan bawlhhlawh lakkhawmna hi tunah hian LDB te nena tang kawpa tih a nih avangin nitina sem a tawih thei leh tawih thei lo ti a inthlak tur a ni a.

Tunah hian khatiang phur tur motor leina tur pawh hi a indawt zela tih a nih avangin a motor phurhna tur pawh hi tunah quotation te kan ko mek a ni. Kan design na hi 2015 a ni a, Aizawl khawpui bawlhhlawh hi nitin ton 159.88 niin kan chhut a. Mihring hi 319837 awm tura projection hi siam a ni. Mihring pakhatin gram 495 bawlhhlawh tichhuak ziah anga ngaih kan ni. Chhungkaw khat hian nitin kg. 2.395 bawlhhlawh nei ziah angin kan chhut chhuak a ni.

Tin, dustbin hi a DPR sanction kan hmuh chu dustbin pakhat man central-in DPR min rawn sanction-na chu ₹ 212.82 a ni a. Dustbin pakhat tuna an rawn supply-na chu ₹ 186.86 a ni. Kan sanctioned amount kha ₹ 212.82 a ni a, supply kan pekna chu ₹ 186.86 a ni. Tin, he dustbin hi national competitive bidding a nih angin.

India ram chhunga supplier leh manufacturer te tan tender hi koh niin national leh local newspaper-ah te tihchhuah a nih bakah SIPMIU website leh India ram chhunga government zawng zawng tihchhuahna website-ah te tihchhuah vek a ni a. Tender chhangtu mi 5 zingah Ms. Milkamal Ltd. Mumbai, Maharastra chuan supplier hna hi ADB leh MoUD pawmpuinain an hmu a ni tih kha ka'n sawi tel leh duh a ni, Pu Speaker.

SPEAKER : Department i zawh dik loh avang khan supplement pawh awm tur a ni lova, mahse Minister-in a chhang thei tho a, vanneihthlakah ngai ila.

Zawhna No. 26-naah kal ila, zawhna neitu Pu K. Sangthuama, MLA zahawm tak zawt turin i sawm ang.

Pu K. SANGTHUAMA : Pu Speaker, ka lawm e. Ka Starred Question No.26-na, PHE Minister zahawm tak chhan atan 'Sakawrtuichhun-ah chhungkaw engzatnge tui connection nei tawh tih hi ka zawt e'.

Pu ZODINTLUANGA, MINISTER : Pu Speaker, member zahawm tak Pu K. Sangthuama zawhna Starred Question No.26-na chhanna chu, Sakawrtuichhun-ah hian March ni 3, 2016 thleng khan private house water connection 92 pek tawh a ni.

Pu K. SANGTHUAMA : Pu Speaker, 92 a ti a, 93 niin kan lo chhinchhiah a, kha kha chu inangah ngai ta ila. Heng la pek loh chhungkaw 232 la awmte hi connection pek ve thuai theih an ni ang em tih ka zawhbelhna a ni a.

Pahnihna ah chuan tanky-ah tui a len tam loh avangin tanky-ah karkhatah vawihnih dah theih a ni ang em tih kha ka zawhna pahnihna a ni a. Hemi awmzia chu tui tanky khu a len vak loh avangin kar khatah vawikhat chauh an dah thla thin a. Kha khan tui sem tur hi a daih thin lova. Kar khatah vawihnih hi dah sak theih chuan an ziaawm mai dawnin ka hria a. Vawihnih min dah sak thei angem tih ka'n zawt e.

Pu ZODINTLUANGA, MINISTER : Pu Speaker, member zahawm tak zawhbelhna kha tui connection la hmu lote hi theihtawpa pekchhuah tum mek zel a ni a. Sakawrtuichhun bik pheih chu nichina kan han sawi tak SIPMIU ADB funding atang khan Trench II-ah tuizem lian siamna tur atana tih a ni a, tunah khuan an tuizem neih khu litre 150000 chauh a ni a, a hmaa awmsa kha tihchhiat a ni a. Tunah hian earth work kan thawk tan mek a, litre 300000 dawng tur kan dah belh mek a ni. Chutiang chuan hma lak mek a ni a.

A zawhbelhna pahnihna, kar khata tui vawihnih pek tih kha, hei hi kan harsa khawp mai a. Kan distribution line hi a hlui tawh a, kum 20, 30 dawn kal tawh atanga hman kha a ni. Mipui a let tam takin kan pung tawh si a. Chuvang chuan tunah hian Asian Development Bank atangin sanction te kan hmu tawh a. A contractor turte pawh thlan fel an ni tawh a, Aizawl khawpui chhung distribution line thlak thar vekna turin.

Example ka'n sawi duh chu SIPMIU hnuaiah 7th Day tlangah khuan tanky lian deuh mai kan nei a. Khu khu khat tur chuan tuna kan distribution network-ah hian darkar 36 kan hawn char charin a khat thei chauh a ni. Tunah hian distribution line thar kan buaipui mek, 7th Day tlang chhak lam leh Aizawl lam atang chuan kan peih tawh a.

A inzawmna tur a pressure sang lai khu pipe tha chi a lo la thlen loh avangin kan la zo thei lo a ni. Khu khu kan zawh chuan 7th Day tlang khu darkar 3 lekah a khat thei tawh dawn a ni. Kan vannei a, PHE te, P & E te, mipui tana an thawhna rah avangin Aizawlah hian tui kan pump chhoh ang ang hi a sem chhung a rei a. A chang chuan tui pump te pawh off chang kan nei tawh thin a.

Nichina kan sawi, kan harsatna ber chu a distribution line, tui hi eng ang pawn pump tam mah ila, a sem chhuahna line hi a la hlui avangin duh angin kan sem tam thei lova. Chung chu kan ti dawn mek a, tunah hian Luangmual tanky khu kan thlunzawm tawh a, khami distribution line tur khan, chutichuan Sakawrtuichhun pawh hi a rang thei ang bera ti turin hma lak mek a ni e, Pu Speaker, ka lawm e.

Pu K. SANGTHUAMA : A in connect tho a, ka zawhna hi a thleng pha dawnin ka hre lova. Chuvangin thil pawimawh deuh mai a ni a, Pu Speaker. Bilkhawthlirah hian tui (water) connection an pek dawnin advance pek a ngai tiin an sawi a. Bilkhawthlirah hian thla 6 chhung bill advance-a pek tur an ti a. A dik reng em tih kha a hre thoin ka ring a. A dawt lehah chuan Vairengte-ah hian tui bill a sang em em a, helaiah phei chuan ₹ 5679 a ni a, hei aia hniam deuh te a awm a. Hei hi engvang nge a san bik em em tih kha ka'n zawt leh a ni e.

SPEAKER : Kan peng thui em mai, mahse Minister-in a chhang thei tho em?

Pu ZODINTLUANG, MINISTER : Pu Speaker, Bilkhawthlir tui kha advance-a pek a ngai lova. Public water point-ah hian thla tin ₹ 20 chawi tur a ni a, chu chu department-in a hlawmin thla 6 atan pek phalna kan pe a ni. Mandatory a ni lo a, thlatina ₹ 20 te pek ai khan advance-in thla 6 hi pek theih mai a ni kan ti mai a ni a. Kha kha Village Council te nena a awlsam zawk nan. Chuvangin advance pek kha compulsory a ni lo tih kha ka'n sawi duh a ni. A duh tan thla 6 kha an pe advance thei tihna a ni zawk a ni.

Tichuan, Vairengte tui bill sang tih kha Pu Speaker, a san hun lai kha Krismas vuak vet lai kha a ni a. Kan department officer te Aizawl leh hmun tinah an tang em em a, Krismas leh kumthar nuam taka an hman theih nan, tui an neih that loh chuan an hmang thei dawn si lova, hmun tinah an tang a. Vairengteah pawh tui an pump chho nasa em em mai a. Mipuiin tui an hmang nasa a, an tui metre kha a tam a, chuvangin Vairengte-ah chuan December bik tui bill kha a tam a ni. January bill te kan han en leh a, January-ah chuan a tlem leh vek tawh. Tui kan pump chhuah kha a tam em em a, nichina ka sawi ang khan Aizawlah Lungleiah, hmun tinah Krismas leh kum thar nuam taka an hman theihna turin department tan vang, department-in tui a pek tam avanga tui bill kha sang a ni, Pu Speaker.

Pu K. SANGTHUAMA : Khawngaih, inhrilhfiah deuh a ngai. In hrilhfiah loh chuan sorkar kha a hmingchhe mai dawn a. Thenkhatin chuti zat tax ngah rawh u, an ti a chuti zat khawn rawh u, an tih vang a ni te an lo ti a. Khatiang khan hrilhfiah fe a ngai thin a. Chuvangin hetiang laiah hian fimkhur a ngai hlein ka hria a. Advance tih pawh kha hrilhfiah ta ula a that ka ring a. Private connection, house connection lak dawnah khan thla 6 bill pek a ngai tiin an sawi mai a. Chungte chu a dik lo a nih chuan chiang takin a thawktute hnenah hrilh chiang ula. Tichuan mipui khan hrechiang se a tha ang.

SPEAKER : Awle, rawtna a ni a, a lawmawm e. Zawnha No. 27-naah kan kal thei ang a. Zawnha neitu Pi Vanlalawmpuii Chawngthu. Hei, 'pi' kan tih hi inzahna a ni tih kha hria ila, thil dang a ni lo. Zawt turin sawm ang.

Pi VANLALAWMPUII CHAWNGTHU : Pu Speaker, ka lawm e. Ka zawnha PHE Department minister zahawm tak chhan atan, ka Starred Question No. 27 na, 'Keitum PHE tanky hi a thar pek theih a ni em tih a ni e.

Pu ZODINTLUANGA, MINISTER : Pu Speaker, member zahawm tak Pi Vanlalawmpuii Chawngthu Starred Question No. 27-na chhanna chu, 'Aw, ni e', tih a ni a.

Ka'n sawi belh ang a. Keitum khaw tan hian kum 1982 khan tui dahkhawl na hi litre 65000 dawng siam a ni tawh a. Hei hi a rei tawh a, a tha tawh lova, tui pawh a dahkhawl hleih theih tawh lohva. He tanky siam tur hian reservoir dang siam tum mek a ni a. Chumi siam tumna tur atan chuan sum te pawh a theih ang ang atanga dap mek a ni tih kha ka chhanna a ni e.

SPEAKER : Zawhbelhna a awm lova, a lawmawm e, a chiang tawk a ni. Zawhna 28-na, zawhna neitu Dr. K. Beichhua, MLA zahawm tak zawt turin sawm ang.

Dr. K. BEICHHUA : Pu Speaker, ka lawm e. Higher & Technical Education Department changtu minister zahawm tak hnena ka zawhna chu.

- a) Mizoram sorkar hian technical zirlaite hnenah stipend leh book grant a pe zel em?
- b) Pe zel ta se, mi engzat hnenah nge a pek?
- c) Kum khatah cheng engzatnge a pek tih ka zawt e.

Pu R. ROMAWIA, MINISTER : Pu Speaker, MLA zahawm tak Dr. K. Beichhua zawhna chhanna chu :-

- a) 2012 atangin technical zirlaite hnenah stipend leh book grant pek a ni tawh lo.

SPEAKER : Zawhbelhna a awm em ?

Dr. K. BEICHHUA : Pu Speaker, engvanga pek tak loh nge an nih tih kha ka zawhbelh a ni e.

Pu R. ROMAWIA, MINISTER : Pu Speaker, 2012 August ni 21- ah khan Council of Ministers meeting chuan technical leh professional zirlaite hnenah stipend te, book grant te a lo pek thin chu sum lam harsatna avangin pek chhunzawm tawh loh ni se tiin a rel a. Chuvang chuan pek chhunzawm theih a ni lova. Chutih rualin heng zirlaite hi Ministry of

Tribal Affairs te, Minority Affairs te atanga Scholarship-te leh NEC stipend te dil tawh tura hriattir an ni a. Hemi hriattirna pawh hi Higher & Technical Education Department hmingin tihchhuah a ni a, chutiang chuan tunah pawh hian an dil mek ni a hriat a ni.

SPEAKER : Pu Ngurdingliana.

Dr. NGURDINGLIANA : Pu Speaker, ka lawm e. He ka zawhna hi ka thehluh tlai avangin admit a ni lova. Unstarred group-ah khan min telh hram turah ka'n ruat lain an rawn telh ta si lova ka'n zawt mai ang e. Kan Minister zahawm tak Higher & Technical changtu chhan atan -

- a) Mizoram Government Colleges-a Principal nghet hi engtikah nge lak an nih theih ang?
- b) Mizoram Government Colleges-ah hian Lecturer / Assistant Professor post hnawh khah loh post engzah nge awm? Sorkar hian hnawh khah tumna a nei em?
- c) RUSA, Mizoram State hnuaiah kum kal mekah College hrang hrang sum engzat nge tanpuina pek an nih tih leh a tawpna hei chu an hming ka zawt lo ang a, a number chauh ka zawt e
- d) Higher Education Department hnuaiah Doctorate Degree engzatnge awm?

SPEAKER : Aw, stipend te nen khan a inhlath deuh a, a chhang thei tho em Minister zahawm tak khan?

Dr. K. BEICHHUA : Pu Speaker, helam atanga ka zawhna chu Council of Ministers tih kha State Council of Ministers nge, Cabinet nge, State hrang hrang tih ka zawt a. Tribal Affairs leh Minority atanga tih theih a la nih chuan kan sum dinhmun te pawh a tha deuh tawh a. Heng technical zirte hi chu line dang nen tehkhin theih an ni lova. An mamawh tam tak te a lo awm ta a, harsa te te a zir te an lo awm ang a, engatinge kan sorkar zahawm tak hian hetiang thil hi chu political commitment-ah a inngat a ni a. Chhonzawm theih dan a ngaihtuah mai lawm ni tih kha ka zawhbelhna a ni.

Pu LALRUATKIMA : Pu Speaker, khawngaihin point khat lek (SPEAKER : In zawt anga hun a tawp mai dawn asin). Ram dangah kan zirlai tam tak technical zir turin an awm tawh a. An kal mek laiin Scholarship/Stipend ang chi kha tihtawp a ni a, harsatna lian tak an tawh a. Heng ang te pawh kha tun kan dinhmunah chuan pek zawm leh theih dan a awm lawm ni, ngaihtuahna kan hmang thei lawm ni tih kha ngenna ka'n siam duh a ni.

SPEAKER : Ngenna a nih chu. Minister zahawm tak i chhan tir ang, hun a tawp tep khi.

Pu R. ROMAWIA, MINISTER : Pu Speaker, hun chu a tawp deuh tawh tho a. Kha a zawhna neitute khan thahnem an ngai hle a.

Council of Minister kan han tih hi chu Cabinet a ni deuh ber a State-ah, Central lamin min rel sak phak chi thil pawh a ni lova. Chuvang chuan hriatthiam mai turah ka ngai a.

Tin, zawhna kan han sawi chungchangah scholarship chauh piah lamah pawh heng hi dil theih tho a nih avang hian dil tura thurawn pek a ni a. Tin, keimahni lam erawh chu a tlachawpin kan sum lam dinhmun ten a zir a nih chuan kan sorkar hian a ngaihsak em em reng tho a ni.

Tin, zawhbelhna dang kha chu a figure-te kha a awm tam deuh a, khang kha chu kan chhang thei mai lovang a. Heng ang a zawhnaah khan vacant post hi kan ngah viau a. General Degree course-ah hian vacant post 107 kan nei a. Tin, department pumpuiah hian hna ruak hnawhkhah loh 127 kan nei a. Tin, Ph.D Degree nei hi regular-ah 115 kan nei a, contract-ah 6 kan nei a, part time ah 9 kan nei a, a zavaiin Ph.D Degree nei hi 130 a ni a. Tin, Principal nghet nei tur hian chak taka hmalak mek a ni a, tunah chumi hmalak zelna chu kan Finance Department-ah a la awm mek a, an remtihna kan hmuh hun hunah kan ti chhonzawm thei dawn a ni.

Tin, RUSA hnuaiia College tin te hnenah hian infrastructure development bik atan hian nuai 84 theuh RUSA atangin kan hmu tawh a ni. Ka lawm e.

SPEAKER : Awle, zawhna hun a tawp a. Member zahawm tak pathumin he House-a awm loh phalna an rawn dil a chung te chu :- Pu H. Zothangliana, Pu Hmingdailova Khiangte, Pu T. Sangkunga kha chu kan ziak tawh a, hemite hi awm loh phalsak an ni. Vawiinah kan zingah an tel lo a ni tih kha House ka hriattir e.

Tunah chuan kan Dan bung 27-nain a phal angin vawiin hi Private Members' Business kan tih ni a ni a. Resolution 56 lai kan dawng a ni. Dan ang thlapa lo luta pawm vek a ni a. Kan Dan 124-nain a duh angin ni 10.3.2016 Ningani khan thum vawr (ballot) a ni a. Member 19 te resolution chu Bulletin

Part II, tahrík ni 11.3.2016 - ah kan rawn tarlan tawh kha. Khata a indawt dan ang thlap khan kan la dawn ta a ni. Tunah hian no. 1-na Resolution neitu Pu K.S. Thanga kan ko ang a. A Resolution chu aman rawn move sela i sawm ang.

Pu K.S. THANGA : Pu Speaker, ka lawm e. Vawiinah ka Resolution “Medical College nei tura hmalak mek hi lawmawm kan ti” tih move thei turin hun tha min pe a, ka lawm a. Chumi rual chuan Pu Speaker, ka sawi duh chu hei hi tlemín kan lo tisual deuh emaw ni chu aw ka ti a. Falkawna Medical College nei tura Mizoram sorkarin hma a lak mek hi tih awm tak a ni a, amaherawhchu kha kha Mizoram sorkar hmalakna a ni a. Tin, Medical College tura hma kan lakna tur hi Falkawn a ni tho bawk a, a sawitute pawhin kha kha min hriatsak turin ka’n ngen duh a. Chu chu thuhma angin ka’n sawi hmasa duh a ni Pu Speaker.

Ka move hma in thuhma pakhat dang ka’n sawi leh duh lawk a. Falkawn hi Aizawl atanga Km 14 a awm a ni a. Kulikawn traffic jam lohna atang sawn driving pangngai deuha motor khalhin minute 15, tlema tlan muang deuh tan minute 20 vel tlan a ni a, Lunglei-Thenzawl road a awm a ni.

Tin, a history tlem te ka han sawi duh a. Kum 1998-ah khan Pu H.D Deva Gowda hun laiin Planning Commission-in khatih hunlaia sorkar Pu Lal Thanhawla, Chief Minister hova sorkar, Congress sorkarah khan vaibelchhe 40 a rawn pe a. Hei hi State Referral Hospital tan a ni. Amaherawhchu 1998 inthlan kum te a lo ni a, kum tawp lam a lo nih tawh avang khan kha Congress sorkar khan hmalakna hun a nei ta lova. 1998 kum tawpa sorkarna lo changtu MNF sorkar khan 1999-ah khan building construction hi an thawk ta a ni tih kha ka’n sawi belh duh a. Tichuan kum 10 chung MNF in sorkarna a neih chung khan an term tawp lamah khan Referral Hospital atan khan khum 50 awmin ruahmanna

te lo siamin, khum 50 in hospital kha an term tawp lamah khan an lo run tan ve a ni tih kha ka'n sawi duh a ni.

Tichuan Pu Speaker, State Referral Hospital leh Mizoram Institute of Medical Education & Research (MIMER) tih hi, hei hi ka'n sawifiah leh lawk duh chu Mizoram Institute of Medical Education & Research, (Medical College) ti a kan hriat hi kan hotuten a hming Medical College ti mai lova an han dahna chhan hi nakinah Doctor, MBBS zirna mai ni lo Specialist te, Super Specialist te thlenga zir theihna tur a nih avangin Medical Education leh Research kha ti tel law law ang u tiin thangtharte hmakhua thlirin Medical College pangngai mai lo deuhin Research Centre ang pawhin ruahmanna siam a ni tih kha a hming hi kan hriat atan ka'n sawilang ve duh hrim hrim a ni.

Tun dinhmunah Medical College hi North East State-ah chuan Sikkim leh Meghalaya-in pakhat ve ve an nei a, Manipur leh Tripura-in pahnih ve ve an nei bawk a, Assam pheih chuan an nei nual a ni. Medical College tun thlenga la nei lo awm chhun chu Arunachal Pradesh, Nagaland leh keini Mizoram te hi kan ni a. Medical College nei tur hian Damdawi In changtlung leh tha din hmasak phawt a tul a. Hemi atan hian kum 2008-a Congress a lo sorkar tirh phat khan State Referral Hospital, Falkawn hi Medical College dinna tlak tur khawpa tih changtlun chhoh nghal tum niin, a theih ang angin chak taka hmalak nghal a ni. Tichuan, ni 10.12.2012 khan Damdawi In pawh khum 150 ah upgrade niin Pu Lal Thanhawla, Hon'ble Chief Minister-in a hawng a ni.

Tunah hian khum 250 ah tih len mek a ni. Govt. of India tanpuina hnuaiah Mizoram hi Medical College dinna tura thlan a lo nih takah chuan tih tur a lo tam em em mai a. Medical College nei tur chuan Mizoram University atangin affiliation lak a lo ngai a, hei hi ₹ 3,00,000 deposit in tihfel a ni tawh a ni. Medical College din a nih theihna turin doctor leh staff -te dahbelhin hma lak a ni ta

zel a. Medical College dinna turah hian tih tur pawimawh leh hmanhmawh thlak tak tak a awm thin avangin thil tihfuh tawk loh te pawh a awm thei a. Amaherawhchu, kan hmalakna zawng zawngte hi Medical College tha leh changlung, mipuite tana chhawr nahawm tak kan neih theihna tura hmalakna a ni.

Medical College din tur hian Medical Council of India guideline-in a phut ang te tih phawt a ngai a, heng guideline tlin tur hian private Damdawi In din tum, sum tam tak tak neite pawh hian a vawikhatnaah chuan an paltlang zo lo fo thin. Medical Council of India tehfung hi felfai leh kimchang tak a nih avangin Medical College nei thei tur chuan inspection hi vawi tam an paltlang a ngai thin a ni. A chungka kan tarlan tawh ang khian a theih ang angin hmalak zel a ni a, Medical College din tur hian ka MLA pui zahawm tak te, sorkar hnathawkte leh Zoram mipui zawng zawngte sorkar tawiawm turin ka sawm hmasa a ni.

Funding chungchang :- State Refferal Hospital, Falkawn chu Medical College ni turin Govt. of India chuan kum 2014 khan a thlang a, 189 crore [cheng vaibelchhe 189] ruahman niin Govt. of India chuan 170.1 crore [cheng vaibelchhe 170.1] an tum ang a, Mizoram state sorkarin 18.9 crore [cheng vaibelchhe 18.9] an tum ang. Dt. 9.6.2015 hian Finance Department-in state matching share atan cheng lakh 556 [cheng nuai 556] a dah nghal a, chumi hmanng chuan Govt. of India-in pawisa min pek hma atangin theihtawpin hmalak a ni a. Dt. 29.6.2016 ah Govt. of India chuan Mizoram Medical College din nan first installment-ah 20 crore (cheng vaibelchhe 20) a rawn pechhuak ta a ni. Tin, Mizoram sorkarin 556 lakh (cheng nuai 556) a lo dah khan hma tam tak lak nghal a ni.

Medical College din tura hmalakna te :- Mizoram sorkarin chak taka hmalakna zarah ni 16.4.2014 ah Ministry of Health and Family Welfare, Govt. of

India leh Govt. of Mizoram chuan MoU an sign a, ni 21.4.2014 hian Medical College buaipui turin Board of Management leh Committee peng hrang hrang Notification tihchhuah a ni bawk a ni. Heng hi nakinah a hnunglamah Board hrang hrangte hi ka rawn sawi ang a.

Advisory Meeting hi ni 9.6.2014 khan a vawikhatna atan neih a ni a, hemi hnu pawh hian meeting hrang hrang tum engemaw zat neih leh tawh a ni. Tichuan, ni 29.8.2014 ah seat 50 Medical College ni turin medical Council of India-ah application thehluh a ni a, a vawihnihna atan ni 31.8.2015-ah seat 100 ni turin Medical Council of India-ah dilna thehluh nawn leh a ni.

Pu Speaker, India sorkarin “Medical College din tur reng reng te tan hian seat 100 aia tlemlo a ni tur a ni” a tih tak avangin seat 100 turin ruahman a ni a, amaherawhchu seat 50 atanga seat 100 turah khan thil tam tak tihbelh leh a ngaih avangin tlemin hun min tikhawtlai leh a. Chak taka hmalak zel niin a vawithumna atan June leh July, 2017 chhunga MBBS 1st Batch tan a nih theih nan August, 2016 ah application thehluh leh tum a ni a. Hei hi kumin kumtawp lamah hian Medical Council of India-in a rawn enfiah leh dawn a, chumiah chuan engkim lo inpeih hman Mizoram sorkarin a tum a ni.

Tichuan ni 6.10.2015 atangin Hospital Services Consultancy Corporation-a constructing agency KMB Project Ltd. chuan chak taka hma lain hospital building tihchangtlun nan te, Medical College atan laboratory, lecturer theatre te siamtha a sakbelh niin, tunah hian hnathawh chhonzawm mek zel a ni. State Referral Hospital, Falkawn tihchangtlun tumin staff hrang hrang dahbelh an ni bawk, Medical Superintendent te leh Staff Nurse te tiamin. Tunah hian State Referral Hospital, Falkawn-ah hian thawktu zawng zawng hi mi 201 lai an awm a, a mamawh anga la thuum belh zel tum a ni. Tunhnai mai khan Finance Department lam atangin Staff Nurse 25 State Referral Hospital leh Medical

College tura ruahman mek Falkawn atan hian lak phalsak an ni leh a, Medical College leh Hospital tan hian staff dangte pawh dahbelh zel turin Finance Department leh Health Department ten chak takin hma an la zel a ni.

State Referral Hospital leh Medical College, Falkawn dinhmun tlangpui :- Doctor Specialist leh Specialist lo te an vaiin tunah hian 35 an awm tawh a, Nursing Staff 87 an awm tawh a, a dang la tihbelh leh tura ruahman a ni.

Dr. K. BEICHHUA : Pu Speaker, ka resolution move lai khan chhiar kha in phal si lova, tunah i chhiar tir leh ta si a, engnge a awmzia ni ta le ?

Pu K.S. THANGA : Pu Speaker, i phalnain a tam tham deuh avangin hei hi kan member zahawm tak takte leh Mizoram mipuite pawhin an lo hriat atan, kan chhiar hian a fiah zawk a, bye heart sen pawh a ni lova, kan sorkar hmalakna hi ram pum tan pawh bengvar thlak tham a ni a. Hei tuna ka sawi mek lai pawh hian tihian kar khatah va kal ila, hmasawna thar, thil thar a lo awm belh zel a. Chuvang chuan, hei hi Mizo mipuite tana hriat tul tak tak te a nih avangin kha kha i phalnain ka rawn chhiar chhuak a ni.

Pu LALRUATKIMA : Pu Speaker, 10 clear days hmaa thehluh tur a ni a, kan ballot leh tun inkarah pawh khan chawlhkar khat dawn a tla a, inbuatsaihsna hun tha kha a nei tho bawk a, a ngaihnaawm zawk ang a, kan kalphungah pawn hetiang ang lo deuha tih kha kan kalphung a ni lo deuh a ni. Hun hmasaah pawh khan chhiar i phal loh kha a, resolution move-tute kha.

Pu K.S. THANGA : Technical staff 22 an awm a, clerical staff 8 an awm a, driver 4, IV grade 45, an vaiin 201 an ni. Tin, doctor dinhmun hi a tha chho hle tawh a. Naupang super-specialist te pawh niminah te khan an va join mek zel a ni. Chunga

doctor dinhmun an nihna te nen medical superintendent 1 kan nei a. Tin, Deputy Medical Superintendent 1 kan nei a, surgeon super-specialist tiamin 2 an awm a. Naupang doctor 1 a awm a, Dental surgeon 4 an awm a, radiologist 1 a awm a, ruh lam doctor orthopedic doctor 3 an awm a. Medicine doctor 4 an awm a, vun lam doctor 1 a awm a, gynae doctor 2 an awm a, ENT doctor 2 an awm a. Mit lam doctor 2 an awm a, MBBS 3 an awm a, anaesthesiology (hnhimhlum lam) doctor 1 a awm a. Ayush doctor 1 a awm a, pathology doctor 1 a awm a, pulmonary medicine (chest medicine) doctor 1 a awm a. Microbiology 1 a awm a, multi-disciplinary research unit doctor 2 an awm a. Non-communicable disease 1 a awm a, national programme for prevention and control of deftness 1, an vaiin doctor 35 an awm a ni.

Tin, department OT neih dan hi gynae-ah Tuesday leh Thursday-ah an nei a. Dental-in Monday-ah an nei a, ortho-in Wednesday-ah an nei a. ENT-in Monday leh Thursday-ah an nei a, surgery hian Wednesday leh Friday-ah an nei bawk a ni.

Hmalakna kal mek te:- Hospital building hi chei that mek a ni a, tukverh leh kawngkhar te, bathroom chhuatphah te cheithat mek a ni. (SPEAKER : A dang kha chu chhiar tawh lo la, a figure lam kha chu chhiar la maw.) Rawng hnawih that mek a ni a, OPD complex ground floor hi zawh fel tep a ni tawh a, 2nd floor hi tile phah zawh tawh a ni. Tin, tukverh leh electric wiring fitting hi la hmabak a ni. Heng hi Pu Speaker, hetiang repair a ngaihna chhan hi a hun te a lo rei deuh a, MNF term hunlaia contractor ten an thawh tawh te kha ngaihtuah zui lohin kum10 vel a awm a. Congress sorkarin 2008 atanga an buaipui leh tan pawh khan a chhia hi a lo tam hman tawh viau va. A contract kha a thawk zo tawh a, a bak kha buaipui tur an nei vak tawh lo te pawh a ni ang a. Chuvangin, vawiinah hian thil tak tak han tih dawnah hian buaipui tur kha a lo awm leh lo thei lo a ni.

Tin, operation theatre hi 4 awm tura ruahman niin tunah hian 3 hman mek a ni a, 1 hi buatsaih fel mek a ni. Tin, ICU hi H1N1 tih te leh chutiang natna inkaichhawn

theih hlauhawm te pawh awm thei tura ruahman niin khum 10 thlenga a tula dah theih tur a ni a. Tin, nausen ICU te thleng pawha ruahmanna siam a ni bawk a ni. Tin, khum hi tunah hian nichina kan sawi tawh ang khan 250-a buatsaih mek a ni. Administrative building hi Medical College tur atan chei that mek a ni a. Ground floor-ah hian physiology laboratory and faculty room tur siam mek a ni a. First floor hi office atan luah mek a ni a. Director faculty leh staff dangte tan chei that mek a ni. Tin, 2nd floor hi library leh conference hall atan ruahman a ni a, hei hi chei that vek tawh a ni. Blood bank hi a awmna tur chei that vek tawh a ni a, sak mai tura ruahman a ni.

Tin, equipment hi tunah hian lei mek zel a niin, chah mek te, lo la thleng mek te a awm a. Chung tlangpui te chu anesthesia work station inzaina khawl te, patient monitor BP (Pulse respiration enna) te, ultrasound te, portable OT light te, pulse oxymeter (damlo oxygen mamawh zat enna) te, photo-therapy, (naupiang uapna) te, endoscopy te, OT light te leh blood bank refrigerator te, thermy inzaina hmanrua te leh (SPEAKER : Khang ho kha chu a technical report deuh hlek lo maw?) machine te.

Pu Speaker, hospital hemi hi kan sawina chhan chu Medical College atana inbuatsaihnaah khan thil tul kha a tam em em a. Chu chu sorkar hian a thawh mek a ni tih kha kan hriat kha (Interruption). Aw, churang tak chuan kha kha kan hriat a pawimawh chu...Pu Speaker, ka move lai a ni a, nakinah sawina hun an nei dawn a, (SPEAKER : Ngawi rawh ngawi rawh, sawi tir rawh le) khawngaihin min lo tibuai lo hram turin ka ngen a member zahawm tak te. A chhan chu mover ka ni a, ka la sawi zo lova. Hospital Medical College atana sorkar inbuatsaihna kha ka sawifiah loh chuan kan thiante khan a that zia ka sawi khan an rilru a tibuai deuh niin ka hria a. Lo ngaithla hram hram phawt se, nakinah an sawi ve hunah te an la sawi chho turah ngai ila. Khatiang khan khang atan pawh khan cheng maktaduai tam tak ruahman niin equipment thenkhat te phe chu delivery tih mek tawh a ni a.

Tin, Multi-Disciplinary Research Unit (MRU) hi Pu Speaker, kan sorkar hian tunah hian kan buaipui leh mek a. Hei hi ka sawifiah leh deuh hlek duh chu, hei hi Research Scheme Project, Department of Health Research (DHR) leh Indian Council of Medical Research (ICMR) ten Medical College hrang hrang ten medical research tih changtlunna atana an duan chhuah a ni a. He project hi grant-in-aid kum 5 chhung atana duan a ni. Centre thlan bikah vaibelchhe 5 thleng pek theih a ni a. North-East bikah Guwahati leh Dibrugarh Medical College ve ve bakah Medical College la awm lohna Mizoram, Nagaland leh Arunachal te thlan kan ni. Hetianga Medical College neilo chungu Mizoram telh ve kan nihna chhan hi a hranpa a sorkar ngenna leh project te thehluh vang niin a hmunah ngei State Referral, Hospital Falkawn chu ICMR hotuten rawn enfiahin a hmunhma tha an tih bakah Medical College nakin lawka nei thei tur kan ni tih an hmuhin he scheme-ah hian telh ve kan ni ta a ni. He scheme hi 100% grant-in-aid a ni a, kum 5 chhung ICMR hian a support ang.

Chungu MRU hnuaiia hamthatna kan dawn tur te, equipment lai chauh kha Pu Speaker, a thatzia kan hriat nan kan sawitel lawk ang a. Equipment lei tura hmalak mek reilote chhung a kan neih mai turte zingah hian Molecular biology equipment, Molecular biology hi tunlai medical lamah chuan hmanraw thar leh changkang, natna hriatchian diagnose nan leh research lam atana an hman lar em em a ni a. PCR khawl te, electro-forasis te leh a kaihnawih thil te heng khawl te hi North-East ah pawh centre tlem tein an la neih a ni a. Mizoram Health Department history-ah phei chuan a vawikhatna tur a ni. PCR hi a hmanna tlangpui chu hetiang hian ka'n sawi leh ang a.

- a) Genetic testing: Genetic hi natna fa te thlahchhawn theih kan pai leh pai loh nausen chhul chhung a miin natna siam thei gene a pai em tih parental testing neih theih a ni a.
- b) Tissue typing: Organ donate dawnin a donor leh a dawngtu an inmil dawn em tih entheihna te a ni a. Natna hrik hma leh awlsam zawka hmuhna example ah HIV, TB tih leh test dang chi hrang hran te a tih

theih dawn a, hmuh chhuah har te pawh kha a tih theih dawn a ni.

Tin, natna hrik te pawh eng ang nge an nih chiah a sub-tribe ? te pawh a en theih dawn a. Tin, tha deuh mai tur chu Pu Speaker, DNA, finger printing forensic-ah nausen pa dik tak chhui chhuahna a pui tur, sawnthlakah pawh, 'ka fa a ni, a ni lo,' tih vel pawh kha Falkawnah hian a test ve theihna khawl te hi kan nei mai tawh dawn a ni.

Medical Research hrang hrang atana hman theih chi te kan nei a, biopsy equipment, tisa them hleh thlak emaw an paih atanga natna zir chianna, cancer a ni em? Eng cancer type nge enge a khawih tawh? Enge a stage tih thlengin hetah hian a test theih dawn a ni. Chutiang leh "Five parts differential Hematology Analyzer & fully Auto Bi-Chemistry Analyzer" hei hian thisen ngah zawng te, thisen var neih dan te, kal function bakah thin function te a test theih tawh dawn bawka ni. Heng ang chi hi tuna ruahmana lak chhuah chhoh mek a ni a. He Hospital-ah hian tuna service min pek mekah hian 24 hours emergency service khum 10 casualty awmna kan ruahman mek tawh a ni a. Tin, 24 hours specialist on call duty an awm tawh bawka. Tin, MDRTB multi drugs resistant, TB aia hlauhawm leh zual enkawl na khum 10 Referral Hospital-ah hian attached leh bawka ni.

Tin, hun reilote a peih mai tur ICU, H1N1 te leh khum 10 thlenga dah theih tur te, MIR te, CT scan te pawh buatsaihin ruahmanna neih mek a ni.

Tin, Medical College Director tur hi tihfel tep a ni tawh a, Department pathum awm tur a ni a, heng faculty-ah hian Professor pakhat theuh leh Associate Professor pakhat theuh leh Assistant Professor pakhat theuh awm

tur an ni a. Tin, tutor-ah hian MBBS department tinah khan pathum theuh awm tur a ni. Chung chu kan sorkar hian chak takin a bawhzui bawk a ni.

Tin, Committee hi engemaw zat sorkarin a siam a, a vai chuan kan chhiar seng lo ang a, Board of Management-ah hian Chairman-ah Pu Lal Thanhawla, Chief Minister, Mizoram a ni a, Member-te Pu Lal Thanzara; Dr.BD Chakma, Minister of State Sericulture; Pu K.S.Thanga, MLA Parliamentary Secretary Mizoram, Vice-Chancellor, Mizoram University; Chief Secretary, Mizoram; Principal Secretary, Health and Family Welfare, Government of Mizoram. Invitee – Dr. N.K. Mohanty, Advisor to Govt. of Mizoram leh Dr. K.Ropari, Director, Health & Family Welfare Govt. of Mizoram te an ni a. Heng bakah hian Advisory Committee a awm a, Inspection Committee a awm a, Construction sub-Committee a awm a, Procurement Sub-Committee a awm a, Academic Sub-Committee leh Support Group-te din a ni a, member-te khangah khan tam tak awmin an concern angin Department hrang hrangte pawh hengah hian an tel vek a ni.

Chutiang taka hmalakna Mizoram sorkarin a kalpui mek Medical College nei tura hmalakna hi Pu Speaker, vawiina kan member-te pawh hian lawmawm an tih ka ring a ni. Tin, Mizoram mipui tan a thlamuan thlak hle a ni. Tin, seats 100 awm tur a ni a, central pool-ah hian seat 15 a awm ang, keini pualin seat 85 kan chang dawn a ni. Chu seat 85 atang chuan 15 % te lehkha thiam tho mi rama an tih dan ang thovin kan duh chuan heng angah pawh hian seat kha kan la hralh ve thei a ni. Chutiang chu Pu Speaker, kan nih vangin Medical College kan neih tura hmalak mek hi lawmawm kan ti tih hi member zahawm tak tak ten min support vek turin ka rawn dil a ni e. Ka lawm e.

SPEAKER : Thil puan tur pakhat kan Chief Minister zahawm tak leh kan Finance Minister zahawm takte hi reilote an va chhuak rih a, an lo kir leh dawn a ni tih kha kan han puan sak a ni.

Kan dan 131-na khan member-te tan khan minute 15 a lo phal sa tlat mai a, Speaker thuneihna pawh a hman hleih theih loh. Chuvang chuan kan Danin a phal ang khan hun kan hmang ang a, hmang zo lo kan awm a nih chuan a vanneih thlakah ngai ila. Tunah sawihona kan tan tawh mai ang.

Pu K. LALRINTHANGA : Pu Speaker, ka lawm e. Vawiina kan resolution, “Medical College chungchanga hmalak mek hi lawmawm kan ti.” A lawmawm zia hi tawngkam thiam vak lo tan chuan kan sawi chhuak thiam vak lo ang a. Amaherawhchu, a lawmawm ka ti ve em mai a, han sawi ve reng reng hi ka duh a ni.

Medical College nei tura kan inbuatsaih hma hian Referral Hospital nei turin tuna sorkar lai mek an sorkar hmasak zawk khan a lo inbuatsaih tawh a. Nimahsela, chu an inbuatsaihna chu chhonzawm thei lovin 1998-ah khan sorkar a tla a. Chuta lo sorkar leh ta chuan kan hotute hmalakna kha tidanglamin eng enge maw kan duh lo dan ang deuhin thil a kal a. Chuvang chuan opposition kan nih lai pawh khan sorkarna kan siam leh hun chuan hma kan lak chhonzawm leh ang tiin mipui hnenah pawh kan tlangau thin a ni. A awmzia chu Referral Hospital kan neihna tur atan khan tuna kan mover-in cheng vbc 40 kan nei tawh a tih kha Congress sorkar laia sanction lo awm tawh a ni a. Chumi a hmalakna chu a puitlin hma khan an tlaksan ta kha a ni a.

Chutia sorkarna a lo inthlak takah chuan sawrkar lo awm thar ta colliation sorkarah khan sum leh pai insemna tur hun leh hmun remchang taka hmangin Referral Hospital building tur lampang kha buaipui ta lo chuan a ruling party pahnih te sum insem theihna tur kawng zawngin quarter kha an sem darh ta vak mai a. Chutichuan Hospital Building te pawh chu sak mumal lohin a awm ta a, sak zawh lovin hun reitak a awm ta a. Quarter sakah khan mi tam tak chuan kan hriain ka ring a. Tu tu te emaw ten ar vulhna

atan te an hmang a. Mizo mipuite kan in referna tur atana sawrkarin a buatsaih kha ar vulh nan kan han hmang ta mai mai kha pawl kan ti em em a ni.

Mizoram atangin hmunpui zawkah Medical College lian zawkah te, hospital lian zawkah te kan in refer thin a ni a. Chuta kan pawisa sen dan chu kan hre theuh. Private pawhin kan seng teuh a, sorkar ang pawhin kan seng tam a ni. Hemi a kan pawisa sen hi nasa takin sawrkara awm tawh te ngaihtuahna hmangtute chuan pawl an ti a. Hetianga kan insenna tamtak hi tihlem pawh an duh a ni.

Mizoramah doctor te kan nei a, an hnenah kan va inentir a. Natna kan neih te test lem lovin mi tam tak damdawi kan inchawh ringawt a. A dose kan ei zo a, kan dam leh lova, kan va inentir leh a, damdawi dang min lo chawh leh a. Chu chu kan natna atan damdawi tak tak a ni nge ni lo tih pawh hi an chiang vak lo niin ka hria. chutiang chu kan han ei zo leh a, kan la dam leh chuang lova. Chutianga kan tih kan tih tawh hnu chuan kan beidawng a phai lamah hospital tha zawkah, laboratory tha zawk awmnaah te, mithiam tam zawk awmnaah te chutianga chuan kal a lo ngai thin a.

Dam kan duh si a, neih thinglungkhawngin mi tam tak kan kal a. Kan neih zawng zawng kan sengral a, harsatna kan tawh a, mahni in leh lo hralh duh hial khawp te pawhin kan lo awm chho a ni a. Chutiang chuan mi tamtakin damlohna avangin harsatna kan tawh a ni.

Chumi chhawk zangkhai tur chuan sawrkarin 1998 kum khan Referral Hospital, phaiah kal ngai tawh lo turin, damlote pawh kan in refer theihna turin khawl lian pui pui, tuna kan mover-in a sawi ang khan, khang zawng zawng kha ka by-heart seng lova (kei chuan khang zawng zawng kha a tawi zawngin ti mai ila). Khatianga kan neih theihna tur atan khan sorkarin ruahmanna a siam a. Chutia ruahmanna a siam chu 1998 sorkar thar lo piang kal chho zel 2008 thlenga sorkar khan a lo tithuanawp ta a, khum sawmnga ni turin min buatsaih sak ta a ni. Referral Hospital khum sawmnga awm

hi ka la hre lo reng reng, Mizo mipui tam tak ten pawl kan ti a ni. Chuvangin tun huna Referral Hospital pawh ni mai tawh lo, Medical college din tura kan Minister leh kan Chief Minister te ngaihtuah thiamna hmanga Medical College hial nei thei tura kan han inbuatsaih te hi a lawmawm ka ti a, ropui ka ti a ni.

Thil a lawmawm zia sawifiah nan khanglai sawrkar lo tawp ta a thil thenkhat kha han sawi ta ila. 1998 kum khan Tuorial Hydel Project lungphum kan Chief Minister-in a phum a. Chutichuan, a han kal a han kal a, sorkar thar a han piang a, sorkar thar khan a ngaihsak chiangkhang ta vak lovin kan hria a. 2002 kum khan party angin kan zuk en a, chutah chuan kan hriat chu sorkar dinglai khan vawikhatmah an lo tlawh reng reng lo a lo ni a. Chuan 1998 kumah chhungkua 48 in ram an nei a. Hei bak chu tuman an nei tawh tur a ni lo ti a notification chhuahah khan mi sang chuvingin ram an nei a, compensation an claim ta a. Chu compensation an claim chu an hmuh theih nan a claimtu ten total bandh an siam ta a. Mizoram leh India-ah a niang bandh rei ber a nih rual rualin sorkarin a ngaihsak ta reng reng lova. Chutichuan a thawktu ten tihngaihna an hre lova, an kalsan ta tawp mai a ni.

Chutichuan, sorkar thar (tun sawrkar hi 2008-a alo pian khan) chhonzawm leh a lo ni ta a. Kha Hydel Project kha 2006-a hawn tur a ni a, tunah hian kumin October thla vel hian hawn tura ruahman a lo ni leh ta chauh a. Kum sawmin kan tlai ta a nih chu. Chutiangchuan politician ten an thil ngaihtuahna an tidanglam a, pawl an khawih chuan mipuiin kan tawrh theih dan a ni a. Tuna Referral Hospital tur tunhmaa kan hotuten an lo ruahman kha, khatih hunlai khan tipuitling ila chu, tuna kan sum sen tam tak hi a kal ral lovang. Tunah chuan infrastructure awm tur tam tak a awm a, chungte hmang chuan kan natnate Mizoramah ngei thlawhna chuan ngai lovin, train-ah te kal ngai lovin Mizoram-ah enkawl thei tura buatsaih a lo ni ta hi lawmawm ka ti a, chu chu ka han sawi a.

Chutih rual chuan thil tha dang lo piang tur te pawh hi a awmin ka hria. Mizoramah hei a hmingah khan Mizoram Institute of Medical Education

and Research tih a lo ni a. Chuti a lo nih chuan Mizoramah hian ramhmul damdawi, mihring kan inenkawl theihna tur hi tam tak kan nei a. Mizoramah chutiang khatiang chuan chumi thlai chu damdawi atan a tha tih kan nei a. Pu Chawngkunga te ho pawhin an siam a, midang tam tak PCCF Pu RC Thanga lehkhabu siamah te thil dang tam tak kan hmu a. Chung atang chuan research beiin han siam ta sela, kan eizawna te pawh hi helampangah te pawh hian kan thlak danglam thei awm mang e aw tiin a ngaihtuah theih a ni.

Entirnan, thuamriat kan tih te, tlangsam kan tih te, hengho te hi damdawi tha tak a ni a. Thenkhat chuan mau pil meh ringawt pawh damdawi atan an hmang a, thildang tam tak damdawi a siam theih, a vawnthatna tur atan te pawh research siam a khatianga tih theih kha tam tak a awm a ni. Chungte chu Mizoram Institute of Medical Education and Research hmanga kan zir chuan Mizorama kan ramhmul hi eizawn nan, damdawi siam nan kan hmang ang a. State dangah te leh khawvel dangah te pawh kan thawnchhuak thei ang a. Chutichuan nakina ka la sawi tur a ni a, demand sawi hunah. Buhfai ah te kan intodelh lohna te leh thildanga kan intodelh lohna tam tak te pawh hi khang atanga sum kan lakluh atang khan intodelhna tur tam tak kha a awm belh theih dawnin ka hria a. Chuvangchuan Mizoram in Medical College kan neih theihna tura kan Chief Minister kaihhruaina leh kan Minister hmalakna a College nei thei tur anga lo awm chho hi lawmawm ka ti em em a, ka'n tarlang ve a ni e. Ka lawm e.

DEPUTY SPEAKER : Tunge han sawi ve leh ang le. Sawitur kan awm tawh lem lo em ni? A tha kan ti tlangin kan lawm tlang a ni ang a. Pu K. Sangthuama.

Pu K. SANGTHUAMA : Pu Deputy Speaker, chawhnu lama sawiah kan ti ve deuh a ni a, mahse in thu tlat si a. Vawiina kan Resolution hi hemi chungchang hi Resolution a tam khawp mai a, a ni thluah mai a. Pu K.S. Thanga

kan Parliamentary Secretary zahawm tak resolution kha pawhfuh a lo ni a. Medical College nei tura hmalak mek hi lawmawm kan ti tih ringawt a ni mai a. A bakah hian keini pawhin kan thehlut a, mahse ka thehluh ve pawh hi “State Referral Hospital, Falkawna Medical College din tum hi Central Medical College a nih ngei theih nan theihtawp chhuaha hma lak ni rawh se” tih kha ka han thehluh ve dan a ni a, a inzul viau a.

Vawiina kan resolution hi a bul deuhhlekin ka hria a, chuvangin siamrem dan te pawh la ngaihtuah tlan a, hetiang deuh hian pass theih te chu ni se kan ram tan hian a tha zawk mai awm mang e aw tih kha ka rilruah a lo lut a. Tuna kan khel mek hi a tha lo tihna ni lovin, a famkim tawk lo deuhhlekin kan hria a. Chuvangin, kan college din tumah hian, tuman college din hi a tha lo ve kan ti lo va. A tha a, mahse tha lehzuah hi a din theih lawm ni tihna ang deuha kan resolution hi kan han tih a ni a. Sum leh pai hrim hrimah hian state sorkar hi keini chang pawh nilovin North East hi chu kan harsa lehzuah deuhhleka a. Chuvangin, central lam puihnaa, duhtusam deuhhleka tih theihna kawng hi a awm theih dan kan ngaihtuah thiam chuan, chu chu kan vanneihna tur a ni mai a.

Entirnan, tuna Mizoram MZU chungchang kan ministry hunlaia kan ngaihtuah pawh khan, thenkhat chuan State University ni sela a tha mai awm mang e, tih te rawtna tam tak a awm a. Mahse cabinet-in a ngaihtuah khan State University chu kan zo lo ang a, zirtirtu tam tak lak a ngai ang a, building tam tak sak a ngai ang a. Chu chu state sorkarin engtikawng mahin a zo thei lovang. Chuvangin, Central University hi pawm ila, chu chuan rah tha tak a chhuah ang a, harsatna nei miah lovin kan kal thei ang an ti a, kan pawm ta a.

Kan pawm ang ngei khan hei University tha tak mai kan han nei a, a lawmawm ka ti khawp mai a. A chhan chu sum lek paiah harsatna nei miah lovin building zawng zawng pawh changtlung takin vawiinah an buatsaih a. Tin, zirtirtu

chungchangah te pawh an mamawh apiang leh a thawktu mamawh ang apiang central sorkarin minrawn pe zel a. Vawinah hian ka hmuh dan chuan kan University hi a chhuanawm ve hlein ka hria a, ka lo ngaihdan chuan a zahpuiawmlo hlein ka hria, a thawktute pawh an fakawm a.

Chuvangin vawiina kan resolution hi hetia bul deuh tawp lo hian kan han sawi ang hian siamtha ta ila chu kan thatpui leh zual turah ka ngai a. Medical College pawh a tha lo ve tihna a ni hauh lo va, sum leh paiah te duhthu kan sam loh avangin tupawh lo sorkar se, sum leh paiah hian duhthusam ang tak chuan awm a har dawn a. Chuvangin, zirtirtute kan mamawh tam si a, kumtin vaibelchhe 70 vel hi chu ngai turawm a ngaih niin ka hria a, ka hriatna a sual loh chuan. Chumai pawh chu a la ni lovang a, a lo len deuh pheichuan a aia tam daih kha vaibelchhe za tel emaw kha kumtin a lo ngai dawn niin a lang a.

Chuvangin, kan House-ah hian rilru tuangtlam takin opposition tih a ni emaw, ruling tih a ni emaw a tha tur angah hi chuan inthurual ta dial dial ila, kan ram tana kan beihna kawngah hian hlawhtlinna kan hmuh leh kan zavaia tan a tha tur a ni a. Chuvangin, a building chungchangah te, nichina kan resolution neituin a sawi ang khan, sakna te a lo rei tawh a, kum 15 kal ta daih tawh khan a lo ni lehngal a. Duh anga changtlungin MNF sorkar khan a buatsaih peih hman bik chiah lova. Tin, vaibelchhe 40 chauh hi chu a tlem hle a, sawtilaia Millennium Centre saw vaibelchhe 42 chuanga sak a ni a, building pakhat sakna daih awrh chauhin sawti zat saw sak a ni a. Hei quarter pawh chhungkaw 224 awm theihna turin zawhfel thawkhat a ni a. Tin, building saw ka hriatna a sual loh chuan building 30 vel sak a ni a, complete chiah lovin. Chuvangin vaibelchhe 40 te hi chu building pakhat sakna pawh a tling mang tawh lo a ni tunlaiah, chu chu a kalphung a ni a.

Engpawhnise, hmasawn zelna tur a building-ah te a la awm a, tuna a awmsaah pawh sawn khum 250 chu han tih naw naw theih niawm-in a lang a. Chuvangin, saw saw la siamthat chhoh zel a ni ang a. Amaherawhchu, sum leh paiah hian tunah pawh crore 20 vel min release chauh ni awm a ni a. Vaibelchhe 189 kha chuan eng vak hi kan thlen tehchiam a rinawm lova, kumtina vaibelchhe 70 vel emaw, a za tel emaw la ngai tur a ni a. Chuvangin, central hi dil ta ila kan resolution ang hian, chuta kan hlawhchham a nih pawhin hospital hi chu kan tih tho turah ngai ta ila, kan hlawhtling ve mial mai thei a nia. Chuvangin, beidawng miahlo ila, kan House Leader hian central lamah theihtawp han chhuah bawk sela. Chutiang chuan resolution-a helai Assembly-a kan tih phawt chuan a chak lehzualin a rinawm a.

Chuvangin, khatiang zawnga kan tih chuan Medical College tha tak mai kan nei dawnin a lang a. Staff an ngai tam si a, vawiinah pawh doctor 35 vel kan dah a. Tin, nurse pawh engemawzat kan lo dah a, doctor te hi tam tak an ngai dawn a. Medical College puitling kan tihchhoh dawn chuan a zirtirtu tam tak an ngai ang a, a zirtirtu nilo pawh, damdawi ina thawk tur pawh specialist tam tak an lo ngai ang a, super specialist thlengin an lo ngai ang a. Khang zawng zawng han hisap khan vawiinah hian kan resolution hi tlem siam danglama tih theih chuan kei chuan a that zawk ka ring a. Chuvangin, a lawmawm tih hi chu, tupawh kan lawmin ka ring a, lawm loh thu pawh a awm lova, hei chu thil pass har tehchiam pawh a ni lo maithei a.

Amaherawhchu, vawiinah hian rilru tak tak hmang ta ula, a lehlam rawn tih a nih avang lam ni lovin, la siamthat theih a nih chuan Pu Deputy Speaker, hetiang kawngah hian rawtna a awm theih chuan leh siam that theih a nih chuan vawiinah hian tidanglam hret ta ila, tichuan, vawiina kan resolution kan pass tur pawh hi hlawhtling takin kan kal theih kan ring a.

Tin, building chungchangah hi chuan inhnial inhnial mah ila mahni tanhmun kha tha viau zelah pawh kan ngai thei a. Thil hi a tha lo hi sawi tur tam tak a awm thei a, a tha lai te pawh hi sawi tur tam tak a awm thei a. Chuvangin, a hleihluak deuh lutuk ang a House-ah emaw, chanchinbuah emaw tih chiam chiam hi chu kan hnam mualphona mai mai a nihna lai a tam a. Sawng building sak chungchangah te pawh building te lo sa thang ve ka ni a. Lo sa tha lo te pawh chu a awm theih viau ang tih ka ring tho a. Amaherawhchu, a tlangpui chuan a sum hi a tlem em avangin ministry hmasaa lo satute pawh khan duh ang thal chuan an zo thei lova. Sum an dil belh leh kha an pek theih si loh avangin saw saw an thlen chin a ni a.

Pu Deputy Speaker, kan thlen chin chinah hian tuna sorkar hian theihtawpin, chak takin hma lak tum ta sela, building te sak that ngai a awm leh sak that chhoh zel a, tih chhoh zel kha, khum 300 awmna chu eng eng emaw ti tiin a tih chho theih mai dawnin a rinawm a. Ka zawh chian danin tunah pawh hian khum 250 a dah thei mai awm mang e, an ti a. Chuvangin heti laiah hian rilru awm se. Thawklehkhatah chuan kan din mai dawnin a lang lova, kumin sum te nghah a la ngai dawn niin a lang a. October thla emaw, January thlaah emaw a endiktute hi lokal leh chauh tur pawh an ni maithei a, ka hriatna a sual loh chuan. Chutiang a nih chuan hmanmawh ruai ruai a tih theih pawh a ni dawn lova.

Chumi chhung chuan kan resolution hi hetiang a kan lo tihdanglam theih pheih chuan central sorkar hi a siruk la deuh te pawhin zu dawr ta ila, min ngaihthiam loh thu te pawh a awm dawn em mi? 'Keini state pachhe ve tak (ti mai ila) sum leh pai pawh indaih lo fo kan ni a, Medical College kan duh ve si a. State Medical College kan tih dawn chuan sum leh paiah harsatna kan nei ang tih kan hlau a, central Medical College hi min tihsak mai ula, Meghalaya pawh in ti thei a. Engkim in ti a, tha takin in sa a, engatinge keini Mizoram hi min tih theih loh bik ang le,' tiin zu dil ta ila. Mizoram kan nih avanga in tih theih lo ngawtna tur hi a awm lem dawn em ni tih te kha ka rilru-ah a awm a ni.

NEIGHIRMS-te pawh doctor tam tak specialist, super specialist te thlengin an nei a. A thlawnin kan zu inentir thei vek a, man tlawn tein thil kan ti thei vek a, a lawmawm khawp a. Chuvangin khulaiah pawh an tih theih chuan keini pawhin enge kan tih theih loh bik ang tih kha vawiinah hian kan ngaihtuahnaah awm ta se. Pu Deputy Speaker, thui tak sawi tur pheii chu a awm ang a, mahse kha kha ka lo duhtawk dawn mai ang a.

Ka'n rawt duh chu, helaiah kan resolution ang hian min her danglam hret sak chuan a lawmawm khawpin ka ring a. "State Referral Hospital, Falkawn-a Medical College din hi Central Medical College a nih ngei theih nan theihtawp chhuaha hmalak ni rawh se", ti hi helaia a lawmawm a tih bakah hian belh ta ila. Tichuan central lamah chuan kan hotuten theihtawp chhuahin zu nawr sela. Kan zavaia kan tanrual chuan kan ti thei mai awm mang e tih kha ka sawi duh a ni e. Ka lawm e.

DEPUTY SPEAKER : Member zahawm tak khan resolution tihdanglam lam kha a rawn sawi hnem ber a ni a. Hei kan Dan-ah hian kan Rules 129-naah tihdanglam (Amendment) chungchang hi a awm a. Resolution kha move a nih hnuah, 'Member tupawhin tihdanglamna Resolution kha a rawn move ve thei a, Amendment Resolution. Amaherawhchu, a copy kha resolution neitu hnenah a pe tur a ni'.

Tin, kan Dan 130-naah hian a copy a siam danglam duh dan, amend duh dan a copy kha ziakin Secretary hnenah 'One clear day before the day fixed for the discussion of the Resolution'. Resolution kan ngaihtuah hma, one clear day-ah a thehlut tur a ni a. Chung zawng zawng tih loh pawh chuan, Speaker-in a discretion-in amendment chu a phal thei tho' tih a ni. Chu chu kan hriat atan hrim hrimah ka rawn sawi a ni. Tunge sawi leh ang le, Pu T.T.Zothansanga.

Pu T.T.ZOTHANSANGA : Pu Speaker, tawitein ka rawn sawi ve lawk teh ang. Kan Resolution hi a lawmawm khawp mai a. Mizoramah Medical College

hi engtikah nge kan neih ve theih ang tiin dingdihlipin zirlai kan nih ve laia kan lo tinzawn ve thin tawh kha a ni a. Kan han sawiho thinnaah chuan, “Medical College te chu nei ve ula, mitthi ruang zai tur pawh in nei dawn em ni ? in ruang in roh nasa si a”, hnamdang te chuan min ti a ni. Helaiyah ruang kan nei loh kha min hlauhpu thin kha a ni a.

Pu Deputy Speaker, a lawmawm khawpin ka hria a. Kan hotuten hetiang ruahmanna an rawn nei a, nei ve thei tur anga hmawr min han hmuh chho hi a hlimawm ka ti a. Kan hun hmasa te ka han ngaihtuah a, kan term hmasa ti mai ang, kan MNF unau ten an hun Medical lama an chet dan hi a lawmawm dang riau in ka hria a. Kum 2004 CAG report kan en chuan thingtlang lama nuai 281 te kha Aizawl Civil Hospital-ah an vawmbei thlap mai. “Aizawl Civil Hospital hi thingtlang zawng zawngin kan pan ber, kan referral a ni ber mai a, kan inthlhrung lo a ni,” te kha an ti a. Tin, Type-I, II leh IV 37 sak nan vaibelchhe chuang an han sen ang chi te, ek in kal thei 20 cheng nuai 162-a han lei pawp pawp ang chi te kha vawiinah hian kan kal pel a, ngaihtuahna thar kan han nei chho hi a lawmawm ka ti a ni.

Tin, kan member zahawm tak Pu K.Sangthuama khan ‘Referral Hospital atang khan vaibelchhe 40 kha chu a tlem lulai deuh a ni’, a rawn ti a. Amaherawhchu, kum 2000 chho vel kha a ni a, 6th pay hma daih kha a ni a. Khatihlai khan vaibelchhia hi a tam khawp mai a. Tin, chutih rualin vaibelchhe 40 mai kha a ni lova. NLCPR ah, DoNER-a an dil belhah khan vaibelchhe 35.53 kha an hmuh belh leh a. Tichuan avaiin vaibelchhia 76.6 in Referral Hospital saw sak a ni. Kha kha min lo hriatsak thei se ka duh a. Vaibelchhe 40 a bul an han tan khan a Referral Hospital building tak mai kha an hel an hel a, party worker ten an sak thei ang chi zawng hlir khan ruahmanna kha an nei chho kha a ni a. Khalai taka kha mipuiin kan rinlehna lai pawh kha a ni. Dik tak chuan a ban pakhat pawh an tih hma hauh atang khan nuai 398 kha item lei nan an hmang nghal pang mai a. Cementah nuai 194, rod ah nuai 163 te an han ti nghal a, an han suam deuh bawrh bawrh kha a ni nghal mai a, zep thu a awm lova.

MPC unaute nen an thawhho lai kha a ni a, kan MPC unaute hnenah pawh khan contract an va pek ve man pawisa an laksak ringawt pawh cheng nuai 585000 a ni. Ka'n sawi deuh vakna chhan chu, central in duhsak takin sawlaiah Referral Hospital tur kan hotu ten Pu Lal Thanhawla'n a zuk dilna kha ngaipawimawhin min rawn pe a. 1998-ah Congress sorkar kha a tla leh ta mai si a, khatia a'n tlak leh tak mai siah khan engmah sawizui thei ta hek lo, MNF in an han enkawl zui kha a ni ta mai a. Contractor 20000 kan mamawh ang ti te kha an lo ni bawk a, a contractor ang zawng hlir mai khan thil kha an kalpui a, khami avang khan kan pian hi a fuhlo laklawh tawh emawni aw tihte rilruah chuan a rawn awm a ni.

Staff quarter te an han sa a, Doctor quarter te, Nurse quarter te engemaw chen chu an han sa a, amaherawhchu mipui ko khawm tu ber tur, a Referral Hospital tak kha a awm si loh avangin a tawl ta mai mai a, World Bank kawng laitu driver-te khan an luah vel ta mai mai a ni. A then chu ar vulh nan te an hmang a, a then chu private schoolah te an hmang a. Tichuan central lamin 'e khai, kan duhsak si che u a, kan rawn endik dawn a nia,' an rawn ti a an rawn kal tum pawh khan damlo derte kha kan han indah vel chho kha a ni a. Khami ka'n sawi kai duahna chhan chu, kan member zahawm tak Pu Sangthuama'n 'a huhoin zuk nawr ila,' an ti chho vel kha a phurawm khawp mai a. Chutih rual in an mahni hunah khan hun tha deuh mai, hun rangkachak kha an nei a, bengmuka liam zawih zawih hun laiah khan engatinge an lo tih ve mai loh, tih kha ka rilru a rawn awm chu a ni. Hun tha an lo nei tawh a, kan zavaiin kan tang ho ang a, kan nawr ang tih te kha chu a chi hian a chi loh, Champhai tlangval khi tangho eng ang mah ila ke hian Aizawl hi nikhatah kan thleng dawn lo reng reng, khatiang thil kha a awm ve a ni

Tunah kan hotuten ruahmanna thar an rawn neihah hian lawmawm ka'n tih deuh mai chu Mizo hnam hrisello tak maiin keimahni kawtkaia College kan han nei tur lai tak mai kha a ni a. Zozam chanchinbu June ni 1, 2012 in a tarlan dan pheichuan zuk

leh hmuama Mizo ten kum khata kan senral ringawt hi cheng vaibelchhe 150 a tling a ni. Cheng vaibelchhe 150, chu chu Zozam Times June ni 1, 2012 khan a rawn lang a ni. Vaibelchhe 150 a nih chuan Mizoram mipui 2011 chhiarpua nuai 10 velin per head a an han tih khan meizial zuk nan hian mipakhatin kum khatah ₹ 1374.86 zel seng ang kan ni. Chumi in a hrin Chiang tak erawh chu hnam hrisello tak kan nihna hi a ni.

Mumbai ah te pawh kan kal thin a, Kolkata ah te pawh cancer awmna hmun apiangah mi kan tam emaw tih mai turin Mizote kan hrisel lova. Tunah hian Mizoram sum hi min ei nasa bertute zingah kan hriselna lam hi a ni a, sorkar hnathawk 50000/60000 velin kan M.R. bill ringawt pawh hi kumkhatah vaibelchhe 80 a tling a, hei hi a zahthlak a ni. Niminah kan Finance Minister khan a rawn sawi a, vaibelchhe 80 zet mai sorkar hnathawk 100000 pawh tling lovin kan seng ziah a nih chuan hetah sorkar hna pawh rawn thawk lo thingtlanga kan hotuten an sen ral pawh hi a tam ang tih ring ila, kan hriselna chungchang hi chu lulet a kan ngaihtuah hi chu a ngai ve hrim hrim a ni. Helai hi kan ngaihtuah ngun a ngaiin ka hria a, vai ramah kan in refer a, a kalpuitute a lo ngai a, kan chhuk thla hum hum a, payment a lo nih tak si lovah chuan damdawiinin uar takin bill an lo siam a, Zoram hian sum kan ba tawk tawk mai a. Tunah ringawt pawh hian vaibelchhe 30 vel hi phai ram damdawi inah kan ba ni awm tak a ni a, khunglai phai ram damdawiin ah. Khatiang kha a ni a, hetiang Medical College te Mizoramin kan lo din ve theih hun ni te a thleng a nih chuan, hetiang sum tam tak vairama liamthla duak duak thin leh kan leibat kan phur min tirittu tam tak ang chi hi Zoram leilung ngeiah hian kan vawmbei turah ngai ta ila a pawimawh khawpin ka hria.

Education te pawh kan sawi kai deuh na a, zirlai tam tak college tha kan neih loh avanga phai rama kal te hi pawh kan ti thin a. Tunah pawh hian tam takin kan hriselna chungchang avangin vairam hi kan pan mek a, kan ram te kan hralh a, kan in leh lo te kan neih thinglung khawngin kan neih zawng zawng kan hriselna lei nan hian kan hmang ngam a ni si a. Chumi kan leina lah chu a man teltute phai vai vek mai an ni si a, helaiah keimahni kawtkai ngei maia college kan neih hun hi kan hmahlir a ni tih ka

sawi duh a. Guwahati Medical College bulah khuan kum 2 vel in luahin ka awm ve tawh thin a, khu college a zirlai leh ha doctor rualte an han awm a, an han che vel leh mipuiin an han pan nasat thin zia te ka ngaihtuah a. Mizoramah college hi kan han nei ang a, super specialist thlenga kan neih chhoh theih phei chuan vai ram hi kan bawr kan bawr tawh lo ang a, sumdawng mite leh a mamawh zualin an pan te hi chu loh theih loh a ni ang a. He kan hriselna kan chan chhiat lutuk avanga nei leh neilo a inthlahrung chung chung a kan zuk pan thin ang chi hi a bo tawh ang a. Tin, hetah office lamah pawh kan sorkar sum hi a hek hlawk hlawk tawh lo ang tih hi kan hma thlir a ni.

Amendment te pawh kha a rawn rawt a, tha ka ti khawp mai a, amaherawhchu resolution puluttu ten ngun taka an rawn ngaihtuah a an rawn tih dan tho kha kei chuan a la thain ka hria a. I.R. te pawh kan han ti a, Mizoram phurrit hi a ni nasa lutuk a, khatiang deuh hlek khan kan kal zelna turah hian uluk taka kan ngaihtuah chhonzawm hi chu a ngaiin ka hria.

Tin, hmannah khan kan Opposition lian bera kan hruaitu pakhat khan “Mizoin mithiam pawh kan la nei lo a” tih kha ka rilruah a awm a. Mizo fate hi doctor thiam tak tak kan awm tawhin ka hria a. Kan Chief Minister zahawm tak ni thin Pu Rama rawn sawina kha chanchinbuah khan ka lo hmu a. Kan mithiamte hi vairamah tam tak an thawk tawh a. A tak takah chuan University kan dinna turah hian mithiam hi kan mamawh hmasak ber an ni lem lo. Mithiam chu an pawimawh ngei mai, Mizoram University kan din dawn pawh khan mithiam kan la ngah si lova, professor pawh kut zungtanga thliah tham lek mai hi kan la nei si a. Chuvangin University hi kan din dawn a nih si chuan kan mithiamte hi tlemin han intuai hriam leh rih sela, kum 10 emaw te nghak leh ila, annin a post an chan theih chat chat hunah University hi kan ti dawn nia tih ngaihdan lian tak kha a awm a ni.

Amaherawhchu kan han din a hei, a zirtirtu tak takah chuan mithiam na na na chu hnamdangte pawh kha an lo tha fe ve tho a. Tin, kan Mizo te pawh thiam chu

an lut an lut a. A tirah Vice Chancellor nihna te pawh kan chang nghal mai lo, mahse tunah University-ah pawh kan chang chhunzawm chho ve ta mai a. A hotu, administrative hotuah Registrar ang level-ah te pawh Mizo kan awm chho kan awm chho ve ta a.

Vawikhata naupiang a puitling nghal thut lo ang hian tunah pawh kan din chho ang a, tlem tlemin gradual process kha a ni ve hrim hrim a ni. Chuvangin, ngun takin ngaihtuah ila, a puitling nghal sa khup leh engkim fel sa thlup, MNF ten, MA/BA te pawh duan sa thlup” an han tih ang te kha, khatiang deuh kha neih sa kan tum a nih chuan a harsa ang. Chuvang chuan, kan phak ang tawkin kan sorkarin uluk taka kan thlir a, kan tih chhoh bek bek a, puitlinna lam kawng kan zawh chhoh hi chu a ngaiin ka hria a.

Tin, tawng pawh kan intawng harh chho ve hrim hrim ang. A fel sa lutukah hi chuan mi hi kan fel hlei thei lo a nia. Kan thianpa pakhat chu M.A. a nih thlengin a chungten admission an lak sak thin a, M.A a nih thleng khan admission lak dan pawh a la thiam lo a ni. A fel sa thlup thlup lutuk khan a kal a. A thente erawh chu P.U an nih atangin anmahniin admission an la a, an fing em em a, thil tih dan pawh an hria a. Khatiang khan engemaw chen hi chu kan han ti rawih a, kan han chho deuh nawk nawk a, keimahni pawhin kan chhar chhoh teuh tur mihring puitlinga min siamtu tur hi kalkawngah hian a awm ve a ni tih kha kan hriat a tha. Keini hnam hrisel lo tak hian Medical College neih hi kan phu ngawih ngawih a, chumi nei tura kan hruaituten ruahmanna leh ngaihtuahna tha tak an lo nei hi a lawmawm ka ti a. Chuvangin, kan resolution neituin khatianga a rawn ti kha a lawmawm ka ti a, ka rawn thlawp a ni. Ka lawm e.

DEPUTY SPEAKER : Hun i hmang thiam khawp mai. Dar 1 : 00 PM chawlh hma-in pakhat tan chuan hun a la awm a. Tunge sawi leh ang le? Tumah in phar lova, in phar loh chuan kan tih dan tur chu kan sawihona kan duh tawk a nih chuan a concerned

Minister kan sawm ang a, chumi zawhah Motion neitu, chutiang tur chu a ni a. Chumi tur chuan kan hunin min daih hmel si lova. Chuvang chuan kan chawl hma mai dawn em ni ang?

Member phar kan awm tawh lova. Minister-in 15 minutes chhunga a sawi leh a move-tu nen. Chuvang chuan Dar 2 : 00 PM a kan luh hunah chuan Minister kan sawm ang a. Chutiang chuan, engpawh ni se, Chair thu thu a ni a, theih loh tih kha a awm lo. Kan Rules ah khatiang kha ziak a ni lova. Chair thu thu a ni a, member te zalenna a la pek duh leh Chair thu a ni a. Chutah Minister-in a sawi nghal ang tih kha chu Chair thu thu a ni. Tunah chuan kan chawl rih ang a, Dar 2 : 00 PM ah kan lut leh dawn nia. Recess till 2:00 P.M.

2:00 P.M

DEPUTY SPEAKER : Kan resolution sawiho mekah chawhma lam khan a move-tu nen member paliin kan sawi a. Tichuan hun tawp hmain phar kan awm ta lova. Chuvangin tihdan tur kha ka sawi a, Minister sawm a, a move-tu sawm leh kha kan hunin min daih si lova, kan thutkhawm leh hunah Minister sawm a a move-tu sawm mai kha kan tih tur pakhat awm thei a ni tih kha kan sawi a. Amaherawhchu, ngun taka kan ngaihtuahin member te zalenna han innek chep lutuk pawh kha hei kan resolution pawh hi lawmthu sawina lam te a ni a, lawmthu sawi duh tam tak pawh kan la awm ang a.

Chawhmaa in phar lohna chhan pawh kha, hun te a tepter a, kan rilte pawh a tam deuh tawh ni te pawhin kan hria a, chuvang chuan member te zalenna pe lova han inkhar mai a kha Chair lam atangin member te kan duhsak che u a, kan sawiho leh phawt ang a, tunge han sawi tan ang le? Aw Er. Lalrinawma.

Er. LALRINAWMA : Pu Deputy Speaker, ka lawm e. Vawiinah resolution tha tak mai 'Medical College nei tura hmalak mek hi a lawmawm kan ti' tih

kan han nei a, a lawmawm khawpin ka hria. Kan lawm tlang vekin ka ring a heng Medical College din tur thua hi chuan.

Amaherawhchu, Medical College hi thil harsa tak niin a lang a, hun rei tak atang tawh khan tumna te pawh a lo awm chho tawh a. Chutih rual chuan vawiin thlengin puitlinna tak a la awm thei lova, tun hunah hma lakna te pawh a kal chho a ni a. Amaherawhchu, Medical College neih hi a chakawm rualin a hautak awm mang e aw tih te rilruah a awm a. Vawiinah pawh hian kan neih tum dan te leh kan hmalak dan te kan ngaihtuah a, hmalak tur hi a va tam dawn em ! sut tur hi a va tam dawn em tih ka'n ngaihtuah a. Chutih rual rual chuan kan thlang lawkah Shillong-ah te pawh an lo nei tho alawm mawle, tiin ngaihtuahna te pawh kha a vak vel a.

Tin, nizan khan ka thiam ang angin Regulation 1999 (Amendment upto July 2015) Medical Council of India 'Minimum standard requirement for Medical College for 100 admission annually' tih hi ka en e ka ti a. Hetiang han fulfill tur phei chuan ava han rura dawn e aw ka ti a, dar 12 thleng dawn mai ka la bei a. Chutah mai pawh chuan keini hi kum tin seat 100 tur a lo ni ta a, khatiang khan staff ringawt pawh hi clinical-ah hian 256 vel an lo ngai a. Chu mai bakah junior resident an tih a hniam deuh ber ti mai ila te leh technical staff kan tih Professor, Asst. Professor leh khatiang neuh neuh ho MBBS leh chunglam Master degree nei kan tih ang chi pawh kha Non-Clinical lamah 132 lai a lo ngai a. A pumpui thua chuan kum tin seat 100 nei tur hian staff ringawt pawh saw, Ancillary service nen chuan 528 vel bawr a ngai dawn a lo ni a. Chu mai piah lamah chuan khang staff 528 zingah khan MBBS leh a chunglam Master degree nei ho ang chi kha 206 vel a ngai turah an tehkhawng atang hi chuan ka han chhut chhuak vel e ka ti a, kan tih loh lam a ni a, hriatthiam viau phei chu a har sa a. Amaherawhchu, a hautak thawkhat ang tih kha chu a lang chiang em emin ka hria a.

Minimum qualification an lo ti leh a, helaiah hian a bu a awm a, internet-ah pawh khan a lak theih a. Medical Council of India minimum qualification for teachers in Medical Institution regulation, 1998 a ti a, May 2015 thlenga amend kha a ni a. Hetah hian qualification kha a lo tarlang leh chiaih chuai mai a, khang degree mai kha a lo duh tawh lova, paper chutiang khatiing an lo present tawh tur a ni tih te, teaching-ah kum li/kum nga experience a lo nei tawh tur a ni tih te zawng zawng kha a lo inziak leh bawh si a. Heng a tehkhawng han sutlang tur hi chuan a va huphurhawm e aw ka ti a. Political commitment hi a ngai a ni ber lo maw le, keini ram kilkhawr atang hi chuan tun hunah pawh doctor indaihlohna a nasa a, tuna kan specialist thiam ber berte pawh hi han ruai dawn ta ila paper present engzat nge an neih tawh, teaching experience kum engzat nge an neih tawh tih an han inzawt ang a, kan tla leh tho mai lovang maw le tih te pawh kha rilruin a han dap a. A huphurhawm hle rualin hmalak hrim hrim erawh kha chu a tul a, hma chu kan han la a ni a.

Tin, a pawisa thu hla a pawh hi lo nei thei ta tehreng pawh ni ila, a faculty lampang hi chuan kan buai dawn a nih hi mawle. Chuvang chuan engpawhnisela, hmalakna a lo awm hrim hrim a, helai resolution-a a lo awm hi chu a lawmawmah ngai ta ila hmabak tih tur kan nei a ni. Tin vawiihah doctor thiam tak tak te he ramah hian kan inchah lut chho thei ang em? Anih loh leh NEIGRIHMS ah te pawh helai a criteria tak hi chu an tlin bik lo ve an ti a, ram laili zawkah te pawh, khatiing zawng zawng kha a lo nih si laiah chuan eng anga hmalak tur nge ni ang tih te pawh hi beng sikin ngaihtuah a ngai a nih hi mawle tih te pawh rilruah a awm a.

Tin, rilruin thil thui deuh te an dap bawh a, 2007-2008 vel chho khan Catholic Bishop Conference of India hote nena thawhhona thuthlung te pawh neih tum rum rum te pawh a lo ni a, rilruin ar bo a zawnna lamah khangte pawh kha ka ngaihtuahtuah chhuak a. Anni Roman Catholic ho hi zirna lam hi Pathianin a pek niah ka ngai a, kan ramah pawh an contribution hi a tha khawpin ka hria a. St. John Medical College-te pawh hi lian tak a ni a. Khatiingte kha lo ti ta ang sela chuan, helaiah kan

theih ang tawk lo ti vein, annin khulam atangin mithiamte rawn thawh chhovin mithiam tha zawkte kan lo chah lut thei lawm ni tih te pawh rilruin a dap kual a. Amaherawhchu, 2007-2008 chho velah inthlan te puan a lo ni a, bawhzui te a awm lova, kan sorkar kal mek te pawhin a lo mangnghilh palh nge ni, remchang lo riau te pawh a nei turah ngai ila, han bawhzuina lutuk kha a awm ta lo niin ka hria a. Kha thil kha sap chanchinbu lamah te pawh a lo chhuak ve a. Engpawh nise, vawiina hmalakna hrim hrim hi chu a lawmawm a, tan lehzuai a ngai a. Tin, Civil Hospital atangin Referral Hospital-ah nurse 33 lai te pawh kan han sawn phei a, sawm lai phei chu an release tawh niin ka hria a. Nurse, Civil ami te pawh an hah phah khawpin ka hria. Engpawhnise, a hmalakna hrim hrim hi chu a lawmawm tih chu kan pawm tlang vekin ka ring a. Chutihruai erawh chuan keini ang state kilkhawr leh harsa leh engemaw tan chuan central lam atanga tih dan te hi a awm lawm maw ni chu aw tih te pawh kha rilruah a'n awm a.

Nichinah khan kan senior MLA zahawm tak khan a sawi tawh nghe nghe bawk a, central Medical Collage tur hian ti ta ila, a nih loh vek pawhin nichina ka han sawi ang deuh khan tute emaw thawhpui tir ila keimahnin kan tlin lo a nih pawhin chuti a nih loh chuan ti ve tingtang si hian chhe deuh hian kan chhuah ang tih te pawh a hlauhawm a. Nichin kan chawlh chhung lawk khan nu pakhat titi an sawi ka hria a, "Mizoram Medical College kan din ang a, phaiah min refer hi an phal si lo ang a, kan thi zut zut mai ang a," a ti e an ti a. Khatiang khan Medical Collage nei ve tingtang si khan tha vak mang lo neih te pawh kha a hlauhawm a. Engpawhnise, ram thang zelah kan mamawh a, neih tur pawh a ni a. Chutih rual erawh chuan hun a lo kal a, The Indian Medical Council Act te an han amend chhoh zelah hian an requirement hi a khirh chho tawlh tawlh mai hian a lang bawk si a, helaia an dan rawn siam thar zelte en hian. Kan tih hma erawh kha chu a tha a. Political commitment te a awm chuan, heng tehkhawng pui pui lo te pawha, kal dan a awm thei turah ngai ila, politics levelah te pawh kan lo sawi theih a, emaw north-eastern region kan lo nih vang te, tribal area kan nih avang tein ngaihnhnathiamna thui deuh min nei thei a nih chuan kal thei ve zel turah te pawh ngai

ila. Amaherawhchu, tun hunah helaia an tehkhawng ringawt en hi chuan a huphurhawm hlein ka hre mai a. Chulai chu ka'n sawi duh a.

Engpawhnisela, politics khawvel a ni a, democracy a ni a, mipui lalna ram a ni a...(DEPUTY SPEAKER : Independence te pawh kan tum a, central tel lova din te pawh kan tum a ni lawm ni? Kan va huphurh hma ve Medical Collage pakhat ringawt chu.)

A za deuh nge ni, Chair atangin i rawn react tlat mai a, Pu Deputy Speaker. Thil dangdai tak a ni a, kha kha chu a chhinchhiahtlak ve hrim hrim ang a. Thu ropui tak kan sawiah ngai ta ila, kan lawm tlang viauin ka'n ring phawt a ni. Engpawhnise, khalai kha ka'n sawi theih ni ta se.

He Medical College din theihna tura hmalak mek lawmawm kan ti a ti a, a move-tupa MLA zahawm tak hian Falkawn-ah han ti nghe nghe se chuan a lawm lehzual ka ring a. A move chhan hi a biala a awm dawn deuh vang nge ni te pawh ka ti deuh rum rum a. Ani pawh khan Falkawnah ni thei hram se te pawh kha a ti a. Engpawhnise, a hmalakna tur hrim hrimah hi chuan kan lawm vek chuan ka ring a.

Chutih rual chuan, kan nei rau rau a nih chuan ruahmanna tha zawk, entirnan, nichina kan sawi Medical college lian tham zawk, keimahnin faculty tha kan hmuh theih lohva thih hlau rum rum te pawh kan lo awm a nih si chuan, mithiam zawk, tha zawk kan chawk chhuahna tur kha kan ngaihtuah ngaiin ka hria a. A chhan chu Medical College hi college a ni satliah mai lo, Pathianin a anpui mihring a siamte enkawlina a ni tlat a ni, thil dang ang lo a ni. Heng khawl leh thil dang damdawi inin a mamawh zawng zawng hi chu kar khat chhungin company-ah kan order ang a, kan hmuh theih mai ka ring. Ram te pawh kan duh a nih chuan kan hmu mai ang, amaherawhchu, mihring thiamna erawh chu nikhat thilthua tuk chhuah theih a nih loh avangin khang, tunhmaa hma an lo lak tawhna te pawh kha chhuizui te pawh a tha tho maithei a. Khang a lo ni lo a nih pawhin mithiam tha zawk he rama kan chawk luh a, Pathianin a anpuia

mihring a siamte ngei hi a zahawmin a ropui a, chung enkawl tura rawngbawl tur an nih avangin mithiam tha, changtlung zawk, mite thinlung damna ram khawpa tha kan ngaihtuah chhuah chu a ngai a ni tih kha Pu Deputy Speaker, ka'n sawi a ni e. Ka lawm e.

DEPUTY SPEAKER : A lawmawm e. Pu Zodintluanga a phar hmasa a, i lo sawm ang.

Pu ZODINTLUANGA, MINISTER : Pu Deputy Speaker, vawiinah kan ram ngei maia Referral Hospital kan neih theih dan tur he House zahawm taka kan han sawi thei hi a lungchhiatthlak rum rum ka ti a. Leader vision nei a pawimawhzia a tilang hlein ka hria. Congress sorkar hmasak lai khan kan ramah hriselna lamah te, a enkawlna lamah te kan la harsa em em a. Damlo kan awmin phaiah, Delhi-ah, Vellore-ah, Gauhati-ah te kan inthawn thin a. Khatihlaia kan sorkar, kan Chief Minister ho khan kan ram ngeiah hian Referral Hospital kan neih a ngai a ni tiin hma an la a.

Chutih rual chuan Shillong-ah pawh NEIGRIHMS te pawh hmalak ve a ni a. A rualin central sorkarin an rawn sanction ve ta cheng a, a ngaihna hria kan sorkar kha a'n tla ta hlauh mai a. Sorkar thar a lo piang a, pawisa sawi chhuah sa kha hma an han la ta a. A hmingin keini opposition thalaiah kan awm a, kan va tlawh ve thin a, kan mangang a ni, Pu Deputy Speaker. Hospital lam sak zai reng reng rel lovin a quarters lam kha an sa mup mup mai a. An sorkar term hnih a tawp dawn phei khan chuan ar vulh nan te, kel vulh nan te khan Referral Hospital atana sorkarin a lo ruahman sa te kha an hmang thin a ni.

Nichin lawkah ka hmaah Er. Lalrinawma khan a rawn sawi a, kum 2007 te phei kha chuan ar bo zawn ngai khawpin Roman Catholic te kha biak an ngai ta a ni. Pu Deputy Speaker, kan ramin roreltu tha, leader tha, vision nei tha kan neih loh chuan khatiang hun kha kan tawng thin a ni. Vawiinah sorkar thar duhawm tak a lo piang leh a, sorkarin Medical Collage kan neih theih dan tur vawiinah he House zahawm takah kan

han sawi leh thei te hi vision nei tha leader kan neih vang a ni tih hi a chiang em em mai a.

Ka bial kawng a ni a, opposition kan nih lai pawhin kan kal thin a, sawlaiah Referral Hospital tur kan ti a, hahipa kan lo sawi thin an han sa a, a tawp rup mai a. Kan han kal thin, hmuh a hrehawm em em a ni. Kum 1998-a sorkar thar a lo pian leh 2008 inkarah khan Mizoram mipuiten chhawrna kan nei lova. Kum 2008-ah sorkar thar a lo piang a, kan leader hnuaiah kan Health Minister chak tak Pu Lalrinliana Sailo ten hma an han la a. Pu Deputy Speaker, bial fangin kan han tlan tlang leh a, bial kan han fana nuam em em chu ar vulh nan te, kel vulh nan tea an hman thin kha mihringin, miharsate, miretheiten damna tam tak an chanp hah a ni. Chung chu leader vision neih thata ramin hma a sawnna a ni.

Vawiinah vision a nei tha alawm te kan inti thin. Hei hi Pu Deputy Speaker, sawi tel talh ka'n duh chu, tunkum kum tawp emaw lek a Tuirial Hydel Project hawn theih tura a rawn awm ta ringawt mai te hi kan sorkar loh chhunga an hmanrua zawng zawng la bo khawpa total bandh neih hnan te kha han ngaihtuah let chuan a uiawm a ni. Referral Hospital te hi kum sawm kha tihchhiat ni lo sel chuan vawiinah hetiang Medical Hospital tana sawi sawi ngai lo hian a ding ang a, amah leh amah kha a rawn ni ut tawh tur a ni. A bul atanga tan that a ngai a, sorkarin sum ngaihtuah leh a ngai a. Tunah sawn hmun hrang hrang atanga pawt khawmin building thar nen bul kan han tan tha leh a ni a, kum sawm zet a ral tawh hnuah, chutiang chuan mi tam takin kan chhawr tan tawh a ni. Kan bial atang te, thingtlang hmun hrang hrang, mi harsa tam takin saw damdawiin atang sawn damna an chang chho leh mekte hi a lawmawm ka ti a.

Vawiinah Pu Deputy Speaker, hetiang ang debate neih theihna tur atan hun rawn inhawng te hi sorkar, vision nei tha leader-in a kaihhruai vang a ni tih hi a chiang em em a ni. Chuvangin Pu Deputy Speaker, vawiina member zahawm tak, Pu K.S Thanga Resolution 'Medical College nei tura hmalak mek hi lawmawm kan ti' ti hi ka rawn thlawp e.

DEPUTY SPEAKER : Lawmawm e, hun in hmang thiam hlawm viau e. Pu John Siamkunga.

Pu JOHN SIAMKUNGA : Kan resolution hi kan member zahawm tak, Pu K.S Thanga rawn putluh hi a that em avang leh kan pawm tlang em ni a ka hriat avangin sawi loh ka lo tum zet tawh a. Amaherawhchu, kan hotuten an han sawi neuh neuhah khan tlem azawng han sawi ve ka duh a.

Mizoramah hian hrisel lohna nasa tak kan nei a, kan awmna hmunte a han pilril angreng a. Chumi a nih avang chuan dam duhin phai lamah kan liam thla nguah nguah reng a ni. Khatiang dinhmunah khan kan ding a, harsa tak chung pawhin, puk chawp pawhin kan liam thla tawk tawk thin a. Hun rei tak hei hi kan lo tuar tawh a. Mizoramah damna zawngin theihtawpin kan han ti a, kan doctor thiam tak takte kan han bel a. Tih theih loh chin a lo awm chinah khan Mizoram chhuahsanin phai lamah neih thinglung khawngin kan kal thin a ni. Khami kha a kiang thei dah law maw tiin kan sawrkar hmasa, tun hma 1998 vel hmalam atang tawh khan mut mawh hnar mawhah neiin, Medical College-te hi nei ve ta ila, phai lama in refer ngai lo hian, helai hmunah ngei hian damna kan chang ve thei dah law maw tih rilru puin, kan leader, kan Chief Minister zahawm tak hma thlirna chutiang chuan bul lo tan chhoh a ni a. Vawiinah chuan a rah kan han hmu dawn tan ta hi a lawmawm hle in ka hria a.

Tin, a hmun saw a tha thawkhat a ni tih hriatna chu, nichinah kan hotuten an rawn sawi chhuah tawh kha. Roman Catholic hotupa ber, India ram ami Nuncio ho hian an rawn en vek tawh a. Tah chuan St.John's Medical College, Bengaluru ami, khata kan Father, khulaia thu tak takte kha an rawn tel bawk a, 20/30 dawn kha an lo kal a ni. Kan pheih ve duah duah a, kei pawhin ka va enpui ve a. St.John's Medical College khu UGC in 5 star standard a pek a ni a, a grade a tha em em a. Chumite pawh chuan hmun tha, belh tlakawm, Medical College dinna atana remchang tak a nih thute pawh an

sawichhuak a ni. Chutiang hmun ngeiah chuan tunah hian Mizoram sawrkarin theihtawp chhuahin, harsatna engpawh lo thleng se hmachhawn zel tumin vawiinah hian kan han din dawn a, kan hotuten hma an han la chho mek a ni a.

A tirah chuan kan changtlung hauh lovang tih hi kan ring tur a ni a. A pawimawh berah chuan, guidelines hi chu a awm na meuh mai a, Medical Council of India chuan a minimum standard a rawn duang ang, chu minimum standard-te vawilehkhata neih vek tur tihna a ni reng reng lo tih erawh chu kan hriat a tha. Mizoramah kan hriat em em Education Department hnuaiah pawh school din tur tam tak chuan minimum standard kha an meet tur a ni, an thleng pha tur a ni tih a ni thin a. A location-te, a awmna hmun te, chu bakah naupang hriselna atan te khan a tha tawh em, khawilaia mi in remchang lo takte luah a ni em tih te leh naupang engzatnge a neih tih te, engkim kha tehkhawng a awm ve vek a ni. Mahse, chuti chung chuan Mizorama school din reng reng hian minimum standard kha an din tirha pha an awm ngai lo reng reng a ni. Mahse, an han din a, an han kal a, kum engemaw zat hnuaiah chuan minimum standard an rawn phak chho mai ni lovin an commercialized a, eizawna atana tha tak tak leh zirna tha tak takte a rawn ni chho a ni.

Tin, kan hotute hmalaknain tunah hian Lengpuih khuan Jesuit Fathers hoin College rawn din an tum a, hma an la tan mek tawh a, kan Higher & Technical Education Minister zahawm tak te pawh a office-ah khan an hmu a. Tukin thlenga kan la inbiaknaah chuan hma an rawn la la zel dawn a. Khawvel ram pum 32 ah hian College ropui tak tak, University ropui tak tak titute an ni a. Kerala-ah phei chuan Loyola College khu an ta a ni. Khatiang khan hmingthang tak takte an ni a, chu chu hma an rawn la dawn a. A tirah khan minimum standard kha a qualification hrang hrang atang khan an tlin hauh lovang. Amaherawhchu, an han din ang a, anni pawh an din a, a kum a liam a, a liam zel a, a tha chho tulh tulh thin a ni. Chu chu, kan Medical College dinhmun tur tho saw a ni a. A tirah tha vek, faculty lam pawh changtlung taka awm nghal ut tura kan ngai a nih chuan, mitdawivaih thiamin vawilehkhata a kut atanga parva a pawt chhuak ang

kha a ni dawn reng reng lo, hmasawwna hi vawilehkhata thil thleng thut tur a ni dawn lo va.

Vawiinah tumruhna nena he sorkarin hma a lakna hi engtikniah emaw chuan a full-fledge in a la ding dawn a ni tih ring chungin he sorkar hi huai takin a kal mai zawk a ni tih kha kan hriat a pawimawhin ka hria a. Chuvangin, Mizorama damlo tam tak phai lam kal ve thei lo, an chhungten an en ngawih ngawih thin, thih mai hmabak thin te, khatiang mi tam tak te khan beiseina thar nen he Medical College din tur hi an lo nghak ve ngei ang tih ka ring a. Chuvangin, he Medical College lo ding tur hi a tirah ropui em em in ding lo mahsela, a din tirhah chuan lo tlawm hle mahsela sorkar tumruhna avangin nakinah chuan chhenfakawm tak, Medical College ropui tak ala nih chhoh ngei kei ka la ring a. Chumi a nih avang chuan nei tura hma kan lakna hi a lawmawm em a, ka rawn thlawp ve a ni e. Ka lawm e.

DEPUTY SPEAKER : Le, tunge ni ang ? Dr.K.Beichhua.

Dr.K.BEICHHUA : Pu Deputy Speaker, ka lawm e. Mizoramin Medical College kan nei tur hi a lawmawm a. He resolution hi a lawmawm lo ti a lo tan ve ngawt chi a ni lo tih hi Mizoram mipui ngaihndan a nih ka ring a ni. Khawvelin Science & Technology-a sang taka ke a pen lai a, keinin Medical Science-a ke pen ve theihna tur kawng kan hotuten vawiina min hawnsak hi a lawmawm takzet a ni. Lawm lo kan awm ka ring lo vawiinah hian, mahse a lawm ringawtah hian tawp lo ila. Hmalaknaah hian ram tan engnge tha ber ang tih hi ngaihtuah ang u tih kei chuan ka sawi duh a ni. Kan lawm rual rual hian kan thil lawm tak hi engnge ni tih erawh chu kan chian a tulin ka hria a. Thil tha tak hi a neitu azirin a thain a tha lo thei a ni. Thil tha hi kan political commitment a san chuan a aia tha lehzualin a siam theih tih hi a chiang ber ber tu kan nih ka ring.

Pu Deputy Speaker, vawiina kan ram dinhmun, kan sum leh pai leh kan economy dinhmun ngaihtuah hian kan ram hian Medical College hi kan run dawn a, a lawmawm a. Run lo ang u ka ti miah lo. Chutih rual chuan a aia thil tha hi a awm lo maw tih hi kan rilru hian dap ila thain ka hria a. Vawiinah state tam tak te chu central-in a fund bawk, central-in a manage sak bawk tam tak an awm tih kan hria. Keimahni ramah ngei pawh hian institution tam tak kan nei, Mizoram University kan nei, central-in a run, zahpuiawm lo tak a ni.

Tin, chu lovah Indian Council of Research hnuaiiah Vety College kan nei a, a zahpuiawmlo viau a ni. Tin, Regional Institute of Para Medical and Nursing kan nei leh a, state dang atang te pawhin an lo kal teuh a, a chhuanawm viau a ni.

Tin, Indian Council of Research hnuaiiah Horticulture College pawh kan hotuten hma in la leh mek a, hei pawh hi chhuanawm tak a nih ka ring a ni. Chuvangchuan, central-in kan rama min fund-a minrawn run sak hi keini tan chuan hlawkna hliir a niin ka hria a. Tuna kan neih tawh sa te pawh hi chhuanawm tak tak vek an ni.

Pu Deputy Speaker, Medical College hi chi hrang hrangin a run theih a ni. Pakhatnaah chuan centrally funded and run by central government kan tih ang chi, kan hriat thiam nan example-ah AIMS, New Delhi hi 1964-a an din a ni a, helai hnai vaiah chuan RMC kan ti a, RMC a nih lai chuan North East state pasarih ten kan run kha Regional Institute of Medical Science tiin tunah chuan central-in a fund bawk a, a enkawl bawk a. Post Graduate zirna nan tunah chuan institution changlung tak dinhmunah a awm a ni. Chulovah chuan kan thenawm hnaiteah NEIGRIHMS kan nei bawk a, Shillong-ah. Tin, heng central-in a fund leh a manage hi kum tinin state dang dangah hian an nei thin a ni. 2006-ah chuan Bhopal, Madhy Pradesh-ah, Jaipur, Chhatisgarh-ah an nei bawk a.

Bhubaneswar-ah Odissa an nei a, Patna Bihar-ah an nei bawk a, Jaipur, Rajasthan-ah an nei bawk a, chutiang bawk chuan Uttaranchal ah 2006 khan Central-in a din sak a ni.

Pannihna-ah chuan state own Medical College vawiina kan khel mek hi a ni bawk a ni. State hausate chuan pakhat mai pawh nei lovin Karnataka te chuan tam tak an nei tih kan hria.

Chuloah chuan nichina kan sawi trust kan tih ang chi society run Medical College te pawh kan nei a. Example-ah chuan CMC Vellore te, Ludhiana te, St. John's Medical College kan tih ang chi te hi an ni.

Tin, palina-ah chuan PPP Mode pawh hian a run theih a ni. Chungte chu tuna Sikkim-a Manipal College kan tih te khu college tha tak a ni. Hengte pawh hi Karnataka College nen PPP mode-in an kal a, a tha em em a ni. State dang tam tak te chu chutiang dinhmunah chuan an awm a. Chutih lai chuan vawiinah chuan he Medical College hi he kan state hian i run lovang u, i veilam ami te hian kan ti miah lo, Pu Deputy Speaker. Eng hi nge kan state tan tha ber ang, he kan thil lawm em em hi engnge ni? Engtin nge kan kal pui ang tih zawk hi a ni vawiinah hian kan ngaihtuah ngai ni. He Resolution hi kan do miah lo tih ka sawi duh a ni.

Pu Deputy Speaker, kum tin deuhthaw hian central in a grant an awm thin a. Kum 2014-ah pawh khan state paliah a pe leh a ni. Chungte chu Andhra Pradesh-ah, W. Bengal-ah, Maharashtra-ah, Uttar Pradesh-ah te hian central-in grant a pe bawk a ni. Chuloah kum 2015-ah khan paruk lai central hian state hrang hrangah a pe leh a. Chungte chu Jammu & Kashmir-ah a pe a, Punjab-ah a pe bawk a, Tamil Nadu-ah a pe a, Bihar-ah a pe a, Himachal Pradesh leh Assam-ah pawh AIMS a din hial a ni. Chutiang dinhmunah chuan a awm a. Heng

centrally run Medical College-ah te hian 50 seats hi state-in a chang a, a dang chu Central-in allotment a siam a ni.

Tuna Mizoram medical college turah hian 80% kan chan tur ni ta se, tichuan state sum indaihlo chung chungin college hi run dawn ta ila, Medical Council of India-in a prescribe ang a kan tih leh theih siloh hlauh chuan a pawl lutuk dawn a, a petu hian a de-recognise ve thei a ni tih hi kan theihngihl loh a tha hlein ka hria a ni. Kan fate doctor chanveah kan chhuah mai ang tih hi a negative deuh hleka han thlir chuan thil awm thei a ni a. Mahse, chu chu awmlo turah ngai ila. Chutiang dinhmunah chuan vawiinah hian kan awm mekin ka hria.

Keini ang state rethei tan chuan teaching faculty tha hi a harsa tih chu thil Chiangsa a ni a. Tunah pawh hian harsatna a awm chho ang a, mahse harsatna reng reng chu kan tet te atangin problem hi mathematics kan zir tirh atang hian solve tura zirtir kan ni a, kan solve turah inngai ila. Heng zawng zawng avang hian political commitment sang tak nen kan nawr chuan Pu Deputy Speaker, vawiinah hian kan awm ngawih ngawih state dangin an neih hi keini hian engatinge kan neih loh ang? tih hi ka dinna a ni Pu Deputy Speaker.

Chutiang a nih avang chuan, vawiinah hian member zahawm tak tak i veilama hian he resolution hi kan pawm lovin kan do a ni reng reng lo, kan lawm a ni. Medical College kan neih tur chu changlung tak, ro tling, kan tu leh fate tan hian engtin nge tha takin a kal ang tih hi kan ngaihtuah zawk a. Pu Deputy Speaker, ngun taka kan ngaihtuah a thain ka hria a. MNF hun, Congress hun tih leh inmahchhiat hian thil tha a chhuah dawnin ka hre lova. Congress hun laia an ngaihtuah chhuah a ni a, engemaw chen an lo thawk a. Congress-in ngaihtuah chhuak lo se a lo piang lovang a, MNF in vawiin thleng turin tun ang sawn hma la lo se khum 250 saw kan neih ka ring lo. Vawiina pawisa kan dawn chu crore 20, chu pawh chu kan la hmang mang lo. MNF thawhsaah sawn lehlamah chuan

khum 250 a la awm thei a. Chuvangchuan, party pahnih sorkar lai ve ve a hmalakna kha vawiina a la damte Pathianin rorelna hmuna a dahte hian kan responsibility a nihna angin kan chhunzawm a ni tih hi vawiinah ka sawi duh a ni.

Kan hmalama tha taka a kal theih nan engtingge lungrual taka hma kan lak theih ang? Political commitment a san chuan kan expert ten DPR siam chu an thiam lutuk, a bawhzui erawh chu vawiina he House zahawm taka thute hna hi a ni. Vawikhat mai Delhi kal lovin kal fo a zuk dil tam hi a tul dawnin ka hria. Chuvangin vawiinah he resolution hi pawm loh chi a ni lova; mahse kan lawm e, ti a thutpui mai erawh kha chu a chi loh ang a. A awhawm em mai a, hawh u, chak takin hma i la teh ang ustate pachhia kan ni si a, state dangin central fund leh run college an neih lai hian anni ang hian engati nge hma kan lak ve loh tih hi Pu Deputy Speaker, ka lo dinchhuahpui a ni e. ka lawm e.

DEPUTY SPEAKER : Dr. B. D. Chakma

Pu B.D. CHAKMA, MINISTER : Pu Deputy Speaker, ka lawm e. Hei ka academic line a nih avangin tlem chu sawi ka duh a. Mizoramah Medical College dinna tur atan hian party lam ringawt ni lovin all political party commitment a ni tur niin ka hria a.

Medical College hi Mizoram state tan ringawt a ni lo a, national asset a ni a, Medical College leh Engineering College te, Polytechnic College te leh Technical College, Institute zawng zawng hi state asset a nih bakah national asset a ni. Tun dinhmunah hian Mizoram hi zirna lamah pawh within top 5 state kan ni a. Chutih lai chuan Health chungchangah newspaper-ah pawh kan hmu thin a, MMR pawh a sang a ni. Chutiang dinhmuna awm kan nih avangin Medical

College kan nei tur hi a lawmawm a ni. Hriselna lamah Mizoramin hma kan sawn phah ang a, mipui tan a tangkai khawp ang tih ka ring a ni.

Cancer vei zingah pawh Mizoram hi top kan niin ka hria. Tin, AIDS vei tam zingah 3 (pathum)na vel kan ni bawkin ka hria. Hetiang dinhmunah hian Medical College din hi a pawimawh khawp mai.

Chuvangin Medical College hi hun remchang leh pawisa awm hun nghak lovin a rang thei ang berin tan thei ila tih kha ka duhdan a ni, until and unless we don't start who will help us. Chutiang chu a ni a, hei hi chu venture a ni.

Mizoramah RIPANS te a awm a, Lunglei-ah Nursing College te a awm a, Heng atanga nurse zir chhuak ho kha phai ramah te pawh an kal a, an tha em em a ni. Badarpur-a ka thawh laiin Railway Hospital-ah chuan nurse ho chu delivery case hi an khawih ngam lo hrim hrim a ni. Doctor hian kan khawih a ngaih phah thin a ni. Mahse Mizoram-ah chuan Community Health Centre-a ka thawh laiin RIPANS atanga zirchhuak te, Lunglei atanga nurse zirchhuak hote hi an va thiam em em ka ti a ni. Anmahni in delivery an buaipui vek a, Doctor-in kan enpui zeuh zeuh ringawt a, anmahniin an khawih vek a ni, an thiam lutuk. Chuvangin Medical College pawh hetah hi kan din theih chuan nakin zelah kum 5/6 hnuah Doctor zirchhuak tha tak chu kan nei ang tih ka ring a ni.

1st year atang chuan faculty puitling pawh a ngai lova, Anatomy, Physiology leh Bio-Chemistry ringawt, hemi subject 3 hi kan zir tan dawn a ni a. Chuvang chuan vawikhatah puitlin tak a ngai lo, heng hi chu 1st Year ah a ngai ang a. Ti khan 2nd Year leh 3rd Year pawh, chutiang zelin. Chuvang chuan kuminah emaw nakumah emaw kan hawn theih chuan a tha a ni. Faculty member zawng zawng chu vawikhatah hian neih vek a ngai lo a ni.

Anatomy, Physiology leh Bio-Chemistry heng atan hian demonstrator 4/5 vel chu a tawk a ni mai. Chuvangin Congress-in an pawm a, political commitment-ah an nei a, manifesto-ah an nei a, veilam amite pawhin rilru dang pu lovin min pawmpui se ka duh a. Political commitment, political party zawng zawngin lungrual takin he Medical College din a nih theih nan hian hma la thei ila tih hi ka duh a ni. Medical College leh Engineering College chu mahni state-a a awm chuan school zirlai ho pawhin inspiration an nei ang a. Tichuan tum mumal tak neiin school kal lai atangin PU ka zir zawh hnuah MBBS ka zir ang, Engineering ka zir ang tih kha rilruah an ngaihtuah thei dawn a ni. Chutiangchuan rilru-ah tum nei ranin high school level-ah te, middle school level-ah te tha takin zir an tum ang a.

Tunah Medical College leh Engineering College-te kan neih loh avangin High School leh Higher Secondary School ah pawh hian Science thiam zirtirtu tha tak tak tunah hian kan nei tam lo a ni. Chuvang chuan hetiang Engineering College leh Medical College te kan neih chuan zirna lamah pawh hian school naupang ten tha takin an zir ang a. Tin, zirtirtute pawhin tha takin an zirtir ang a. School environment leh an science zirna lampangah pawh environment tha tak a siam dawnin ka hre bawk a ni. Chuvang chuan vawiina Resolution move tu Pu K.S. Thanga hnenah lawmthu ka sawi duh chu, Medical College nei tura hmalakna/hmalak mek hi lawmawm ka ti. Hei hi chu paih tur pawh a awm lova belh tur pawh a awm lo, a tawk chiah a ni. Chuvangin he resolution putluh hi lawm takin ka pawm a ni e. Pu Deputy Speaker, ka lawm e.

DEPUTY SPEAKER : Awle, a lawmawm e. Chair kan han inthlak lawk ang a, chuan tunge sawi tur chu a phar nghal theih tho a. Chair kan han inthlak lawk ang e.

Pu JOHN SIAMKUNGA (CHAIRMAN) : Awle, tunah chuan a sawi tur chuan a sawi tan theih ang a. Tunge sawi leh ang? Sawi tur kan awm em? Pu P.C. Lalthanliana.

Pu P. C. LALTHANLIANA, MINISTER : Pu Chairman, ka'n sawi ve lawk ang e. Kan Resolution "Medical College nei tura hmalak mek hi lawmawm kan ti" tih hi a thlawpawmin ka hria a. Rualawt chi ka ni a keipawh tianga Medical College te kan han nei thei tur hi a lawmawm khawp mai a, a lawmawm ka ti a.

Nichin khan kan ngaithla tawh a, helaia a Resolution wording han thlak a han belhchhah deuh kha a tih hleih theih tawh loh ang deuh khan kan sawiin ka hria a. Engpawhnise, duhthusam kha chu a ni a, duhthawh thilah hlawhtling se kan ti a. Hei a minimum standard requirement te leh a dan leh a mamawh chi hrang hrang ho kha keipawh ka'n zir ve chiam a nizan chu. Kan thiante khan an sawi teuh tawh a sawi vak pawh ka tum tawh chuang lova. Khang a requirement te leh a criteria anga a cent percent anga vawikhata kal thlap thlap a tirah chuan a ngai kher lo tih te pawh kha kan ngaithla tawh a. Engpawh chu ni sela, duhthawh thilah kan state dinhmun te, kan sum leh pai dinhmun te han ngaihtuah hian chuan a cho awm loh mang e aw a tih theih a keimahni zawk tan. Tin, research tihna tur atan a nih pheih chuan infrastructure tam tak leina tur atan sum kan mamawh dawn a, churang chuan central sorkar hnuaia University hi chu ni thei sela chuan, College hi chu ni thei se chuan a duhthusamawm mang e aw tih kha ka ngaihtuahnaah a awm a. Engpawhnise, kan tum tlat chuan a hlawhtling ve tho turah keipawh ka ngai a.

Hmanlai thil te sawi kawih duah kher lovin vawiina kan din mekna atanga kan ngaihtuah chuan he Medical College nei tura hmalakna hi a lawmawm ka ti a, hlawhtling ngei se ka ti bawka, thil tam tak sawi lovin kha kha ka support a ni tih ka han tarlang ve a ni. Ka lawm e.

* Speech not corrected.

Pu JOHN SIAMKUNGA (CHAIRMAN) : A sawi tawi na a, a rawn support tha hlein ka hria. Kan lawm tlang tih a hriat a, Medical College nei tura hmalak mek chungchang rawn sawi apiangin a thatna lampang tur te, hlawhtling ngei se kan duhna lampang hlir kan sawi a, a lawmawm takzetin ka hria. Le, tunge rawn sawi leh ang le? Pu Zoramsanga.

Pu P.C. ZORAM SANGLIANA : Pu Chairman, Aizawl South-III bialtu MLA zahawm tak Pu K.S. Thanga resolution “Medical College nei tura hmalak mek hi lawmawm kan ti” tih hi a tawi tek tawk na a helai House chhunga awmah hian hemi hlawhtlin hun nghakhlel ber ka niin ka ring a.

Nichinah kan Legislation-a Accounts Section-ah ka han leng a. Kan hriat angin heng Referral Hospital ang chi Medical College tha kan mamawh zia, tul zia, hrechiangtu leh enkawl lai mek ka ni a.

Ni 28.2.2014 khan min hriat angin kidney transplant in ka awm a, chuta tanga keimah kaihnawih leh thildanga kan hotute leh thian tha ten min sen sak chu thudang ni sela, keimah bik chauh hi Assembly kaltlanga Mizoram mipuiten pawisa min thawhsak hi inenkawlna manah te, ka kal velna te chu ka chhut hmanlo zawk a, medical re-imburement ringawta min lo sen sak tawh pawh hi cheng nuai 20 dawn a lo ni tawh a ni. Chung chu helaiah, kan khawpui daiah Hospital tha, Referral Hospital a move-tuin a rawn sawi ang a minute 15 lek kalah awm ni sela Mizo mipui keimah ang a natna tuar te, enkawl ngai si, keimah bikah pawh khang min enkawlna zawng zawngte kha a lo berah Falkawn-ah sawn heng enkawlna hi lo awm ni ta sela public money tam tak safe in a awm dawn a ni tih kha min ngaihtuah tir a.

Ka natna anga na te (sawichhuah chak avanga sawi ni lovin) Association in kan han awm ve a Mizoramah hian, mahse recognise chu kan la ni

chiahlo na a mi 130 chuang lai kidney transplant te hi kan awm a. Natna dang dang leh thil dang dangte hi kan han sawi thin a, a population-a teh hian Mizoram hi kidney transplant ngai, India ramah hian pakhatna kan ni mai ang a tih hi ka hlauthawng rum rum a ni. Vawiinah waiting list-a la awm mek mi tamtak a donor hmuh loh vanga manganga la awm te, thenkhat phei chu a rawn kalpuitute pawh tawng thiam bawk si lo, hnam dangten an lo bum tak te, natna rapthlak takin a delh mek te hi an awm a ni.

Heng ang natna te leh natna khirh tak tak kan doctor te thiamnain a tlin, mahse tunlaih chuan nachhawkna pe tur pawhin technical prove lo hi chuan damdawite hi min chawh ta mang lova kan doctor-te hian. Chutiang khawvel a nih chhoh mek lai chuan keimahni khawpui atanga hnaivai te ah, hmun laili takah te pawh ti ila a dik ang chu, sorkar hmalakna avanga Medical College nei tura hma chak tak mai a a ngaihna hria leader, Chief Minister kaihhraina hnuaiah Health Minister leh a Department-a thawktuten phur em em mai a keini ang damlo, mamawhtute dinhmun hrechiana hetiang ang dah an han tum hi hnialna tur hi a awm theiin ka hre lo a ni.

Tichuan, hetiang remhre taka a bialtupa nen, a bialchhunga awm tur ni bawk nen, lawmawm tihna resolution a rawn pulut hi lawmawm ka ti a. Amaherawhchu, 'Falkawn' tih hi han ni tel se chuan a lawmawm leh zual ang tih te chu ka rilruah a rawn awm a, ka lawmpui em em mai a. Duhthusam rama chen theih hunlai tak a nih avangin ka han duhthawh deuh hlek a Pu Chairman, member ten kan lo sawi a nih pawhin hei hi mamawhna in a phur tawh a, he House-ah ngei pawh hian hemi zulzui hian resolution hrang hrang 19 (sawm pakua) ah hian 10 (sawm) dawn lai hi hetiang putluh hi a awm a ni. Chu chuan kan mamawh zia a tilang a, chung mamawhtute zing ami chu ka ni lehngal a. Session hi kan han zo ang a, hun rei vak lovah chuan min enkawltute min tihdan angin routine check up tura kal a ngai tih kha a ni leh ang a, Falkawn-ah te

hian lo awm tawh ni sela Lower Kanan, Aizawl atang pawhin traffic jam karah pawh darkar khat velah kan thleng pheii mai dawn a, chutiangte ka ngaihtuah chuan a ngaihna hria, a nachang hria, mipuite ni ringawt lo a bikin damlo mangang te, dam duh ve si te tan chuan he resolution hi a hlu lehzualin ka hria a ni.

Vawiinah hian he resolution hi a bik takin phaia refer thin te hian an lo chhiar hunah chuan kei ang bawh hian an nghakhlel ang tih ka ring tlat a ni. Chutiang chu a nih avangin “Medical College nei tura hmalak mek hi lawmawm kan ti” tih hi tawitea rawn ziah ni mahsela hei hian ken tel a nei tlat si a. Chu chu a lawmawm em avangin ka support a ni tih hi ka rawn din pui ve a.

Tin, Damdawi In hmun lian zawka enkawlina tlan tura kal thin zawng zawngte ai ka awh zawh loh pawhin keimah anga natna nei, kidney transplant te aiawhin hemi hi kan nghahhlel zia thu te, chumi a lo nih hunah pawh kan Minister zahawm tak hian kidney problem neite min hre ran hian heng department-te pawh hi a hmasain hma min lak sak se tih te (duhthusam theih lai a ni bawh a) Pu Chairman, kan ngen a ni e. He resolution hi lawm takin ka support a ni tih kan sawi a ni e. Ka lawm e.

Pu JOHN SIAMKUNGA (CHAIRMAN) : Kan chiang tawh viau ni tur a ni kan sawi duham hle nachung hian hun kan hmang zo lo tlangpui a. Tunah pawh khan Pu Ramsanga pawh khan minute 15 a hmang tlinglo nasa a. A sawi duh tan chuan minutes 15 thleng a ni tih kha kan hriat loh vang nge, minutes 15 kha kan hun inpek a ni tih hre chungin tunah kan member zahawm tak Pu Romawia ilo sawm ang.

Pu R. ROMAWIA, MINISTER : Pu Chairman, ka ding lo vang ka ti zet na a ka'n ding a, zirna hi investment ropui ber a ni an ti thin a, naupang mipuitlinga chherchhuahna. Chuvangin, school-ah te kan zir chhohna ah senso sang mahse thiamna kha a man a tam em avangin chutih laiah chuan miin senso kha kan ngam viau thin a.

Kan ramah hian Mizo fate kan vanneihna em em chu educationah thahnem ngaihna hnam pum rilruah a awm hi a ni a. Mizoram kilkhawr berah pawh khaw te tak te pawhin Primary School mai tawng khawp lovin Middle School an sual a, khaw lian deuh chuan High School neih deuh vek te an tum a. Chutiang chuan, High School kan han neih atang pawhin College kan han sual chho leh deuh zel a. Chutiang chuan Mizo fate hi heti lamah hian insenso pawh hreh lo tak mai kan niin ka hria a.

1950 hmalam deuh chauhah khan Mizoram-ah High School an rawn din a, High School din tirh lai te phei chuan Mizorama awm ve tur pawha ngaih loh, Shillong vela awm tura ngaih te pawh a nih hmel a. Mahse, kan pi leh pute rualawhna khan Mizo High School te kha an han din chho a. Tichuan, 1960 vel alo nih chhoh kha chuan Shillong vel, Imphal vel a College kal tura inhre tawh bik lo khan Aizawlah khan College te kan han din chho ve a. Sum harsa hle karah khan Pu Pachhunga te, mi hausate han hnik khan Pachhunga College ti te khan a lo kal chho va. Hei, kum 50, kum 60 dawn a ni ta reng mai a, College tluang pangngai kan han nei hi. Tunah hian College hi 22 emaw kan lo nei a, private a han din te pawh an awm chho a. Private lam te pawh kan han beisei thar zel a.

Amaherawhchu, khawvel pumin general education lam ai hian tunlai kan khawvel her zelah hian, technical education lam hi khawvel mamawh phuhru thei tur a nih avang hian kan han hawi lo thei lova. Chuti chungin Mizoram, North-East ah pawh lekhathiam state ni thin, India pum huap pawha lekhka thiam state, literacy-a sang khan Medical College pawh kan la nei lova, Engineering College pawh kan la nei lo te hi chu

a lehlam zawnga zuk thlir chuan a tlawmngaih thlak em em hian ka hria a. Sum lam harsatnain min delh hle chungin heti laiah hi chuan tumruhna nen kan ram mawh hi phur chhuak tur a kan beih a, Medical College hi in tin pawhin inkhawn huam khawpa kan sual tak tak a, hnam pumin kan sual tak tak hi a hun tawhin ka hria a. Kan budget awmsa ringawt atanga thil harsatna leh harsa hlir mai anga indelhbeh tir tum lo hian chutianga kan sual a ngai.

Kan ramah chuan sualchhuak zel hnam kan ni a, Aizawl khawpui Indopuiin a nan avangin motor alo thleng lo thei lova. Mahse, Lunglei khawpui te kha motor thlen a ngai a, 1953 tih chho ah chuan Lunglei-ah motor thlen tir tum in hnatlangin Mizo khaw tin ten theihtawp chhuah in sawti lai Bawngkawn lamah Pu Loyd-a, kan missionary-te an han cheh hmasak tir a, tichuan khawtinin volunteer in Lunglei kawng kha an lai ta a, PWD ten an vil a. Chutiang chuan Lunglei-ah motor a thleng thei a ni. Chutiang hnam chu kan ni a. Mahni inchhanchhuah tum hnam, mahni kut kea din tum a theihtawp chhuah hnam kan ni a. Chuvangin, Medical College te pawh hi khatiang lama kan Mizo mipui rilru hi awareness, rualawhna leh mahni inchhanchhuak hnam kan ni tih thinlunga kan intuh ngat chuan chhung tin te han tangrualin pawisa harsa kan tih hi keimahni Medical College tur alawm tih thinlunga neiin, khuta vaipa Medical College a ni lo, khuta sap pa Medical College a ni lo, keini Mizo fate Medical College tur alawm tih rilru pu a kan inchawh thawh ngat chuan institution tha tak, Mizoram pawn ami pawhin an rawn pan duh tur hi kan siam theih ka ring tlat a.

Chumi rualin Aizawl College kan han din te pawhin Pu Robert-a kan missionary mithiam ten theihtawp chhuahin hma min lakpui a. Chutianga tichho kan nih angin, he kan Medical College din chhoh turah hian engah nge Germany mithiam emaw, America mithiam emaw, khawvel hmun dang mithiam Korea lam mithiam emaw, tute emaw pawh chu tlawmngaih rawn chhuah tur pawh hian kan auh haw theih loh ang tih hi ka ngaihdan a awm tlat a ni. Chutianga mi dedicated, mi harsa zawk pui peih khawvelah hian mi tam tak an awm a.

Tin, a sum lamah pawh Philanthrophies Bill Gates te kan ti a, tu emaw sum tam tak, khatianga mi harsa zawkte puihna atana thawh thei te an awm a ni. Chuvangin, a hnam pum ang a, a Mizoram pum angin a aw kan auh tak tak chuan kan thei ang tih ka ring a. Tin, chutiang chuan India sorkar lam kan beisei a nih pawhin chutiang cho chhuak zo tura Zoram mipui ten aw kan neih chuan Delhi pawh kan au eih ngei ngei bawk ang tih hi ka ring tlat a ni. Chuvangin, a tawn tirh atanga tlanche mai lovin, keimahni Mizofa ten an hmachhawp theih ang tawk hi kan han peih phawt ang. Chutah chuan tanpuina pawh kan au zel ang a, au eih turin hma kan la thei ang tih ka ring tlat a. Mizo mipuiaiah hian rinna ka nghat tlat a ni.

Chutiang chuan awareness te nasa takin kan han beihah chuan sum lam ah pawh hian nei le lu lo mah ila, college run thei khawpin. Tin, kan doctor-te thleng pawhin, concrete in tha pui pui nei tawh te kan doctor mithiam te an nih pawhin an hlawh tur chanve kum 2, kum 3 tal pawh Medical College tana sacrifice turin an rawn pen chhuak ang mi inphal te pawh. Pensioner mithiam te pawh an la chak chung chuan chutiang chuan an rawn pen chhuak ang tih hi ka ngaihnanah hian a awm nghet tlat a. Chuvangin engah nge kan hlawhchham ang, kan hlawhtling tur a ni tih kha kan rilruah hian lian sela. A hnam pumin kan tang ang, Mizorama kan thil hmasa ber tur a nih avangin Mizo High School kan din lai ten theihtawp kan chhuah a. Lunglei a motor lak thlen nan te hnam pumin theihtawp kan lo chhuah tawh a. Chutiang zela a hnam puma theihtawp kan chhuah chuan kan hlawhchham na tur hi a awmin ka hre lova. Chuvangin Medical College nei tura hmalak mek hi a lawmawm kan tih rual rual in keini a lawm a te pawh hian tih tur kan nei a ni, tih theih kan nei a ni, tan kan la dawn a ni tih kan thilungah awm tel sela tih pawh hi ka'n sawi tel duh a. Chuvangin, he resolution hi ka support e.

SPEAKER : Sawi duh dang, aw Pu Rinmawia.

Pu LALRINMAWIA RALTE, MINISTER : Pu Speaker, sawi thiam tak tak tur zawk te an phar lo riau a. Lawmawm ka tih chhan kawng hnih kawng thum hi Pu Speaker, han sawi mai ka duh a ni. Nichinah khan Aizawl North-II bialtu MLA zahawm tak Pu Thanliana khan, cho awm lo viau mah sela, “a tih kha a ropui ka ti a. Tuna kan sawrkar leh min hruaitute hi vantlang ngaiha thil cho awm lo tak tihlawhtling thang an ni tih hi a hretute kan niin ka hria a. 1998-ah Lengpui Airport-a Boeing-737 in trial landing a rawn tih lai khan khami chungchang kha keima awmna hmunah hian ka lo ziaak a, thil theihloh tawp ni a ngaitu Mizoramah an tam ber, khatih lai khan. Amaherawhchu, wawiinah Lengpui Airport tangkaizia hretute kan ni a, chhimlamah pawh kan ti ta zel a, chhaklamah pawh kan ti ta zel a. Siamtheitu ni a kan hriat tlat tawh avang hian sorkar lakah pawh kan beisei a sang tawh niin ka hria.

A huphurhawmna lam kha an rawn sawi a member zahawm tak tak ten, a dik a. Keipawh ka hman ang leh ka thiam ang angin ka lo en ve a. Amaherawhchu, heti zawng hian ka ngaihtuahna a awm a ni. Tun kan sawrkar kal lai mek term khatna tirah khan Mizoram hian cheng za kan lakluh zelah kan leiba dinhmun kan chhawm chu cheng sawmkua dawn a ni. A hma deuh pheh chuan za kan lakluhah za chuang kan bat chang te pawh Mizoram hian kan lo nei thin a ni awm e. Amaherawhchu, kan Finance Minister zahawm takin kum 2016-2017 Budget a rawn pharh a. Khata a thusawi kha kan thil ngaihtuah lai nen hian ka lo ngaihtuah chhonzawm a ni.

13th Finance Commission liam ta khan 2014-2015 Pre Actuals kan hriattheih chinah khan cheng za kan lakluh zelah cheng 74.80 ba zel ila tih hi an phalna a nih laiin kan sawrkar hotu, kan sum enkawltute kan Chief Minister zahawm tak leh kan Finance Minister leh Parliamentary Secretary zahawm tak te hian cheng 52.41 ba theiin min chhuah a ni tih hi kan hria a. Kumtharah pheh chuan hei hi a la tlahniam leh dawn a ni tih te, zaa sawmnga pawh a kai dawn lo a ni tih te kan han hria a.

Tin, 14th Finance Commission hian tun kan kum hman turah hian Fiscal Deficit hi GSDP, kan state sum lakluh zawng zawng atanga za zela cheng thum aiin sang

lo se an tih laiin kan Finance Minister zahawm tak khan za zelah pawisa sawmpanga chauh a ni dawn tih hi min rawn hrilh a. Chutianga sum enkawltu thiam tak takte enkawlna hnuaiiah hian engvangin nge Medical College hi kan huphurh ang tih hi ka rilruah a awm a ni. Heti zawng hian sawi leh ta ila; sanction post sorkar hna siamfel thlap tawh sing chuang fill up lohvin a awm a, kan sorkar tha takin a kal tho. Department emaw khawi bik kha mamawh an awm miah lo ka tihna lam a ni lo, chu pawh chu a tul angin kan en ang an ti tho. Chumi avanga rorelna tha ‘good governance’ nei tha ber thei state te zingah min thlan bawk si chuan hlawh avanga kan sum save ringawt kha a va tam ve. Medical College- a staff za tlemte te chungchanga lungngaihna thu sawi turah ka inngai lo a ni, Pu Speaker. Chuvangin heng post ruak sing chuang te fill up lova rorelna tha state-ah pakhatnaah min thlang a nih si chuan zahnih leh tih lek, zathum leh zali vel lek kan lak avang hian kan buai ka ring miah lova. Sum enkawl thiam lamah hian kan state sorkar tuna min hruaitute hi ka ring tawk a, a zamawmin ka ringlo a ni.

Cho awm loh tak tak thil tam tak kan hnunglama kan kalsan tawhah hian a awm a. Mipuiin a taka kan hmuh zui zel, tuna kan sorkar hruaituten a taka min thlenpui hi kan hmu a ni. Chuvangin, Medical College atana pawisa engemaw zat an rawn pe tawh tih hriatte hi lawmawm ka ti a Pu Speaker. Hun hi a kal chak a, ka lawmna chhan ho te te thil pathum kan sawilang teh ang.

Pakhatna ah chuan nichina kan senior member zahawm tak Pu P.C. Zoramsangliana’n a rawn sawi ang khan kan ramah Medical College leh Hospital tha awmdun tur tha deuh mai kan han nei thei tur kha lawmawm ka ti a; kan rama damlote tan. Kha kha chanchin lawmawm a ni dawn a ni. Pu Speaker, hnam hnuaihning zawk te, hnam tlem zawk te tam tak kan bial chhungah an awm a. He House zahawm taka ka sawi thin tawh angin tawng hrang hmang ringawt pawh kan bialah khuan hnam 12 an awm a ni. Chutiang zingah chuan khawsak dinhmun inang lo tak tak te mi tamtak an awm a. Tunah pawh sawn kan inah chutiang chu damlo chi hrang hrang an awm mek a ni. Kan

mamawh hi a chiang thin em mai a, chuvangin Medical College leh Hospital han awmdun tur te hi ka mitthlain ka hmu a.

Nichina member zahawm tak Pu John Siamkungan a rawn sawi lan, St.John's Medical College Hospital ah khan keipawh ka fapa an zai tawh a. A rualawh thlak hlein ka hria a. Khatianga Medical College leh a ken tel hospital tha tak mai leh doctor te an inzirna ni bawk; tin, an thiamna sa reng awm bawk an hotute thiamna ni bawk. Hei AIIMS te pawh kan hria ang a, Hospital leh zirna ni kawp a nih avangin India ramah mitin rin an kai a, that pawh a tha a, an hlawhtlinna te pawh a sang a. Chutiang chu kan rama kan han nei ve tur hi enganga hautak pawh ni se tih hi ka rilruah chuan a awm a.

Nichina kan hotu zahawm takin a rawn sawilan ang khan Medical Reimbursement-a kan sen thin, state danga kan in refer-na avanga kan sen thinah hian thlawhnaa kan sen hi a tam viau ang ka ring. A treatment leh a medicine lampanga kan sen kha chu tam tho pawh ni sela a attendant nen, a damlo ni bawk, vawikhat mai ni bawk silo kal nana kan sen hi a tam hle a ni. Chuvang chuan cheng vaibelchhe tam tak heta tang hian kan save ve dawn a. Kan Finance Minister zahawm tak budget speech-ah khan cheng vaibelchhe sawmriat vel kumhluiah khan kan hmanng niin a sawiin ka hria a. Chungte han chhut chuan a zatve vel lai mai hi chu min save sak thei mai lawm maw ni chu aw te pawh ka ti tel bawk a ni. Mipui tan a tha bawk si a, veivahna senso leh tawng thiam lo chung chung a vairama zuk awm ang chi harsatna te kha thil thui tak a rawn sukiang dawn bawk niin ka hria a.

Pahnihna ah chuan kan thalaiten zirna tha, lam hnaite an nei thei tur hi a lawmawmin ka hria a. Nichina kan ngaihthlak tak ang khan, a sawitu ka'n sawi chhawng thei mai lova Pu Speaker, kan thalaite hrim hrim hian hetiang zirna tha, technical education lam hrim hrim te, medical te pawh a ni vek mai a, khang zirna Engineering College emaw, Medical College emaw kan neih loh chuan zirlaite hian inchuh vak vaka

chan leh theih mang chuang siloh tur emaw, seat tlem em em mai inchuh a phar buai phar buai ai chuan tiin emaw, beidawng zawngin an lo inngaihtuah bengthlep ve theiin ka ring a. Chuvangin hautak deuh hlek pawh ni se, a diktak chuan duhthusamah chuan state-in kan enkawl hram hram a, amaherawhchu a standard thuaah te engemaw a tawpkhawkah te a lo harsa ta viau a nih chuan central sawrkarin a enkawl zui hi harsatna a awm chuang pawhin ka ring lova, India ram kalphungah leh heng Medical College chungchang hrim hrimah pawh hian.

Engpawhnise, a tirah hi chuan keimahni pual anga kan sual hi eng ang pawhin harsa se sawi tak ang khan harsatna tamtak theihloha mi in an ngaih lo sutlang thin hruaitute, kan Chief Minister zahawm tak leh kan hruaitu tha tak tak te kan neih lai hian kan ti ngei turah ka ngai a. Chutiang bawkin opposition lamah pawh member fingvar tak takte leh a ngaihna hria tam tak kan sawrkar khalngil tur leh finchhuah tur kan neih lai hun te a ni bawk a. Chuvang chuan tun hi a hun pawh hi a fuhin ka hria a ni.

Pathumna ah chuan Pu Speaker, point nep deuh anga lang si nep miah lova ka hriat han sawilan leh ka duh a. Mizoramah miin MBBS emaw, nakin zelah pheih chuan specialization course te pawh a la ni mahna, an zir hunah chuan Mizorama lo zir tawh doctor te hian.... an awmna apiangah Mizote hi min hria ang, Mizo mipuite hi min hre ve tawh ang. Eng mi nge chhuak dawn kan hre reng reng lova. Tin, Medical College kha a tul dan azir leh kan hlawhtlin dan azirin seat 200 awmnaah pawh a la lian zel ang a, 250 ah pawh a la lawn ang a nakinah. Chung hunah te hlei hlei chuan Mizorama rawn awm tawh “I dam em?” ti thei ringawt pawh India ram hmun dang Hospital ah te, engemaw tul bik thila keini Mizoram mipuite ngeiin kan han tawng thin tur hi ka mitthlain ka hmu a, a lawmawm ka ti.

Vawikhat chu December, 1994 niin ka hria a, ka hriatsual loh chuan, Delhi-ah khuan Connaught Place atang khuan chhimlam hawi zawngin Auto-Rickshaw hmang turin ka lo chang ran a, hnamdang pa pakhat, hleitling deuh hi a lo

kal a,” I hmang duh em ni? In hman tawm ang,” a ti a. Kan chuang pheii ta a, Chanakyapuri thlengin. Tah chuan, “Sikkimese i ni em? ‘ tiin min zawt a, “Nilo ve,” ka ti a, Mizoram mi, Mizo ka ni,”ka ti a. Chu pa chuan, a hming pawh han sawi ta mai mai ila, “Lt. Col. Panda,” a ti a. “U Amah i lo fak ang,” ti a. Ka tan chuan thian nelawm hi a ni nghal ringawt mai a ni. Mizoramah a lo awm thin kha a ni a. “U Amah i lo fak ang,” tih a’n sak lung lung khan ka tan chuan a nelawm sawt a, ani pawhin Army Officer junior deuh a nih laia a lo awm hrep tawhna a nih avang khan Mizoram chanchin te min zawt chiam mai a. Auto-Rickshaw-a chuang dun mai mai e ti lo khan inhmuh vawikhatnaah rau rau pawh kan innel bik a ni, Mizo hla tlar hnih khat a sak ringawt avang pawh khan. Chu chuan awmzia thui tak neiin ka hria a, tawng hi mihring min innel tirtu leh min hnuk hnaitu, min phuarkhawmtu tha deuh mai a lo ni a.

Keini hi midangte tawng thiam tura beisei kan ni reng ringawt mai bik a, Kan ramah hetiang zirna tha, a bikin Medical Education zirna tha kan neih chuan (khawvelin medical lam mithiamte doctor te chu a mamawh telh telh nghe nghe a). Zirtu awmlo tih hun kha kan nei dawn reng reng lova, an rawn zir ang a, a khat liam zawih zawih reng dawn a. Chungte chu an zir zawh hunah Mizoramah ringawt an thawk dawn reng reng lova. Khangte khan kan ram leh kan hnam hi min chawimawi ang tih hi ka ring tlat a. Chutiang tur chuan keini pawhin tan kan la zel tur a ni a. Hei hi chona ang zawngte pawhin ka lo dawngsawng a. Kan chhang ngei ngei tur a ni. Lawm takin, kut beng chungin he kan hotute hmalakna hi kan thlawp turah ka ngai a ni. Chuvangin, lawmawm ka ti. He lawmthu sawina resolution Aizawl South-III MLA zahawm tak Pu K.S. Thanga rawn putluh hi thinlung takin ka thlawp a ni tih ka’n sawi e. Pu Speaker, ka lawm e.

SPEAKER : Pu Ruatkima.

Pu LALRUATKIMA : Pu Speaker, ka lawm e. Vawiinah Aizawl South-III bialtu M.L.A. zahawm tak Pu K.S. Thanga Resolution “Medical College nei tura hmalak mek hi lawmawm kan ti” tih sawihona hun tha tak mai kan nei hi lawmawm hlein ka hria a. Hei a bik takin kan lawmna chhan dang daih a chu he House zahawm takah hian i dinglam amite khan an sawi thin chu District Hospital thihna tlak pawh kan nei lova tih hi tum 2 ka hre tawh a ni he House-ah hian. Chutiang karah chuan kan awm laiin Medical College nei tura hma han lak te hi chu a lawmawm dangdai khawp maiin ka hria a. Theihtawp chhuahin, a hlawhtlinna turin hma kan lak tlan te pawh a tul tak zet zet in ka hria a ni.

Chutihlai chuan ngaihtuahna pakhat ka nei a. Pu Speaker, ni 1.4.2010 khan Private Resolution pakhat kan member zahawm tak Pu S. Laldinglana hian a pulut a. Pu Speaker, i remtihain “Chhim bial mipuite harsatna sukiang tura Lunglei bula Airfield siam a nih theih nan hmalak a ni ta hi lawmawm kan ti. Airfield hi siam thuai a nih theih nan sorkar laipuih nawr zui zel ni rawh se” tih hi pass a ni ta mai a ni, khatihlai Sixth Assembly-ah khan. Khatiang deuh kha a ni ang a, lawmawm kan tih hian a thamral mai ang tih hi ka hlau khawp mai a. Kha Airport Resolution pawh kha a hnu kar leh lawkah chanchinbu-ah kan en a, a lo theih leh hleinem mawle a ti a, a puluttu nen kawtlaiyah kan inhmuhnaah ka fiam a. ‘I pulut a, a kar lehah i puchhuak leh chu a ni deuh ber e,’ a ka ti a. Chutiangte chu kan ni ang tih ka hlau hlel lova. Hei kan proceedings hi hetah hian ka kawl a, chutiangte chu kan ni a. Pu Speaker, kan Resolution a puluttu hi sum enkawltu a ni bawk a, a zahawm khawp mai a, a pulut inthlahrung khawp mai a. Central Medical College chu ni se aw a tih ve vang vang ka ring a ni.

Non-recurring Grant-in-Aid atanga kan hmuh kha kan mamawh tur 184 core atang khan tunah hian hei a lehkhah hian crore 20 min rawn pe a, Arunachal Pradesh te pheih chu crore 25 an rawn pe nghe nghe a ni. Resolution neitu khan Pu Speaker, kum 5 chhung min rawn pe dawn a ti a, vawi tam tak

politics inchirthehnan I.R. Battalion te pawh kan hmang thin a ni. Khatiang ang deuh pawh kha kan ni mai awm mang e aw tih te pawh kha ka hlau hlel lova. Kan sum dinhmun te kan han ngaihtuah hian in kan duh si, amaherawhchu, nakina kan sorkar huna phurrit min siamsak tur chi kha niin ka hria a, Pu Speaker. Amaherawhchu, anni lam mawhphurhna kha a nih loh rualin ram pumah mawh kan phur tlang vek dawn si a, chutiange chu kan ni a. Nu pakhatin kan fapa camp-ah a luh mek lai hian lawmthu sawiin min tawngtaipui teh u a tih ang vel hi kan ni a, a rawn piangthar leh si lova, a mangang em em si a, chutiang ang te chu awm palh thei a ni, ka hlauhthawn thu kan sawi mai a nih chu. Chung angte chu kan nih avangin ngaihtuahna thui tak kan hman tlan a ngai a ni.

Hei NIT te pawh kan han nei a, duhthusam a nih phak loh dan te chu kan hretlang vek a. Amaherawhchu, sum enkawltu ber khan a thlir pha a, a move danah pawh khan a rawn fimkhur khawp mai a, a ziak a rawn chhiar hial a, tawngsual a hlau khawp mai.

Chutiang chuan hei State Referral Hospital kan han nei chho a. Kan member zahawm tak-te khan Ar vulh-nan te kan hmang a an han ti a, a dik ang. Nursing School, Thingdawlah pawh khan an vulh ve tho a nia tuna mite hian Pu Speaker, si khat ve ve kan phur a nih chu i ti mai teh ang. A chhan chu a thawk mekte leh helai ami ten ar an lo vulh te, vawk an lo vulh te kan society-ah a tlanglawn em em a. In sawichhiat chiam khan hlawkna tak tak pawh kha a awm chuang lova. Tuna building 44 leh Administrative Block 'A' leh Block 'B' te, Laboratory Block 'B' te, OPD building te pawh saw, nichina kan member zahawm tak Dr. K. Beichhua sawi ang khan MNF sorkar kutchhuak a ni a. Amaherawhchu, Medical College erawhchu kan nei a nih chuan kan sorkar kutchhuak hi a ni ve leh mai dawn a. Si khat ve ve kan pet goal-ah ngai mai ila a thain ka ring a. Thawh tam tak kan nei a, kum 10 chhung chuan thawh zawh loh tam tak te pawh kan nei ang. Sorkar chhungin thiltihte pawh a har thin a.

Chutiangte chu kan dinhmun a ni a. Kan ngaihthlak tawh ang khan kan ramin Medical College kan neih ve hlan hi chu kan nghakhlel a ni. Amaherawhchu, he Medical College nei tur hian a kalkawng thuizia te, a harsat zia te kan hria. Application permission kan dilna a kan thehluh te kan han en vang vang a. Nichina mover-in a rawn move laia kan sawi chu Doctor neih zat leh application kan thehluh hi a inmil lo lutuk a, House record-ah a awm dawn si a. Pu Speaker, chu chu ka han sawi chhan kha a ni a.

Chumi piah lamah chuan minimum requirement for medical College Amendment 2016 te internet lamah te a download theih vek a ni a. A har khawp mai a, mahse, har tak thil hi tih hram a ngai a. Amaherawhchu, engtin tin emaw kan han ti a, Central Medical College chu ni se aw, tiin kum 10 a lo kal hunah chuan kan thlir mai awm mang e. Mizoram University kan nei dawn a, an debate te, Assembly Proceedings-ah kan han en a, chungah te pawh chuan a ngaihnawm khawp mai a. State University kha nei ta ila chu, vawiinah hian kan ram sum dinhmun kan hretlang vek a, University tha lo tak mai kan nei ngei ang.

Amaherawhchu, vawiinah khawvel pum huapa zahpuiawm lo, Mizoram University, Central University kan han neih tak hi a lawmawm a, kan thawh rah tlang vek a ni a. A chhawrtu chu a bik takin Mizoram mipuite kan ni tih hi kan hre tlang vek awm e.

Chutiang te kan ram dinhmun leh awmdan chu a ni a. Medical College-ah hmun hrang hrangah central quota te, central pool atang te in kan han nei a, zirlai tam tak a bik takin 28 bawr vel leh BDS te nen phei chuan seat 40 central pool-ah kan han nei ve a. Doctor thawk lai leh thawk lo pawh 700 dawn kan neih thu te pawh kan hria a. Doctor ratio erawh chu a la hniam viau mai a. Chuvang chuan, doctor mamawh lo tumah kan awm lova, doctor tha tak tak kan neih hi a tul khawp mai a. Tunah pawh Russia ramah te pawh kan thalai tam takin an zir a, khatiang kha kan la zir zel ang. Tunhnaiah

kan hria, Pu Speaker, Bihar-ah te chuan doctor hmantlak loh doctor certificate ang chi te kha a tam mai a ni. Chhawr tlak mang si loh Medical College chhuak doctor ang chi kha. Khang te pawh kha a awm theih avangin kan fimkhur tlan a tha takzet zetin ka hria.

Chuvang chuan sawlai Medical College kan han neih tur hi Central Medical College ni sela, Medical College kan neih tur hming pawh hi a mover hian a hre reng tawh chuan ka ring si a, han ziak tel sela, a bial chhung a ni a, a manghilh chu ka ring si lova. MIMER, Falkawn han tih te kha a appropriate ngei ang tih hi Pu Speaker, ka ring a ni. Mahse, engti zaizia nge ni, a rawn ziak hmaih tlat mai a. Hei hi chu a tihpalh ang ah ngai ila, chutiang te chu kan dinhmun a ni a. Chuvang chuan thahnemngai taka Medical College kan neih hun tur hi tlumte thlirin kan thlir tlang a ni.

Vawiina a dinhmun erawh chu, Aizawl Hospital bungrua in a tuar hi chu ka ui angreng khawp mai a, Civil Hospital sawn tuar lo hram sela. Referral Hospital tihchangtlunna tur sawn incinerator ang chi hrang hrang te duhthudam loh tam tak a la awm a. Tui chungchangah te leh eng (light) ah te, Library te pawh tun thla hlui mai khan kan va tlawh a. kan han hmuh danah pawh kan la inpeih chiah lo a ni. Amaerawhchu, inspection team te pawn an la rawn en ang a. Chung angah te pawh chuan ngaihtuahna zau zawk neih turah te pawh kan la inngai a.

Pu Speaker, sawlaia Falkawn Referral Hospital saw, a ram hi kan hriat angin kum 2000 khan DLP land lease No. 45 of 2000 bighas hi 119.16 a zau kan lo nei ta a. Amaherawhchu, cadastral survey demarcation te an han titha a, chutah chuan land lease 07/2010 bigha 214.84 a zau kan lo nei ta a. Chutihlai chuan ka hlauhthawn ang ngeiin Pu Speaker, thil a thleng a. Hei, Assam Rifle insawnychhuah tur thu kan hria a. Chutihlai chuan Assam Rifle ramah khan mimalin ram an lo nei teuh mai a. Khatih laia thuneitu tam tak te khan, tute nge an nih chu ka hre lova. Chutiang chuan ram an lo nei teuh avangin tunah hian harsatna kan tawk a nih kha.

Referral Hospital saw mipuiten tlawmngaih chhuahin an ram an donate a, ram an pe a, compensation tlem te te an pe a, chutiang ang chu kan ni a. Compensation an pek kha an tlem khawp mai a. Chutih lai chuan kan duhkawp loh avangin Department-in mimal ram kan lak belh a. Chu kan ram lakbelh te pawh chuan tlawmngaih chhuah tura a ngen tak meuh meuhin kan hotuten an han ngen a. Ram inthleng mai tur te pawhin ruahmanna te an siam a. Amaherawhchu, tun thlengin Land owners te hnena sorkar hna pek tura tih kha tihhlawhtlin a la awm ta lova ni.

Chutihlai chuan Pu Speaker, kan chin than ze tha lo tak mai kha a ram chhungah mimal hnenah ram kan lo pe leh tlat mai a ni, chu chu paw ka ti a, he House zahawm takah pawh sawichhuah thain ka hria a. Engatinge miin harsa takin ram an pe a, helai pass-ah pawh hian a inziak a, a history-ah hian. Pu Speaker, i phalnain, “He hmun hi Health Department-in an pek, LSC siam sak a ni” a inti kalh mai a ni. Engatinge hetiang hi an lo pek le. Referral Hospital, Falkawn-ah mi inphalte zarah ram zau tak sorkarin a nei a. Compensation a then chu ₹ 5000/- te sorkarin a pe a. A then chu an leh lo kalsanin hmun dangah an insawn a, sorkar hna pawh kan pek theih loh lain thil tithei fal ten ram an lo neih leh hi a dik ka ti thei lo a ni. Chuvang chuan thuneituten an enfiah a an cancel leh lo a nih chuanin he thil hi mipuiten kan sorkarah engchen hi nge rinna an nghah ang. Thuneitu lam te pawn an ziah sak a, party a an nihna zawng zawng pawh an ziah vek a ni. Kha zawng zawng kha hetah hian hmuh theihin ka kawl vek a ni, an lehkha ziah sak hi, Pu Speaker.

Chuvang chuan Hospital tha tak nei tura mipui kan lawm a, kan hlim tlan lai khan saw ram saw kan lo ser leh zel hi tha ka ti lo a ni. Chuvang chuan thuneituten an cancel leh nghal phutin Pu Speaker, hei hi ka pawthler dawn a ni. Hetianga an lo ti hi paw ka ti khawp mai a, chu chu he House zahawm tak hriatah hian ka sawi lang duh a ni.

Pu R. ROMAWIA : Pu Speaker, khatiang thil a awm a nih chuan khawngaih takin Minister incharge ka nihna angin khang kha minrawn pe thei sela, a tul angin ka lo umzui ang tih ka sawi duh a ni.

Pu LALRUATKIMA : Pu Speaker, lawmawm ka ti khawp mai a. Kan Resolution hi a appropriate tawkw lo tih thu kha ka sawi tawh a. I phalna leh rem tihna hi kan Dan bu 130 (1) -ah khan a awm tho a, amend hret mai ila, a kalhmang hi a appropriate lova, Medical College hmun tur hi khawilai hmun nge tih pawh hriat mang loh kha a ni a. Tin, State Referral Hospital te pawh kha han telh ila, State tih kha, Referral Hospital tih ringawt kha chu a kimchang lo a, sorkar pawhin State Referral Hospital a ti a. A hmun pawh kha Falkawn ti leh hram ila, a tha awm mang e. Resolution dang pawh kan tidanglam zeuh zeuh tho bawkw a. Pu Speaker, i remtihna khan a theih phei chuan Central Medical College tih te kha han tel leh ila chu kan lawm a rual lehzual zawk ang maw le, kum 10 hnu ah hi chuan kan hlim tlang zawk ang maw le, tih hi ka han sawi duh a. Thahnemngaihna aw ka a ni tih kha min hriat sak ula. Chuvang chuan, khalai kha siam that theih ni se chuan a lawmawm ngawt ang. Ka lawm e.

SPEAKER : Tunah chuan a department neitu Health Minister sawm tawh mai ila.

Pu R. LALZIRLIANA, MINISTER : Pu Speaker, Opposition Group leader pawhin a la sawi lova, a sawi duh ka ring a. Tawitein ka lo sawi ve teh ang.

Vawiina kan MLA zahawm tak Pu K.S. Thanga'n, 'Medical College nei tura hmalak mek hi lawmawm kan ti', a tih hi kan lungrual hlein ka hria a. Tuna ka hmaa thu sawitu pawh kha han thlawp ka duh tho a. Helaiiah hian Referral Hospital lam sawi lova Medical College/Hospital lam daih kha a sawi chu a ni tawh a. Chuvangin kan sawi ka han ngaihthlakah khan kan lungrual hlein ka hria a. Mahse, thu hlui te pawh hi sawi loh thei loh dinhmunah hian a ding ve thin a, debate kan han neihnaah hian.

State Referral Hospital hi 1998 daih tawha intan kha a ni a. Congress sorkar kha a tlak tak avangin 40 crore (Cheng Vaibelchhe sawmli) lai neih sa kha hmang hman lovin a awm a. Khatih laia sorkar lo ding ve kha P.C. leh MNF sorkar khan kha sum kha hman theih nghal mai a nih avangin phur takin an rawn hmang chho a. Nimahsela, a nihna ang tura Damdawi In lam kha rawn uar lovin contract hna insem tam theih dan ber ngaihtuah leh, a percent kha party-in an lak dawn avangin, nichina kan ngaihthlak ang khan, residential quaters kha tam tak an sa ta a. MPC party-in MNF hotupa hnena an pawisa khawn a pekna lehkha te pawh kha kan nei a ni. Chutiang chuan party sum siam nan an lo hmang chho ta a. Chuvang chuan, a hlawhtlin tur ang khan kan hospital pawh chu enkawl a lo ni chho ta lo a ni tih kan hria a. A hlawhchham ta ti ila a fuh berin ka ring a.

A chhan chu, nichina sawi ang khan, ar vulhna te, keimah ngei pawh khatih lai khan opposition ka ni a, ka va kal a, zialo hi ka ti khawp mai a. An in sak kha an sak zawh theih tak si loh avangin, kha lai inchhawngah khan mauin an lo hung a, broiler ar kha a lo tam khawp mai a, kan va en nghe nghe a ni.

Chutiang chuan khulam atangin khatiang zat lai pawisa an lo hman tawh avang khan inspection team an lokal a. An lokal dawn khan Falkawn ami (cher chhe deuh te an ni ang chu,) te kha an la khawm a, hlawhfa ruaiin, damlo derin khumah Civil Hospital atangin khum te an zawn pheii a. Chutiang chuan 40/50 rual zet khatah khan an lo mut tir ve a ni tih te pawh kha kan sawi thin a ni.

Tichuan, ka hmaa sawitu khan, IR Battalion kan lak ang mai khan kan hlawhtlinpui lo ang tih a hlauhawm a ni tih thu te pawh kha a rawn sawi a, a lawmawm ka ti khawp mai a. Hotu hmasa te, anmahni sorkar ngei maiin khatianga IR Battalion panga (5) lai, party induhsakna remchang ti a, a lokal leh tur sum leh pai harsat zia tur ngaihtuah miah lova thil an lo ti kha tuna thangthar te, an MLA puiten thalo an tih zia te

pawh an rawn sawichhuak a, a lawmawm ka ti a. Thudik sawi ngam hi thil tha tak a ni, a lawmawm ka ti khawp a ni.

Chutiang chuan IR Battalion te an han la vak a. A tirah chuan batallion tanna tur sum kha an lo pe ve a. Mahse, hun a lo kal zel a, sum leh pai recurring expenditure kha central-in min tum sak zel dawn lo a ni tih ngaihtuah miah lova khatianga an tih avang khan vawiinah pawh harsatna kan tawh ta reng a ni tih kha ka han sawibelh duh a. Chutiang chuan an in sak te pawh kha a quality a thalo khawp mai a. 3rd IR dah kan han tum a, khatianga in ruak a awm reng kha chuan a chhe vek dawn a, khami kan va enkawl khan vaibelchhe tam tak sengin kan renovate nghe nghe a ni. Chutiang chuan kan dah thei a, a chung far lo reng reng a awm lova, a buaithlak viau a ni tih kha he House ah hian han sawi ve hrim hrim ka duh a ni.

Chutiang chuan thil harsa, tuna kan resolution pangngai ang ngau ngau hi chuan tha kan ti tlang vek a, amaherawhchu, harsatna kan sawi ta vak mai a. He harsatna hi keini kan leadership tha hruaina hnuaiyah hi chuan mite'n, 'a theih lovang, remna leh muanna pawh, tu sorkar mahin, tu party mahin an nei thei lova. Remna leh Muanna nei thei turin mahni pawh inphat huamin remna leh muanna Zofate'n kan neih phah ta a,' a lawmawm kan ti tak zet zet a ni. Chutiang chuan state dangin an neih loh, an neih ve theih reng si hi engah nge keini hian kan neih theih lo vang tih hi ka ngaihtuahnaah chuan a lian ber a.

Harsatna tam tak sutlangin 1984 inthlan dawnah kan hotupa Pu Lal Thanhawla hian, 'rambuaiah kan awm a, kan in leh lo sipaiin min hal sak zo tawh a, rangva inchung nei pawh kan awm tawh lova. Chuvangin, keini kan lo sorkar chuan rangva miretheite hnenah kan sem ang' a ti a. Khatih laia sorkar te kha chuan, khatianga tiamtu kan leader kha hmusit tak leh elsen takin a lem te an ziak a, rangva te an chhipchhuan tir a. An campaign naah te chuan, 'Zarkawt tlangval lukir bep bup khan

rangva a rawn zuar a, a niin in inchung tur a pek theih che u chuan, in ek in chung tur tal chu kan pe ve ang che u' te an ti a ni.

Amaherawhchu Pathian zarah kan lo sorkar ta a. Kan sorkar atanga thla 2 lekah Vanapa Hall- ah rangva, mi pakhat phurh zawh tawh quality tha lutuk kan han sem a, a bundle in kan sem a. Khatah phei kha chuan thingtlang mite khan, 'motor kal theihna a la tam lova, in rangva sem hi a tha lutuk a, hei aia chhe deuh, a rangva zang zawk, bundle 1 te pawh phur ve theihna turin rangva hi min sem sak rawh u', a kum lehah chuan an rawn ti zawk a ni. Chutianga mite'n an tih theih loh chu keini party hian kan ti thei a ni. Helaia 'Medical College neih tura hma lak mek hi lawmawm kan ti' tih hian State emaw Central emaw a zu sawi hranpa lova, keima mimal duh danah phei chuan ka hma MLA zahawm tak Pu Ruatkima'n a sawi ang khan, Central Medical College ngei hi ni thei sela chu a tha awm mang e tih te chu keima mimal ngaihndan chu a ni.

A chhan chu a hautak tur zia kha kan hotu kan MLA zahawm tak tak ten an sawi tawh a, churang chuan hetiang hi ni thei sela chuan a tha ber mai awm mang e tih chu ka ngaihndan a ni a. India rama state te te zingah chuan state tha ber, good governance an thlante zinga pakhatna kan han nih ringawt atang pawh hian harsatna tam tak chu awm mahsela, chu harsatna chu pumpelh lova sutlang thei leadership thain min hruai avang hian hei hi chu kan ti thei tho ang. Keimahni Mizoram Medical College Hospital pawh ni sela tih chu keima mimal ngaihndan pawh a ni tho mai.

Thui tak ka sawi lovang a, tawite Pu Speaker, a tlangkawm nana sawi ka duh chu, tuna i veilama thute thutna a ka thut ve lai khan World Bank Road hi kan sorkar khan a siam a. Chutih lai chuan helai chhimphei zirlaite an nuar a, an lung hmante a chhe lutuk a, road block te an siam a, keimah ngei pawh ka va kal a, an lung hman an lo chhekkhawm tam tak zing ami khata mi ngei kha ka va la a, helaiah hian ka thu a. 'Heng in lung hman hi fur khat pawh daihlo tur a ni, ka ti a. Kei pate tak te chaklo tak hian kha lung kuttum aia lian pahnih kha ka keng lut a, 'hengte hi in lung hman a ni' tiin kan

chhu a, helaiah hian a darh vek mai a. Chutiang khawp thil a awm lai khan keinin tihian kan han chhonzawm leh a, kawngtha kumtluanin kan nei chho ta a. Vawiina ka ngaihtuah hian khatih hun laia sorkarah kha chuan kan kut hnathawktute an lungawilo em em a, an duh khawp an hmu lova, an chanvo tur an hmu lova, chuvangin kan farmer te, kan kut hnathawk tute Aizawl khawpuiah ngei iptepui nen, chemtum nen, chawfun nen kawng an rawn zawh a ni tih kan hria a. Vawiinah chuan kum 7 kum 8 dawn kan sorkar ah hian chutiang thawmte chu kan hre ta miah lo hi lawmawm ka ti a.

Tin, a tawp nan tak tak, kan hotute i veilama thute hian an leadershipah hian an lungawi tawk lo a ni tih hi a chiang hlein ka hria a. An leader chuan ‘central drip khai lovin kan nung ang, Central pawisa tel lovin keini chuan kan sorkar hi kan kalpui dawn a ni,’ a ti chamchi reng a. Amaherawhchu, sum leh pai harsatna hliir an sawi takah hian an leader chungah hian rinna an nghat tawk lo a ni tih hi a hmuh theihin ka hria a. Chuvangin helama lo kal ve mai tur hian vawiinah pawh hian ka sawm a, sawm pawh ngai lovin an lo kal ve mai dawn a ni awm mang e tih te pawh hi ka ngaihtuah a, a lawmawm ka ti takzet a ni. Chuvangin kan inlungualna ‘Medical College neih tura hmalak mek hi lawmawm kan ti’ tih MLA zahawm tak Pu K.S. Thanga’n resolution a han move hi lawm takin pass rual mai ila a tha lawm ni tih kha ka’n sawi ve duh a ni e. Ka lawm e.

SPEAKER : Pu Zawma, hei a tawpah tih tawk a awm an tih kha a dik hle mai.

Pu VANLALZAWMA : Pu Speaker, ka lawm e. Vawiinah nichina kan senior member-in a sawi tawh ang khan kan private resolution sawi hi South III bialtu MLA wordings chu thu dang ni sela, a dangah pawh hian hetiang lam hawi wording hi a lo tam khawp mai a. Opposition lamin kan han thehluk ve ang te pawh kha Medical College chungchang hi a ni deuh vek zawk a. Chutih laiin a chhuak zo ta chiah lo a, i dinglam amite thehluk tam tak pawh hi khalam hawi tho kha a ni a. Kan inlungual a,

kan hotute an lo inrawn ru emaw ni chu aw tih mai theih te pawh niin ka hria. A lawmawm lamah ngai ila. Amaherawhchu, tun ka'n din dawn maia ka ngaihtuah chu dinglam ami te an tam angreng si a, kan hneh loh chu thudang, a tawngkam hrim hrimah pawh hian kan lo hneh lo deuh emaw ni aw ka ti a. Ama'rawhchu, mahni infak leh sakhi ngalah engmah a bet lo tih te kha ka ngaihtuah chhuak rum rum a. Chu chu a thu hma ang deuhin ka'n sawi hmasa duh a.

Tin, Pu Speaker, ka'n sawi leh duh chu hemi Private Member's Resolution tihdanglam hi opposition lam thu hi chu a ni miah lo mai a, ruling lamin tidanglamin kan pass pui thin a. Tuna kan wording pawh hi ruling lam hian tlema her rem hret hi chu remtih a tha mang e aw tih kha ka'n sawi duh a. Kan zavaia kan hlim tlanna tur a ni mai awm mang e. A mover ngei pawh kha a bial ami tur ni si, sawlai khaw pawimawh tak, a bial a khaw pawimawh em em mai hming tel lo tawp mai a helaia resolution han putluh kha sawifel turte pawh hi a ngah duh viau ang aw tih kha ka'n sawi duh a.

Pu R. LALZIRLIANA, MINISTER : Khawngaihin Pu Speaker, a bial a rawn sawilan lohna chhan kha, mi puitling tak a ni a, mahni bial chauh ti lova hetiang a rawn ti hi a ropui ka ti.

Pu VANLALZAWMA : Pu Speaker, kan Home Minister zahawm tak, kan House Dy. Leader ni bawp pawh khan her hret kha a iai lo khawp khan ka hre mai a. A tih theih mai lawm ni tih kha thu dang ka sawi hma-in, Health Minister lam tih tur nge ni ang a, a mover nge ni a, a House Leader mawh ka hre lova. Kan zavaia kan hlim tlanna tur atan leh nakin hun lo la kal zel tur atana kan duh zawk tur a ni lawm ni aw tih te hi ka ngaihtuah a, chutiang deuh chuan an ti thei mai lawm ni nangmah kaltlang khan ka'n ti duh hmasa a.

Pu Speaker, engemaw han sawi duh ka nei ve a. Vawiin-ah keipawh a lawmawm zawngin ka ngaihtuahna a kal a. Politics- a kan tel ve hma pawh khan ka lo

sawi ve reng thin chu University-te, Medical College-te, Engineering College-te hi chu kan neih ve hi a dik a ni tih hi ka lo sawi ka lo sawi ve thin a. Ama'rawhchu, khalamah khan rin aiin ke kan pen chak tawk lova. Tin, vawiin-ah kum 16 kal ta kha ka rilru ah a lo lang leh dawrh a. Mizorma University kan neih theihna tura hetiang sawihona huna ka tel ve kha ka rilru-ah a lo lang chhuak a.

Vawiinah hian vannei ka inti a. Medical College chungchang he House zahawm taka sawihonaa ka tel ve hi mimal ang pawhin nakin thleng hian kan la chhuan tur te zing ami ni hian ka ring a. Engineering College pawh hi kan nei mai dawn niin ka ring a. Hengte pawh hi a lawmawm a. Hengte pawh hi House-ah chipchiar takin engti kawng talin emaw la sawiho theih chu ni ta se tih kha member ka nihna angin ka'n sawi a.

Tun tuma Medical College kan tih chhoh kal mek hi tlemin ka duh khawp loh deuh lai a awm a. Tumah kan va demna lam ni lovin, kan tih hun hi duh ai chuan a tlai hret tih mek laiin, MNF sorkar laiin kan hotute bulah ka rawt ka rawt thin a. 'Medical College hi ngaihtuah ang u. Mi zinga han sawi hian state ve riang ruang Medical College neih loh chu mak min ti viau zel a nia' tih te hi ka sawi thin a. Kan Speaker hlui kal chhuak ta Pu Chama'n Health a enkawl lai pawh khan ka sawi ka sawi ve thin a. 'Hei hi chu nawr deuh teh u, central ministry lama han sawi hian Medical College neih loh tawp hi mak hi an ti deuh roh a nia' te ka ti ve thin a. Ama'rawhchu, duh angin hmalakna a kal chak hlei thei lova. Kan sorkar laite pawh kha sawi ila pawi ka ti chuang lo. Kan term hmasa a kan hun tha lai kha kan bawhpelh hret em aw ka ti a. MNF sorkar hmasa khan khulamah NDA sorkar lai a ni a. Khalam kha kan thing ri vak lova, term hnihna lamah a tawp dawn lamah UPA a lo sorkar hnu ah kan thing ri vak a, duh ai chuan kan tlai deuh a.

Pu Speaker, chutiang chiah chuan tunah pawh hian kan term kal chiahah khan lo sawi ila chuan central-ah UPA a sawrkar lai a ni a, a hnip leh zual turah kan

ngai deuh a. Tunah sorkar a lo inthlak leh tawh a, kan han sawi a, engpawhnisela, chhonzawm leh turah ngai ta ila. Delhi-ah NDA a lo sorkar leh tawh si a. Keini term hnih kum sawm ve ve hmang chho a kha Medical College kan chai hun kha chu a tlai hret ve ve a ni tih te ngaihtuahnaah chuan a awm deuh a. Engpawhnise tuna kan Prime Minister zahawm tak khu kan hriat vek angin state Chief Minister hlui a ni a, state kalphung a hrethiam em em, thiam taka kan zu sawi chuan pawisa te pawh min pek belh thei turah ka'n ngai a. Kha nichina a hming te pawh kan han lam kan han lam Pu Devi Gowda pawh kha, ka hriatsual loh chuan anni pahnih chiah hi state Chief Minister lo ni tawh Prime Minister seat a thu ta an ni a, tiang khan a bul kan tanna Referral sum pawh min pe a. Tin, Medical College kan tihchhoh tur te pawh state Chief Minister lo ni tawh Prime Minister-a lo nih chhoh leh lai hi tihchhoh hun tur a ni a, min phurpui viau thei turah pawh han ngai ila.

Engpawhnise, nichina kan hotuten an han rawt anga a hming han tihdanglam hleka Central University ni ngei se tih Home Minister pawhin a han sawi ang khan kalpui kha chu ni thei sela duhthusam a nih dawn hi tih kha ka'n sawi leh duh a.

Tichuan Medical College hi keimahni phak tawh tawkah ka lo sawi ri ka lo sawi ri ve thin a, kan Synod hruaitute pawh hi ka lo sawipui tawh a ni, ka ngamtlak deuh chu ka sawipui ziah a. Medical College hi ngaihtuah ang u, tuna Ludhiana-a Christian Medical College kan neih te leh Vellore CMC kan tih te pawh khu a buaipuitu ho hi Kristian an ni a, kan Pastor te aia inpe chuang reng reng lo a tih theih ang, an huatthu suh ah. Kan Pastor te aia inpe lo deuh vek hi an niin ka hria a, tichuan tha deuh an din thei a ni, foreign ami te pawh an zawng a, tiang khan kan lo sawipui ve thin a.

Tum khat Aizawl Theological College in lenga min sawm tum pawhin ka sawi vak a. 'Lengah min sawm a ni bawh a, ka ngaih pawimawh ka'n sawi vak ang e. Medical College hi kan Synod hian ngaihtuah ang u,' ka tihpui a. A chhan chu

tunhmain kan hre vek a, Aizawlah chuan B. Th bak zirna hi kan phak lo deuh rohah kan ngai a ni. Amaherawhchu, centenary denchhenin B.D zirna kan han hawng a, kan lo tithei nasa mai a tih te ka sawi a, an bulah pawh. ‘Chutah M.Th kan han hawng a, kan tithei em em. Doctorate degree lakna pawh kan ti thei. Aizawl Theological College-ah mai ni lo, Baptist unaute pawhin tunah an ti mek zel. Hei hi kan ti thei a ni, kohhran ho hian bei ang u,’ te ka lo ti ve vak vak thin a. Ka sawinaah pawh Durtlanga Nursing School 1988-a an din hlimte kha ngaihtuah teh u. Khatih laia kohhran chak tawk loh leh sum leh pai an neih loh dan ngaihtuahin Nursing School an lo din hi a tha lutuk a ni. A chhan chu kohhran zirtirna nen, Christianna rilru nen Nurse an lo training chhuak a, kum tam tak, tun thleng hian ti teh ang, Mizo Nurse aia duh leh thlan hi kan la nei chuang lo a ni lawm ni. Mizo te hian, kan Nurse te hi kan la duh em em vek, Nursing atan chuan. Chu chu hetah harsa em em chung a ti teh ang, 1928 chho a Nursing School an lo din a an lo kalpui chho naw naw a, sum leh pai chu a la tlem khawp ang, khatih lai chuan, an kalpui lui tlat a. Chutah Serkawn lamah an lo din a. Tin, Civil Hospital-a kan han din ve pawhin, khami influence zel khan nurse ten thlung tak leh khawngaihna Pathian thu nen min enkawl a, kan lawm em em a ni. Nuam kan ti a, tunthleng hian hnam dang nurse hi kan la ngai lo a ni lawm ni Mizote hian ka ti a.

Chutiang chiah chuan Medical College hi kha rilru pu khan Kohhran hian din ta ila engvangin nge maw kan nep viau ang le? Nurse mah kan tih theih chuan doctor-ah pawh kan ti thei ang ti tein Theological college-in lenga min sawm tum chuan ka lo sawipui ve thin a. Chungte pawh chu sawikaina remchang a ni bawk a, a ropui a, tin, a hlu bawk a. Tin, tuna kan tihur pawh hi khalam hawi deuha tih tur kha ni ta se, Medical College tha deuh kan din ang a, degree sang pui nei lo pawh lehlamah chuan a inpekna atangin Specialist pawh nilo mahse, Doctor tamtak min enkawl atana duh em em hi kan nei tho a ni. A degree sang lo Mizo te pawh kha inpekna lai kha a pawimawhna lai tak a nihna a awm a. Chuvang chuan tunah kan Medical College neih

tur pawh hi nichina an sawi ang deuh khan a tha thei ang ber tur ngaihtuahna atang veka sawi kan ni a, khatiang zawng khan ti ta hlek ila tihte ka ngaihtuah a.

Ka ngaihtuahnaa lo awm leh pakhat chu tun anga kan din tum dan hi chu hlauhthawn deuh pawh ka nei ve deuh thova. Tum khat thingtlang khaw lian vak lo atang hian an lo kal a, High School kan din ve duh a ni tiin fund min rawn dil a ni. Mahse, ka ngaihtuah thin a, High School din ta se, tiin ka lo sawipui zek a, din lo mai teh u a, a chhan chu High School din hi a namai lo a nia, a naupang tur in buai bakah zirtirtu tur in buai viau phawt ang a. A thenah phei chuan, a chang phei chuan, khaw thenkhat tihdan ka hriat phei chu Middle School pass hlim reng reng, khawdanga High School kal awih loh tih ang thlengte pawha in dang pawl deuhthe an lo awm a. Maths leh Science teacher in nei mumal thei lovang a, in zirlai pawnah thawn chhuak ula, zir hram hram tur kha chhe deuhin in chhuah pui ang a, Matric pass mang lovin a tei kawit ang a, chutih lain in khaw reserve zawng zawng in hralh zo ang a, development fund lo kal zawng zawng in divert ang a, High School din puitling chuang mang si lovin, a chi em maw ni,' te ka lo tihpui vak a, an din ta lo nghe nghein ka hria a.

Chutiang deuh hlek chu ka rilruah pawh a lo awm a. Nichinah kan ngaithla a, Dr. K. Beichhua thusawite, a hautak dan tur leh ilo te kan han ngaihthlak khan sum remchang apiang kan vawm lut si ang a, kan tifuh hleithei si lovang a, tih te hi hlauhthawanna hi a awm tel ve hrim hrim a. A chhan chu state pachhia kan nih kan hre vek a, chutih mek lai chuan kan member zahawm tak, Pu John Siamkunga'n a rawn sawi zawk a, Roman Catholic-te nena tihpui/tihho tih laite pawh kha ka hre ve thuak thuak a. Khatih lai khan kan Chief Minister zahawm tak Pu Zoramthanga'n Health Minister Ramadoss-a a hmu a, chung ina a lo rawnte pawh a ni a, Medical College puitling sa leh hming nei deuhthe nena in tikhawm chuan Central sawrkar tan pawh han inpuihte pawh hi a nuam lehzual a, an nawrpui thei che u ang a tih thleng khan. Khati zat zatin an tlawh tih phei chu ka lo hre zui tawh vak lova, a bul engemaw lai ka hriat ve zawk kha a awm a. Khatiangte kha a nih dante pawh a ni a. Medical College kan duh a, tin, Medical

College satliah lo deuh hlekte pawh kan duh vek, kan vai hian. Chuvang chuan, vawiinah khati zawng khan rilru zau tak nen ngaihtuahna hmang ta ila tih kha kan sawi ve duh a.

Tichuan, nichina helaia kan member pakhatin a sawi zawk, kan Revenue Minister zahawm tak pawhin a rawn react kha, khangte kha chu, in hmun lo inpek tih kha chu ngaih pawimawh a tihdanglam leh ngei kha chu a tha ngawtin ka ring a, kan support bawh ni sela.

Pu R. ROMAWIA, MINISTER : Pu Speaker, kha tak kha a nia. In hmun inpekte hi kan dan tluang pangngaiyah chuan Revenue Minister-in a approve loh chuan a kal thei lova. Chutiang thil a nih avang tak chuan kan member khan a pawtchhe ta mai bawh si a, pawtchhe lo khan a copy kha kan Speaker hnenah pein, kan Speaker khan min pe chhawng ni se chhui dan turte pawh a awm ang a. Kha kha dik tak chuan ka la na angreng khawp mai.

Pu VANLAZAWMA : Pu Speaker, thui ka sawi tawh lovang a. Hei vawiinah hetiang sawihona tha tak mai kan han nei a, a lawmawm ka ti takzet a. Amaherawhchu, kan sawi duh dante chu inang lo hlek hlekte chu awm bawh mah sela, vawiinah he ram tan, he hnam tana Medical College duh vek kan ni a, a tha ber tur erawh kan hre mai thei bik lova. Tha awma ngaihdan kan sawi tlang lo thei lova, engpawhnise, hetiang sawihona hun tha tak mai kan han nei a, a mimal tak pawhin kan tel ve thei te pawh a lawmawm ka ti hle a ni. Ka lawm e.

Pu K. SANGTHUAMA : Pu Speaker, khawngaihni, kan House Leader zahawm tak awm loh hlan khan ka sawi a, a khaikhawm hmam lo hre ve reng reng se ka duh a. Pu Speaker, hemi hi chu tuman kan hnial lova, tha pawh kan ti tlang a. Tha kan tih tlanna ah khan heti lo deuh hian resolution hi siam ta ila tih kha nichin khan a hmasaber lamah khan ka sawi a. “Central Medical College a nih ngei theih nan theihtawp chhuaha hmalak ni rawh se” tih hi belh ta ila. A chhan chu, hei hi kan hlawhtling lo a nih pawhin,

hemi zu dil leh central-a zu nawr hi chu enge a pawina lem kan ti deuh a. Chuvang chuan, vawiinah State Medical College hi a tha lo ve kan tihna ni lovin, a tha em em a. Amaherawhchu, sum leh paiah hian, tuna Central University kan lo thlang ta pawh hi a tha em em a ni.

Pu P.C.ZORAM SANGLIANA : Pu Speaker, member zahawm tak hi a ding tawh a, a ngaipawimawh a nih chuan written khan kan dah a, a ziak lut tur a ni a. Hetianga kan din zel chuan House zahawmna a awm lo vek.

Pu K. SANGTHUAMA : Pu Speaker, a dik a, kan hria a, i thu thu a ni a. Helam dinglam amite thu a ni a. Chu chu heti laiah kan duhdan kan sawi ve kha a thianga, a leng bawk a, chu chu i remti lo a nih chuan (Pu P.C. Zorama : Ziaka thehlut tur a ni a, kan dan ang khan i kal ang u).

SPEAKER : Ding chung khan inhnial tawh suh u. Dar li a ri tawh a, House ngaihdan kan la phawt ang. Thu rawh, thu rawh. Helam kha in ngaichang lo lutuk a, thuawih loh in zir dawn, a tha lo.

Dar 4:00 a ri tawh a mahse kan la zo lova, i chhonzawm zel ang aw. Awle, tunah kan House Leader a awm a, sawi duh a neih chuan sawi turin sawm ila.

Pu LAL THANHAWLA, CHIEF MINISTER : Pu Speaker, an sawi vek si a, sawi loh bik kha chuan sawi tur a nei ve lo min la ti leh ang a. Sawi tur nei lo tih kha chu ka duh bik dawn lova ka'n sawi mai ang e.

Kan sawiho tawhna atang khan Medical college hi kan duh vek tih a chiang khawp mai a. Amaherawhchu, ni se kan tih dan kha thahnemngaihna avangin a inang lo hret hret chauh a ni a. A Resolution neitu hian 'Central Medical College nei tura hmalak mek hi a lawmawm e' rawn ti law law se chuan thudang a ni a. Chuvangin, hetia

‘Medical College nei tura hmalak mek hi lawmawm kan ti’ a ti ringawt pawh hi kan lawm vek tho a. A tha lo ti pakhatmah kan awm lovin ka hria a, ka awm loh lai pawhin ka ngaithla thova. Chuvangin, tha kan tihtlan vek hi chu tidanglam lo mai ila. Nakinah tihdanglam tulte a awm a nih chuan kan la tidanglam leh ang a tih kha ka ngaihdan a ni a, chu chu a tluanglam berin ka hria a. Chutiang ni lo se chuan inhnialna te a chhuak leh ang a, hei dar li a pel tawh si a. Dar li hnu ah kan Speaker a strict nasa si a, chuvangin, khatiang khan ngaihtuah ni se.

Engpawhnise, thil tha kan neih dawn chuan a kawngte pawh a harsa thei a, tih tur a tam thei a. Medical College hrim hrim hi neih kan duhna a rei tawh a. Tin, vanneihthlak takin Falkawn saw a history chu sawi lo mai ila, an rawn tlawh dawn a phailam atangin, damlo der tur a lem lo hire te kha chu sawi a ngai tawh lova, thil hlui a ni tawh a. Hmalam thlirin kan sawi tawh zawk ang a. Duhthusam chuan central ni se tih hi chu keimahni sum pachhiat lam ngaihtuah hi chuan a dik nghal sa mai a. Tunah hian i veilama mite an lo piangthar te pawh hi thil lawmawm tak a ni a.

Khumi University kan neih dawn lai khuan i veilam a mite pute kha chuan ‘State University a ni tur a ni, chuti lo chu thu kan nei lovang’ tiin an tang tang tang a ni. Kan hotute ve thung khan ‘Central University ni rawh se, kan la zo lo deuh ang e, kan sum leh pai dinhmun atangin, thil dang chu thil dang ni se’ an ti a. Tikhuan Central University an lo ni ta a. Kan state tan chuan kan ta ni reng si kha a zangkhaithlak ta hle a. Chutiang tho chu hei pawh hi a ni thei ang a. Amaherawhchu, tuna a kal danah chuan a hma pawhin kan lo nawr tawh a Central Medical College nei turin, a harsa an ti a.

Tin, hmun hrang hrangah AIIMS ang chi khu an siam dawn a, chungte pawh chu kan lo zuk dil vein kan lo zuk nawr ve tawh a, mahse, kan la hlawhtling thei lova. Tikhuan, hemi Falkawn hmun hi Medical College atan kan hotuten an han nawr kian khan a rawn en hi an rawn kal deuh zut a ni. Director General of Health Services, Central-ami te leh a thachhangdawltute angte pawh an lo kal a. A rawn en tawh hi chuan

a hmun hi tha an ti deuh vek a ni. Tin, MCI hotute pawh an lo kal tawh a, tha an ti a. Tichuan, sawlai saw kan hotuten central lampangte nena inberemin tihngheh a lo ni ta a.

Tin, Medical College kan neih dawn chuan a base hospital kan neih a ngai a. Sawlaiah sawn khum awm sa saw 250 tunah sawn kan duang mek a, peih hman kan tum a. Tin, MCI hotute hian tun November leh December vel kal taah khan kan rawn en ang an ti a, an rawn la kal lem hlei lova. An thutiamah an ding ngai lo an ti a, kan hriatsa angin an lo ding ta lo ngei reng a.

Tichuan a tawi zawngin college din hi tha kan ti vek a, a tak takah chuan a sorkar anga zuk ngaihtuah chuan a huphurhawm hle a ni, sum leh pai chungchangah. Tin, a tira din kan han tumin khatia kan han tih chhohah khan a pre-condition zingah khan a Director neih hmasak a ngai a. A Director tur kan han zawng a, an hlawh kha a lo tam hlawm khawp mai a. Engamah hma khan hemi kan neih theihna tur atan khan Director tur kha thla kipin nuai engemaw zat kan pek a ngai dawn a ni. Tikhan kan han ti chhin a, thenkhat retired tawh te kha chuan nuai hnih leh singnga te, nuai thum te, tunah hian doctor pakhat Imphal lampanga mi nuai hnihin kan nawr thla thei hram a, Director tur chu kan nei tawh a, kha kha pay condition zing ami a ni a. Tichuan, an rawn en tak lohah kha chuan kan kal zel chho thei turah kan ngai a.

A tirah kan hotuten an ngaihtuah tirhin student 50 velin tan ila, chu chu kan theih tawh vel a nia tiin an ngaihtuah a. Mahse, central lamin 100 a ni tur a ni an rawn ti a. 50 kha chu kan zuam ve viau mai a mahse, 100 ni tur khan kan han huphurh deuh hlek a. Tin, a base hospital atan chuan Referral Hospital saw kan chei chho mek a. Tin, anmahni classroom leh administrative building te pawh saw hman theih mai turah te ngaih a ni a. Tichuan, neih in duh si avangin vawiinah kan zavai hian huphurh tak chungin nei phawt ang, a recurring expenditure lo awm chho zel tur pawh kha a tih dan dan kan ngaihtuah

dawn nia kan ti a. Tin, mithiamte pawh kan hanrawn a an han calculate a, kan la nei ngai loh a nia. Tin, a subject te pawh kha a zavaiin a la ni nghal lo mai thei a. Chuti a nih chuan a fee te nen chutiang chuan assistant lo kal te nen kan ti thei hram hram mai ang a, mualpho lovin decision ang deuhin tih kha kan nei ta a.

Tin, kan mithiamte han chhut danah pawh harsa lo tak mahse inrenchem taka kal thei turin kan inngai a ni tunah hian. Tin, tunah hian Central College tih pass kher lo mah ila a la bawhzui zel theih tho va. Tin, PPP mode-a min tihpui duh te pawh an awm mai thei a ni. Tin, foreign hospital chain te pawh tun tum Delhi-a ka kal khan minrawn be thuak thuak te pawh an awm a.

Tin, cancer tam na ber zuk leh hmuamah kan inthlahdah a, ei leh inah kan inthlahdah a, kuhva khawr tullo te pawh ei vak vak hnam kan ni a, Chinai cancer siamtu pawh ngam sak sak tak kan ni a. Hetiang an hriat avang hian cancer hospital lampanga minrawn thawhpui tur pawh hian minrawn hnar deuh reng a. Keimahni lamah engemaw inpeih lohna deuh leh khatiang kha kan nih avangin an lo la kal lo va. Tin, vawiinah hian he resolution hi pass ila, Medical College nei turin inpuahchah phawt ila. Tichuan a changtlun zelna tur kha chu Central College atana nawr tur te pawh hemi kan pass avang hian a thiango chuang lo va, a nawr zui zel theih tho va.

Tin, PPP mode-a tha taka min kalpui duh tu tur hi ram dang atang te pawhin an awm mai thei a. Tin, tualchhungah, Madras-ah te pawh an hmu zo mai theiin kan ring a. Chuvangchuan, hetiang hi kan neih phawt loh chuan a kal zel dan tur te pawh kha a rel lawk theih loh va. Chuvangin, huaisen taka neih phawt mai, expenditure leh thil zawnzawng kha kan tih phawt a tul a. Tin, chumi tur chuan tunah sawn Falkawn Referral Hospital saw theihpatawpin sorkarin a buatsaih a. Chuvangin Pu Speaker, kan duh vek si a, kan duh dan kha tlemin

a inanglo hret hret a ni mai a. Khami inanglo hret hreta kha siam remin nakinah a tha zawk kan la kalpui zel dawn a. Engpawhnisela Medical College hrim hrim hi kan mamawh a, kan duh vek a, Mizo mipui pawhin kan duh a. Hetiang nei tura kan hotuten hma an rawn la hi kan lawm hle a ni. Neih phawt mai a, a changtlun zel dan tur kha chu hunin a la rawn hril zel ang tih beisei chung leh a tha zawk tur zawngin a inher rem thei ang tih beiseiin, hemi resolution hi a nih ang ang a a neitu in a rawn putluh ang hi pass rup mai hi a tha ber in ka hria a, ka rawn support a ni.

SPEAKER : Awle, tunah chuan Health Minister, member zahawm takte sawina atanga sawifiah ngai te sawifiah pahin conclude turin ilo sawm ang.

Pu LAL THANZARA, MINISTER : Pu Speaker, ka lawm e. Vawiinah Aizawl South-III bialtu zahawm tak Pu K. S. Thanga private resolution, ka Department enkawl leh kan hmalak lai mek 'Medical College nei tura hmalak mek hi lawmawm kan ti' tih he House zahawm takah sawiho a ni leh member zawng zawngin he resolution hi an thlawp mai bak ah, a bikin kan Opposition Leader zahawm tak phe chu a phur hle a ni tih te ka'n hriat khan a lawmawm ka ti a. A hmasain member zahawm tak te chungah lawmthu ka sawi a ni.

Pu Speaker, member-ten an sawi tam ber chu sum leh paiah a hautak dawn si a, chuvangin Central Sponsor Scheme hnuaiiah hian awm thei sela tih a ni a. Pu Speaker, hei hi House Leader-in a sawi ang khan amah pawhin a duh dan a ni a. Chutiang chuan central sponsor Medical College nei tur hian Congress ministry-a Health Minister hnenah khan lehkha a thawn a, a lo dil tawh a ni. Amaherawhchu, khatih hunlai khan India ram pumpuiaiah hian chutiang ang, AIIMS type hospital kha state, ka hriat dan chuan 6 niin ka hria a, mahse 9 ni te a sawi te pawh an awm a, atan khan an lo thlang tawh a. Chuvangin tun atan chuan khatiang Central Sponsor Scheme hnuaiiah khan Medical College din an

tum tawh loh avangin tunah hian kan nei thei ta rih lo a ni. Kan Opposition Group Leader zahawm takin a sawi ang khan, an hunlai te khan hma lo la chu ni se, tunhnaia AIIMS type ang hospital din tura ruahmanna central-in an lo rawt angah te khan kan tel ve thei tur a ni a. Chuvangin vawiinah hian central sponsor ang chuan a din theih rih loh a ni tih kha member-ten min lo hriatpui turin Pu Speaker, ka'n sawi duh a. Chutih rual chuan, tun hunah hian tuna kan kalpui ang hian state Medical College turin kan kalpui chho ang a, bul kan tan chho ang a, chumi hnu ah chuan central enkawlna hnuaiyah hian a la luh theih tho a ni.

Hei JIPMER, Pondicherry Medical College khu 1823 khan French hoin an lo din kha a ni a, state ta angin, 1956 khan central sorkar hnuaiyah dah rih a ni a, central sorkarin tunah a enkawl mek. Tin, chutiang zelin PGI, Chandigarh hi state-in 1963 ah an din a, tichuan 1967-ah central enkawlna hnuaiyah an lut ve leh tawh a ni.

Tin, kan thenawm lawk ami RIIMS, Imphal pawh hi 1972 khan NE States-in an din kha a ni a, 1995 atang khan NEC in a la a, Government of India hnuaiyah kum 2007 khan an lut chho leh a. Chutiang chuan keini pawh in a bul hi tluang taka kan tan chhoh chuan tunhnuah sum leh paiah kan lo harsa ta viau a nih pawhin centralah hian luh lehna chance hi a la awm tho a ni tih ka'n sawi hmasa duh a.

Tin, member zahawm tak Dr. Beichhua khan Falkawn-a Referral Hospital saw a bul kan lo tan a ni a, tunah he sorkarin Medical College an han ti tur pawh hi kan hmalaknain lo chhonzawm ve mai a ni, ti zawng deuh khan a sawi niin ka hria a. Pu Speaker, i phalnain Legislative Assembly vawi 5-na an session vawi 12-na ni 26.3.2008 ah.... khan zawhna leh chhanna hunah Pu Andrew-a te leh kan Health Minister thin Pu Lalrinliana Sailo ten khatih hunlaia Health Minister Pu Tlanghmingthanga zawhna an pekah, Pu Lalrinliana Sailo chuan

Referral Hospital chungchang a zawhbelhna kha, khatih laiah Health Minister Pu Tlanghmingthanga chhannaah chuan “Hemi chungchanga kan plan zawng zawng majority ti mai ila, thildang tihthulha hospital hi run zawk ang tiin lokal ta ila, kan plan sum, kan sum neih hi a majority hi a kal dawn a ni, hei hi sorkarin advantange a ti em?” tih a ni a. Chutiang khawp chuan Medical College chu sawi loh Referral Hospital kalpui pawh, khatih hunlaia Health Minister zahawm tak khan a ngamlo a ni tih chiang takin hetih hunlai hian House a hriattir a ni.

Tin, kan member zahawm tak Er. Lalrinawma khan “Kan din ve uk si ang a, chhe tak hian kan din ang a, kan thi zut zut mai lawng maw” tih a rawn sawi kha. Nia, a lehlamah chuan MCI norms hautak zia leh anni duhdan anga kan din dawn avangin, thil tih tur tam tak a awm thu leh zirtirtu tha kan mamawh zawng zawngte kha hre vek chung khan khatiang khan a rawn sawi a. Chuvang chuan MCI norms hautak tak anga an phalna hnuaiiah hian keini hian Medical College kan din a nih chuan, thih puk puk kha chu a hlauhawm dawn a ni tih member zahawm tak Pu Rinawma hi ka hriattir duh a.

Tin, seat 50-a bul tan kan tum kha central lampang khan seat 100 atan sanction min rawn pe tlat mai a, chuvang chuan seat 100 hian in tih ngei ngei a ngai a ni an ti a. Hei hi kan la lo ang a, seat 50 in kan rawn ti tha leh ang e, kan hotuten an tih pawhin, seat 50 in rawn titha leh dawn mah ula tuna kan sanction tawh ang hi in ti lo a nih chuan seat 50 pawh chuan sanction in hmu ang tih a chiang chuang lo a ni an ti a. Chuvang chuan seat 50 a bul tan kan tum kha seat 100 hian kan ti lo thei ta lova, pawisa min rawn sanction ang kha kan kalpui a ngai a ni. Chu chu tun tumah hian seat 50-a kan tih lohna chhan, seat 100-a bul kan tanna chhan a ni.

Nichina ka sawi tak ang khan thusawitu tam zawk khan Central Medical College ni zawk se tih te chu tun hunah hi chuan khatiang tih theihna

tur khan chance kan nei rih lo. MNF sorkar hmasa lam khan an group leader-in a thahnemngaihna ang khan tih nachang kha chu lo hria sela chuan central sponsored hnuaiia Medical College 6(paruk) an thlan zingah khan kan tel ve maithei a ni, chutiang chu vawiina kan dinhmun chu a ni.

Tin, member zahawm tak Pu Ruatkima khan Falkawn Hospital compound-ah in hmun pek a nih thu kha a rawn sawi a, kha kha chu kan Revenue Minister-in a chhang tawh a. Tin, Falkawn Referral Hospital lam atanga kan Hospital enkawltute chuan helai hmunah hian ram pek kan neih thu an hrelo a ni.

Pu LALRUATKIMA : Pu Speaker, he House zahawm takah hian documents lem ka feed lova, he ram hi Health Department-in a pek a ni tiin LSC ah Chiang takin a inziak a, khalaiah kha chuan kan Minister zahawm tak kha chuan official-te atanga a dawn kha thudiklo a ni tih kha a Chiangin ka hria. A chhan chu he ram hi Health Department-in a pek a ni tiin LSC-ah a inziak thlap a ni, ka Chiang a LSC-ah a inziak thlap mai, chu chu official lam pawhin an hria a ni.....

Pu K.S. THANGA : Pu Speaker, Health Department hian LSC pek theihna a nei hlei nem

Pu LALRUATKIMA :a pe theitu chu ni 26.6.2001 office memorandum hian govt. land leh building reng reng chu.....(interruption) in duh chuan in mawhphurhna a ni, khami hrelo khawpa sorkar efficiency a awmlo a nih chuan he sorkar-ah hian accountability a awmlo tihna a ni dawn lawm ni Pu Speaker. He ram hi pek ngei a ni tih chu ka Chiang a lawm..... (interruption)..... a lehkha pawh a genuine thlap dawt ka sawilo.

Pu LAL THANHAWLA, CHIEF MINISTER : LSC kha, department-in a pek a ni a tih chuan 'fake' a nih ka ring a. Revenue Department Minister approval la lovin LSC hi khawiahmah a pek theih loh.

Pu LARUATKIMA : LSC chhungah khan a inziah dan chuan, he hmun hi Health department-in an pek, LSC siam sak a ni, tiin a inziak thlap a ni.

SPEAKER : Ngawi lawk rawh. 'Keimah' a tih tawh chuan lungawi ve rawh.

Pu LARUATKIMA : Min dil lova, ka pawt thler daih si a.

SPEAKER : Ka hnenahrawn la la, a pass kha.

Pu LARUATKIMA : Duh chuan kan pe thei vek, kan pe ngei ang, Pu Speaker.

Pu K.S. THANGA : Vawiih hian MNF in PR an chhuah a, kan sawi law law ang e. Seventh-a, Falkawn chu ka recommend-a ram pek angin an ziaik mek a ni. Chutah chuan, Sevenatha'n a rawn sawinaah chuan ka in hmun hi Pi Dawngi, Aizawl ami ta ka lei a ni. A bul hi ka lei leh a, Aizawl pa Police Inspector ta a ni. Ka thenawm ten min hriatpui vek tih an ziaik a. Chuvangin, MNF sawlai mite sawn an hotute hi information dik lovin House-ah te an au tir palh ang tih ka hlau a, dawtin PR te an chhuah tir palh ang tih ka hlau khawp mai. A tul chuan kan revenue..... (interruption) mimal ram an lei kha engtin nge keiin LSC ka pek theih ang? ..interruption

Pu LALRUATKIMA : Pu Speaker, dawt a ni hauh lo. Hetah hian a bialtu MLA zahawm tak khan Falkawn a kan Unit President leh Block President hluiin an dil hi lo tihhlawhtlinsak turin ka ngenpui e tiin a ziaik thlap a ni. Chumi hmang chuan LSC an

siam a, note-sheet a inziak zawng zawng hi Health department in an land lease atanga an pekchhuah tak avangin (interrupted) ti a ziah a ni a, engatinge an pek chhuah?

SPEAKER : Ngawi rawh, ngawi rawh, tikhan in au su. Pu Ruatkim, nang pawh ngai thla rawh. Aw, a chiang mai, Revenue Minister-in 'khami a pass kha ka office ah rawn pe la, a dik leh dik lo ka fiah ang,' a ti tawh. Khami bak kha chu chhan ngaihna a awm tawh lo. Tin, Minister in a sawi tawh a, kan ti lo a ti a. Kha kha rinloh a, khawi lai emaw thu kha dik leh fela ngaih kher tur a ni lo. Khawngaih takin i lung a awi lo a nih chuan office-ah Thawhtanah emaw, session zawhah emaw Revenue Minister hnenah a dik leh dik lo kha va fiah tawh mai rawh. Minister-in sawi tawh rawh se, tibuai tawh suh u.

Pu LAL THANZARA, MINISTER : Pu Speaker, member zahawm tak Pu Ruatkima khan Falkawn Medical College kan dinna turah hian Aizawl Civil Hospital in tuar lo sela ti zawng khan a rawn sawi a. Aizawl Civil Hospital hi Falkawna Medical College kan din dawn avang hian tawrh tir kan tum lova. Aizawl Civil Hospital hi tihchangtlun kan tum zawk a ni. Chutiang zawng chuan hma kan la mek a. Amaherawhchu, Aizawl Civil Hospital hman tul tawh lo bungraw thenkhatte erawh chu kan sawn phei a ni tih kha ka sawi duh bawk a ni.

I veilama thu member ten min support na an sawi vek avangin an rawn sawi atanga han chhan tur teh vak a awm lova, a lawmawm ka ti a. Tin, Medical College hi a kum khatnaah chuan subject 3-a bul tan tur a ni. Nichina kan ngaihthlak ang khan anatomy leh bio-chemistry leh Physiolog-in kan tan dawn a, department tinah hian Professor pakhat, Associate Professor 1 leh Asst. Professor 1 leh demonstrator 3 zel a ngai a. Anatomy-ah hian Mizo Asst. Professor hna thawk lai mek leh Mizo rawih tur dang doctor kan nei a. Tin, demonstrator tur hi chu kan nei a, bio-chemistry-ah hian Mizo vek rawih mai tur pawh kan nei thei dawn a ni.

Physiology ah hian Mizo doctor pakhat rawih theih nghal awmin kan hria. Tin, chutihruah chuan MCI norms kha an strict hle lai khan, a bikin North East State tan hi chuan relaxation eng eng emaw an siam thei bawk a ni tih kha kan member te hriatah ka tarlang duh bawk a. Chuvangin kan huphurh ang em em hi chuan a huphurhawm dawnin a lang lova.

Tin, chutih rual chuan ramdang atanga tanpuina entirnan, JICA kaltlang pawhin kan college din tumah hian tanpuina hi min pek dan a awm dawn te pawhin kan hria a ni. Tin, kan ngaihthlak ang khan sum te chu a ngai tam dawn lo thei lova, chutih rual chuan kan member zahawm tak ten an sawi ang khan sum save-na tur tam tak hi a awm ve thung a ni. Phailama kan inentirna, kan kal man leh insentirna leh inenkawl na a khulai kan zu chawi ang zawng zawng te kha helaiah college changtlung tak kan lo neih chuan, chung sum sente chu kan lo save thei tawh dawn a. Tunah hian sawrkar hnathawk damlo enkawl ngai, phailam damdawiina sawrkarin kan pawisa bat hi cheng vaibelchhe nga aia tam a awm mek a ni. Chung zawng zawngte chu college puitling tak kan din hunah chuan kan save thei tawh dawn a, chuvangin wawiinah he resolution duhawm tak mai hi i dinglam leh i veilam a miten Pu Speaker, min thlawp tlat avangin lawmthu ka sawi a. Tin, arawn puluttu kan member zahawm tak Pu K.S. Thanga chungah pawh lawmthu ka sawi e. Ka lawm e.

SPEAKER : Awle, tunah chuan resolution neitu Pu K.S. Thanga kan lo sawm tawh ang a. Lo khaikhawm se, chumi zawhah House pawmpuina rawn dil nghal tawh mai rawh se.

Pu K.S. THANGA : Pu Speaker, ka lawm e. Hei wawiinah member sawm leh pasarih, kan Chief Minister leh Home Minister te, tin, a changtu Minister te leh Minister dangte tiamin kan resolution min rawn sawipui avangin lawmthu ka sawi a.

Thil pakhat, i veilama thute kha Pu Speaker, an inti regional viau emaw ka ti a, an national ta viau mai a ni ka ti, 'Central' an ti deuh reng mai a. Keini lam kan inti Mizo thung a, anni lam khulamah an ti deuh a. Kan pawl nih dan leh kan nunphung kha a inang lo, kan ngaihdan kha a inang lo deuh emaw ni chu aw tih te ka ngaihtuah a, chu chu ka rawn sawichhuak mai mai duh a. An thusawi zawng zawngah khan an central raih mai, keini lam kha kan tualto zawk deuh te khan ka han hre deuh a, khalai kha ka lo notice ve deuh a.

A tlangpui thu ah kan zavaiin he resolution hi kan support niin ka hria a. Amaherawhchu, i veilama thute kha chuan tiang khan han tih central deuh kha an duh kha a ni a. Amaherawhchu, kan Chief Minister zahawm tak kan House Leader ni bawkin a sawi ang khan, 'han tichhin phawt ila, hun a lokal ang a thil awmdan atang te pawhin kan la tichho zel ang,' a tih a sawi kha a dikin ka hria a. Mizo upain 'Buana hmaa kherh' an tih hi a awm a, kan ti dawn a han zam em em nghal kha, han thlaphan nghal em em na lai kha, khatiang ang kha chuan ram ropui tak kan din thei lovang tih kha ka ngaihtuah deuh a. Tunah hian eng party te emaw chuan economic independence te pawh kan puang dawn niin ka hria a, chutiang tan chuan Medical College pakhat han sual kha chu a choawm lo lem em maw ni le. India ram zem zen lova, economic independent te pawh din kha kan tum dawn tih Mizo mipui zawng zawng kan zirtir dawn a nih chuan, Medical College pakhat na na na chu a choawm hle dawn lawm ni tih te ka ngaihtuah a. Tichuan kan member zahawm tak takte thu sawi kha, kha kan Health Minister zahawm tak a changtu ni bawkin, a rawn react teuh tawh a. Ka react vek turah ngai lo ila. Amaherawhchu thenkhat tlema han tihrik ve ngai deuh awmin ka hria a.

Pakhatna ah chuan member zahawm tak Er. Lalrinawma leh Dr. Beichhua ten an han sawi teaching faculty kha, tuna kan Health Minister zahawm tak sawi ang khan, North East bikah hian relaxation a awm a ni tih kha kan hriat tlan a pawimawh a. Chuvang chuan Professor tur atan te, Associate Professor tur atan te, Assistant Professor tur atan te hian a bikin department pahnihah hi chuan harsatna kan neilo nghal dawn niin

a lang a. Anatomy department bikah hian tlema ngaihtuahna kan neih deuh ngai tur a ni. MBBS tutor phei chu helaiah MBBS kan nei chho zel a, hengah hi chuan problem kan nei dawn lova, chuvang chuan teaching faculty laiah khan kan hotute hian ngaihtuahna an hmang a. Kan Health Minister leh kan Chief Minister te, kan Finance Minister te hi helamah hian tihtak takin ngaihtuahna an hmang a, Finance Minister pawh hian kan state priority a nih avangin kan sorkar sum bawm tul ang pawh hi sawlaiah sawn kan hmang dawn a ni tih hi Finance te leh Planning hote nena meeting a neihna ah pawh hian a sawi thin a ni. Chuvang chuan vaibelchhe 8000 chuang budget nei ve tan hi chuan lungngaih lutuk tur a awm lo a ni ti zawng te pawh hian han insawi thlamuan ve ta ila.

Kan Chief Minister zahawm tak hi Pathian malsawmna te pawh a dawngin ka hria a. Lengpui Airport bul a tan lai khuan plan budget kan neih kha vaibelchhe 100 chauh a ni. Thil theih loh anga ngaih kha vawiin chuan, Khanglaia hmusittute phei chuan ‘Choak bak a tum lovang’ an tih khum ang te kha an tawng ve a ni a. Mahse tumruhna nen, huaisenna nen, Pathian rinna nen miin vision an neih a Pathian an rin ngam bawh chuan Pathian hian a lo hruai a. Kan zin ta noh noh mai a, kan thlawk ta mum mum mai a, hei tunah te phei chuan Delhi direct te pawh kan ti tawh a ni. Chutiang chu vawiina kan dinhmun hi a ni a.

Mizoram House, Salt Lake-a awm khu, a din lai khan tuna kan Chief Minister zahawm tak hi, khatih lai hun bawh ami kha a ni a. Khanglaia political party te khan sawtiang thingtlang ramhnuaiiah tumah an thleng lovang, an ti a. Keini pawh hian khang kha kan hre ve pha a ni. Mahse an thleng peih nameuh mai a, vision neia huaisenna nen thil tha ngaihtuahna nei a thil tha ti leader kan lo nei a ni tih hi chu vawiinah khuan Salt Lake-a thleng tur chuan a har tawh khawp mai. Sorkar mipawimawh te leh damlo serious tak tak te leh VIP hnena sawi pha deuh te tan lo phei hei chuan Salt Lake-ah seat chan a har tawh a ni. Tunah khuan Salt Lake population khu mihring nuai 20 chuang an ni tawh a ni. Chutiang chuan vawiinah hian buan a hmaa kan kherhna khan kan tana thil tha pawh kha kan tih ngam loh phah ve thei a. Chu chu

vawiin ah hian kan member zahawm tak takte pawh khan hengah hi chuan inlungual a, a ram ang, a hnam anga kan tan ho hi a pawimawh a ni tih hi kan hriat a pawimawh a.

Tin, ka sawi ang khan teaching faculty-ah hian vawiina kan specialist te hi relaxation avang khan tam tak hian an thawk thei nghal dawn a ni tih kha min hriat sak bawk ula ka'n ti duh a. Tin, a benefits, a hlep, kan hlawkna tur lam hi kan ngaihtuah tel a ngai a. Tunah hian seat 40 vel emaw India ram pum huapah kan nei a. Tahchuan, tuna seat 100 kan lo neih chuan Central pool-ah, Central quota ah seat 15 a han kal ang a, loh theih lohin, tichuan, seat 85 hi kan nei dawn a ni.

Tin, doctor hi kum 5 zir a ni tawh a. Chumi kum 5 chhung chuan harsatna nei lovin zir chhuak ta sela. Kum 5 ah chuan naupang zirlai 500 rual an awm tawh dawn tihna a ni a. Kum 5 a rawn tawp chiah khan Mizo thalai rual 85 kha doctor chhuak thar kan neih belh ziah mai tur ringawt pawh hi a lawmawm a. Khami kan han tihna chhan kha a specialist te, a super specialist thlenga kal theihna tur a nih avangin kan hotuten thui tak thlirin hetiang hian a hming an lo phuah a ni tih kha kan hriat a pawimawh a.

Tin, refer, hmun danga kal thei tawh miah lo tura inngaih hi a dik ka ring lova. Chhungkua damloh leh harsatna avangin Vellore Christian Medical College ah te pawh kum engemaw zat kan zuk kal ve a. RIMS Imphal atang khian khi Medical College-a doctor zirlai ngei, anmahni zirtirtuten Vellore Hospital-a an han refer te pawh an awm ve tho mai. Chutiang chu a ni a, helaiah hian thiamna zawng zawng kan nei seng lo a nih pawhin, hmunpui lamah khan kan ti theilo chuang lovang a.

Tin, kan thian member zahawm tak ten an han sawi a, 'kan inti thi nasa lutuk ang, chuti khati' an tih te kha vawiinah hian a syllabus tur, a standard engkim mai nei a ni a. Kha vang khan khang kha a harsa lovang a. Tin, Medical College a ni emaw, AIIMS a ni emaw, Vellore Hospital a nih vang emaw, TATA Hospital emaw a nih avang hian thihna hi a pumpelh theih loh. Hei hi kan pawmtlan a tha ka ti. Thihna

nei theilo tur anga kan inngai dawn a nih kha chuan kan thi dawn khawp a ni. Vawiin amite pawh hi engtikah emaw chuan thlanmualah kan la kal vek dawn hrim hrim. Vellore-ah pawh kal ila, AIIMS ah pawh kal ila, TATA Hospital-ah pawh kal ila. Ama'rawhchu, hetah hian kan sum leh pai kan lo release a, khulama luang chhuak nasa lutuk kha kan veng ang a, hetah hian thiamna kan pe bawk ang tih hi kan hotuten an beisei leh an vision chu a ni tih hi ka'n sawi duh a ni.

Tin, thiamna thu-ah hian Mizo hi insit tur niin ka hre lova. Mi pakhat ka experience ka chian em emah kan Mizo thalai-te hi India ram hnam dang nawlpuia lehkha tihtakzeta zuk zir-te khu gold medalist kan ngah khawp mai tih hi ka sawi duh a ni. Tamil Nadu Agriculture University khu India rama Agriculture University tha berah kum 10 aia rei an thlang tawh a. Khung Tamil hnam lehkha thiam zingah khuan Mizo ngei khan gold medal a zuk la thei tlat mai a ni. Chutiang chuan, vawiin hian kan Mizo thalaite hi thiamna nei thei khawpa quality sang, caliber sang an ni tih hi kan pawm tlan a ngai a, kan hriat tlan pawh a thain ka hria a. Chutiang ho chu vawiinah hian a nihna tak zawkah chuan Mizoram hi Education hub-ah, zirna hmunpui leh intelkhawmna hmunah kan hotute hian siam an duh a, a tum pawh hi an tum mek a, Medical College mai ni lovin, Engineering College tha ber ber-te leh thil dang dangte pawh kha ngaihtuahnaah hian a la awm a ni tih vawiin-ah hian kan hriat atan a pawimawhin ka hria a.

Chuvangin vawiina ka Resolution-'Medical College nei tura hmalak mek hi lawmawm kan ti' tih kan member zawng zawngte pawhin tha kan tih tlan kha Mizo kan nihna anga huaisenna nen inring tawkin central zem ringawt zen tum lo deuha helaia kan ram tan hian thil tih theih, Mizo hian thil kan ti ve thei a ni tih ring chungin he Resolution hi min thlawp vek turin ka'n sawm a ni e. Pu Speaker, ka lawm e.

SPEAKER : Awle, Resolution neitu Pu K.S. Thanga'n a Resolution pawmpui turin House hi a dil tawh a, Resolution chu hei hi a ni - 'Medical College nei tura hmalak mek chu lawmawm kan ti' tih a ni a, Pawm remti zawngin 'Remti' ti ula,

remti lo kan awm em? Kan awm lo. He Resolution, Pu K.S. Thanga putluh 'Medical College neih tura hmalak mek hi lawmawm kan ti' tih hi House hian lungrual takin a pawm a ni.

Tunah chuan tahrik ni 21 Thawhtan zing dar 10:30-a kal khawm leh turin kan haw rih dawn a ni. The sitting is adjourned.

Sitting adjourned at 4:40 P.M.